

మార్కు రాస్తి సువార్త

నెల్వ కిబిసినిక

యా పుస్తకం రాస్తికాన్ మార్కు. వీండ్రు బర్నబెజ్ దత్తుదికాన్. విన్నిజ్ మరి ఉండ్రీ పేరు యోహాను ఇజిబా కూక్వార్. బర్నబని పవులు నెల్వదాన్ పేతురువెట కూడఃజి క్రీస్తు సేవవణి కిదెజ్ మార్కుజ్ అవ్కాసం దోహ్క్వాద్. యా సువార్త రాస్తిజ్ పేతురుబాణిజ్ నెస్టాండ్రె రాస్టాన్ ఇజి అర్దమాజినాద్. రాస్తి కాలం క్రీస్తు యా లోకమ్దు వాజి సాజి మర్జి నిజితివెనుక సెగం పంటెజ్ గడఃస్తివెనుక రాస్టాన్. ముకెలమతిక, క్రీస్తు గొప్ప పెరి బమ్మాతి పణిజ్ కిత్తి దేవుణు మరిసి ఇజి, దేవుణుదిజ్ సేవ కితికాన్ ఇజి, మార్కు రాసి తోరిస్టాన్. క్రీస్తు వెప్తి బోదదిజ్ ఇంక క్రీస్తు కిత్తి బమ్మాతి గొప్ప పెరి పణిజి వందిజ్ లావు వెప్సి రాస్త మనాన్. క్రీస్తు కిత్తి గొప్ప పెరి బమ్మాతి పణిజ్ వద్దెనిమితి రాస్త మనాన్. నాలిగినె కతెజ్వజ రాస్టాన్.

యోహాను దేవుణు మాటసాటిసినాన్

¹ దేవుణు మరిసి ఆతి యేసు క్రీస్తు* వందిజ్ సువార్త ఇబ్బె మొదొల్సినాద్.

² పూర్బ దినమ్కాజ్ ముజుల్ దేవుణు వన్ని మరిసిజ్ వెప్తి మాటెజ్ యెసయ ప్రవక్త ఈహు రాస్త మహాన్. “ఇదిలో, నాను నా కబ్బు తన్నివన్నిజ్ నీ ముజుల పొక్కిన. లోకు నిజి ధరు కిదెజ్ ఇజి వాండ్రు నీ ముందల నీ సరి నెగెండ్ కినాన్†.

³ బిడిఃమ్బూమిదాన్ వాండ్రు ఈహు డెల్ని వెప్సినాన్ ప్రబుజ్ లోకుడగ్రు వాదెజ్ సరి తయర్కిదు. ప్రబుజ్ లోకుడగ్రు వాదెజ్ సరి తినాజ్ కిదు‡”.

* **1:1 1:1** లోకాజ్ రక్సిస్టెజ్ దేవుణు ఏర్పాటు పొక్కికాన్. † **1:2 1:2** మలాకి 3:1.

‡ **1:3 1:3** యెసయ 40:3.

4 యెసయ ప్రవక్త వెప్తావజ యోహాను బిడిఃజ్ బూమిదు వాతాన్. “లోకుర్ పాపమ్కు డిఃసిసీజి బాప్తినం లాగె ఆదు. దేవుణు పాపమ్కు సెమిస్నాన్ ఇజి వెప్సి యోహాను బానె లోకాజ్ బాప్తినం సీజి మహాన్.

యేసు బాప్తినం లాగె ఆజినాన్

5 యూదయ దేసెమ్దికార్ విజెరె, యెరూసలేం పట్టుమ్దికార్ విజెరె సోత్తారె యోహాను డగ్గు వాతార్. వారు పాపమ్కు ఒప్పు కొటార్. యోహాను వరిజ్ యొర్దాన్ గడ్డాదు బాప్తినం సితాన్.

6 యోహాను ఒంటె బులుస్కాణిజ్ తయార్ కిత్తి సొక్క పొర్పాజి, నడఃముదు తోలు బెల్లు తొప్తా మహాన్. వాండ్రు మెపిలెక్కి అడిఃవి తేనె తింజి మహాన్.

7 యోహాను లోకాజ్ ఈహు వెప్సి వెప్తాన్, “నా వెనుక ఒరెన్ వానాన్లె. వాండ్రు నజి మిస్తి నండో పెరికాన్. వన్ని జోడు బెల్టు కూతెజ్బా నాను ఏపటితికాన్ ఆఏ.

8 నాను మిజి ఏరుదు బాప్తినం సీజిన. నా వెనుక వానికాన్ దేవుణు ఆత్మదాన్ బాప్తినం సీనాన్లె”.

9 ఆ దినమ్కాజ్ ఒర్నెండు యేసు గలీలయదు మన్ని నజరెతుదాన్ యొర్దాన్ గడ్డాదు వాతాన్. అబ్బె యోహాను యేసుజ్ యొర్దాను గడ్డాదు బాప్తినం సితాన్.

10 గడ్డదాన్ వెల్లి వాజిమహిజ్ ఆగాసం రే ఆతాదె దేవుణు ఆత్మ పావరపొటి లెకెండ్ వన్ని ముస్కు వానిక యేసు సుడఃతాన్.

11 “నీను నాను ప్రేమిసిని నా మరిన్. నీ వందిజ్ నాను నండో సర్ద ఆజిన”, ఇజి పరలోకమ్దాన్ ఉండ్రె కంటం వాతాద్.

12 వెటనె దేవుణు ఆత్మ యేసుజ్ బిడిఃమ్ బూమిదు పోక్తాన్.

13 వాండ్రు అబ్బె నలపయ్ రోస్కు రెయుపొగల్ మహాన్. సయ్తాన్ యేసుజ్ తప్ప కిబిస్తైజ్ పరిస కిజి సుడఃతాన్. అబ్బె అడిఃవి జంతుజ్వెట మహాన్. దేవుణుదూతార్ వన్నిజ్ నెగెండ్ సుడఃతార్.

యేసు సిసూరిజ్ కూక్కినాన్.

14 హేరోదు రాజు యోహానుజ్ జెలిదు ఇడితివెనుక యేసు గలీలయదు సొహాండ్రే దేవుణునువార్త బోదిస్తాన్.

15 “దేవుణు ముజుల్పై ఏర్పాటు కిత్తి టయం ఏలు వాతాద్. దేవుణు ఏలుబడిః కిని గడిఃయ డగ్రు ఆత మనాద్. మీ పాపమ్కు బప్పకొడఃజి డిఃసిసీదు, నాను వెప్పి సువార్త నమ్మిదు”, ఇజి యేసు వరిజ్ బోదిస్తాన్.

16 యేసు గలీలయ సమ్దరం ఒడ్డుదాన్ సొన్నిమహిజ్ సీమోనుజ్ని వన్నితంబెరసియాతి అంద్రెయెజ్ సుడఃతాన్ వారు సమ్దరమ్దు వల పొక్కి మొయేజ్ అసి మహార్. ఎందానిజ్ ఇహిజు వారు జాలెరిజు.

17 “నా వెట రదు. లోకాజ్ ఎలాగ నా సిసూర్ కిదెజ్ ఇజి నెస్సిస్తాలె”, ఇజి యేసు వరిజ్ వెప్తాన్.

18 వారు వెటనె వలేజ్డిఃసి వన్నివెట సొహార్.

19 యేసు కండెక్ దూరం నడిఃజి సొహిజ్ జెబెదెయ మరిసి యాకోబుని, యాకోబు తంబెర్ని యోహాను, వరిడోణిదు బసి వలేజ్ నెగెండ్ కిజి మహిక్ సుడఃతాన్.

20 యేసు వరిజ్ సుడఃతివెటనె కూక్తాన్. వారు అప్పొసిజ్, వన్నివెట కూడఃజి పణికినివరిజ్ డోణిదు డిఃసి యేసువెట సొహార్.

యేసు దెయమ్దిజ్ ఉల్ప్పినాన్

21 యేసుని వన్నిసిసూర్, కపెర్నహము ఇని పట్నమ్దు సొహార్. విస్తాంతిదినమ్దు యేసు యూదురి మీటిజ్ ఇండ్రొ సొహాండ్రే నేర్పిస్తిజ్ మొదోల్స్తాన్.

22 యేసు నెస్పిక్కిక విహారె లోకుర్ నండొ బమ్మ ఆతార్. ఎందానిజ్ ఇహిజు యూదురి రూలు నెస్పిస్పివరి తెకెండ్ ఆఎండ నండొ అతికారమ్దాన్ మన్ని వన్నులెకెండ్ నెస్పిస్తాన్.

23 నస్తివలె వరి మీటిజ్ ఇండ్రొ దెయం అస్తి మహికాన్ ఒరెన్ మహాన్.

24 వాండ్రు “నజరేతుదికి యేసు, మా వెట నిజి ఇని పణి? మా పణి విజు అడు కిదెజ్ వాతిదా? నీను ఎయెండ్రొ ఇజి నాను నెసిన్. నీను దేవుణు బాణిజ్ వాతి నెగ్గి వాండ్రు”, ఇజి డటం గగోలాజి వెప్తాన్.

25 అందెజె యేసు, “అల్లెజి మన్అ. విన్నిజ్ డిసి వెల్లి రఅ”, ఇజి ఆ దెయమ్దిజ్ కోపం దాన్ వెహ్తాన్.

26 అయవలె అయ దెయం అది అస్తిమహివన్నిజ్ దూక్సి డట్టం డెల్స్తాదె డిస్త సాహద్.

27 అబ్బె మనికార్ విజెరె ఇక సుడఃతారె నండో బమ్మ ఆతార్. “ఇక ఇనిక? వీండ్రు కొత్త సజతిజ్ నెర్పిసినాన్. దేవుణు సత్తు దాన్ అతికారమ్దాన్ వీండ్రు సోన్అ ఇజి దెయమ్కాజ్ వెహ్పినాన్. అవి డిసి సొస్సినె”, ఇజి ఒరెన్ వెట ఒరెన్ వర్గితార్.

28 వన్ని వందిజ్ మాటెజ్ అయా గలీలయ ప్రాంతం సుటుల విజు వెటనె సెద్రితె.

యేసు నండొండారిజ్ నెగెండొ కిజినాన్.

29 వారు మీటిజ్ కిని ఇండ్రొణాజ్ సొస్సి యాకోబు, యోహానువెట, కూడితారె సీమోను, అంద్రెయ ఇని వరి ఇండ్రొ సాహార్.

30 సీమోను మీమ్మి నోబు అస్త మహద్. వారు వెటనె దని వందిజ్ యేసు వెట వెహ్తార్.

31 యేసు దని డగ్రు వాజి కిదిజ్అసి దనిజ్నిక్తాన్. నస్తివలె నోబు డిస్తాద్. నోబు డిస్తిజ్ అది వరిజ్ ఉండెజ్ సితాద్.

32 పొద్దు సొహి ఆతివలె లోకుర్ నండొ నండొ రకమ్కాణిజ్ బాద ఆజి మహివరిజ్ దెయమ్కు అస్తివరిజ్ విజెరిజ్ యేసు డగ్రు తత్తార్.

33 పటనమ్దికార్ విజెరె ఆ ఇల్లు ముజుల్ కూడిత మహార్.

34 యేసు నండొ రకమ్కాణి జబ్బుమహి నండొండారిజ్ నెగెండొ కిత్తాన్. దెయం అస్తివరిబాణిజ్ వన్కాజ్ ఉల్ప్తాన్. వీండ్రు దేవుణు మరిసి ఇజి దెయమ్కు నెస్తి మహె అందెజె వాండ్రు వన్కాజ్ వర్గివీండొ కిత్తాన్.

యేసు గలీలయదు సొటిసినాన్

35 మర్న నాండిజ్ యేసు సీకటి మంబునె నిజ్జి పెందల ఎయెర్ సిల్లి ఉండ్రొబాడ్డిదు సొహండ్రె పార్దనం కిత్తాన్.

36 సీమోను, వన్ని వెట మహికార్, యేసుజెరెబాజి మహార్.

37-38 యేసుజ్ సుడఁతారె, “విజేరె నిజి రెబాజినార్”, ఇజి వెప్తిజ్ యేసు, “డగ్రు మని మరి పట్టమ్కాజ్బా సొనాట్. నాను అబెబా దేవుణు మాటెజ్ సాటిస్తెజ్వలె. దన్ని వందిజె నాను వాత మన్న”, ఇజి వెప్తోన్.

39 యేసు గలీలయ విజు బూలాజి యూదురు మీటిజ్ కిని ఇల్కాజ్ బోదిస్తాన్. దెయం అస్తి వరిబాణిజ్ వన్నాజ్ ఉల్ప్తాన్.

యేసుప కుస్తు రోగం ఆతివన్నిజ్ నెగెండ్ కిజినాన్.

40 ఒరెన్ కుస్తు రోగం మనికాన్ యేసు డగ్రు వాజి ముణుకుజ్ ఊర్బి, “నిజి ఇన్టం మహిజ నజి నెగెండ్ కిదెజ్ అట్ని”, ఇజి బతిమాలితాన్.

41 యేసు వన్ని ముస్కు కనికారం ఆజి కియు సాప్పి వన్నిజ్ ముట్టి, “నజి ఇన్టమ్నె, నీను నగెండ్ ఆఅ”, ఇజి వెప్తోన్.

42 వెటనె వన్నిజ్ మహి జబ్బు డిస్తాద్. వాండ్రు నెగెండ్ ఆతాన్.

43-44 అయవలె యేసు, “ఎయెవెటబా ఇనికబా వెహ్మ. నీను తినాజ్ సొన్ని నీ ఒణెల్ యూద పుజేరిజ్ తోరిన్అ. నీను నెగెండ్ ఆతి వందిజ్ మోసె ముజుల్ ఆడ్ర సితివజ దేవుణుదిజ్ సంత సిఅ” అహె నీను నెగెండ్ ఆతి ఇజి లోకురిజ్ తోరిన్అ”, ఇజి కసితం వెహ్ని పొక్తాన్.

45 గాని ఆ నెగెండ్ ఆతికాన్ సొన్ని వాండ్రు నెగెండ్ ఆతిక విజేరిజ్ మరి ఒద్దె వెప్తోన్. అహిజ్బా విజుబాణిజ్ నండో లోకుర్ యేసుబాన్ వాతార్.

2

యేసు కిక్కు కాల్కు అర్తివన్నిజ్ నగెండ్ కిజినాన్

1 నెగం రోస్కు ఆతి వెనుక యేసు మరి కపెర్నహముదు వాతాన్. వాండ్రు ఇండ్రొ వాతాన్ ఇని విజెరె వెహార్.

2 నండో లోకుర్బాన్ కూడిజి వాతార్. అన్తెజ్ అట్ఇ లోకుర్వతార్. అందెజె ఇల్లు లోఇబా అర్జుదుబా బాడ్డిః సిల్లెండ ఆతాద్, యేసు వరిజ్ దేవుణు మాటెజ్ బోదిస్తాన్.

3 కిక్కు కాల్కు అర్థి వన్నిజ్* నాల్వర్ పిండిత తతారె సెగొండార్ యేసుబాన్ వాతార్.

4 అబ్బె నండొ లోకుర్ మహిజ్ వన్నిజ్ యేసు డగ్గు ఒతెజ్ అట్వండ ఆతార్. అందెజె యేసు నిహిమహి జాగముస్కు మెడదిజ్ బొరొకితారె ఆ జబ్బు ఆతివన్నిజ్ సాపదాన్ యేసు నిల్నిమహిబాన్ డిప్తార్†.

5 వన్నిముస్కు మని వరి నమకం సుడఃతాండ్రె, యేసు జబ్బు ఆతివన్నివెట కూలయెజ్ నీ పాపమ్కు సెమి ఆతె మన్న”, ఇజి వెప్తాన్.

6 అబ్బె సెగొండార్ యూదురి రూలు నేర్పిస్సికార్ బస్త మహార్. వారు మనుస్సుదు.

7 వీండ్రు ఎందానిజ్ ఈహు వెహినాన్. వీండ్రు దేవుణువెట సమానం ఆతికాన్ ఇజి దేవుణుదిజ్ దూసినాన్. దేవుణు ఒరేండ్రె పాపమ్కు సెమిస్సికాన్ గదె”, ఇజి వారు ఒడిఃబితార్.

8 వారు ఈహు ఒడిఃబిజినిక యేసుజ్ వెటనె తెలితాద్. యేసు పరిజ్ వెప్తాన్, “ఎందానిజ్ మీరు మీ మనుస్సుదు అహ ఒడిఃబిజినిదెర్?

9 యా జబ్బుది వన్నిజ్ నీ పాపమ్కు సెమ ఆత మన్న ఇజి వెహిక్కు సులునా? నీను నిజ్జి సాప పెర్ణి నడిఃఅ ఇజి వెహిక్కు సులునా?

10-11 లోకు మరిసి ఆతి నజీ లోకురి పాపమ్కు సెమిస్సెజ్ బూమి ముస్కు అతికారం మనాద్. ఇజి మీరు నెస్సెజ్వలె ఇజి వెప్తాండ్రె కిక్కు కాల్కు అర్థి వన్నిజ్ “నాను నిజి వెహిన, నిజ్అ, నీ సాప అసి ఇండ్రొ సాన్అ”, ఇజి వెప్తాన్.

12 వెటనె ఆ కిక్కు కాల్కు అర్థికాన్ నిజ్జి వన్ని సాప అసి వారు విజేరె సుడఃజి మహిజ్ నడిఃజి సాహాన్. అక్కు సుడఃతారె వారు విజేరె బమ్మ ఆతార్. “నిన్ని పణి మాట్ ఎసెజ్బా తొవట్” ఇహారె దేవుణుదిజ్ స్తుతి కితార్.

పను పెర్నికాన్ లేవిజ్ యేసు కూక్కినాన్

* 2:3 2:3 పక్కువయువు ఇనిజబ్బుదాన్ నడిఃదెజ్ అట్నాన్ † 2:4 2:4 అయ దేసంతు మేడడెజ్ ఎలాగ తయారె కినార్ ఇహిజ పటిజ్ పహి దన్నిముస్కు డుల్లిదాన్ పణుకుజ్దాన్ మేడ పొక్కార్. మేడ ముస్కు ఎక్తెజ్ ఇహిజ పావన్నుజ్ మన్నె

13 యేసు మరి గలీలయ సమ్దరం గట్టుదు సాహాన్. లోకుర్ వన్ని డగ్రు వాతిజ్ వరిజ్ దేవుణు మాటెజ్ నెస్పిస్తాన్.

14 యేసు నడిఃజి సొన్ని మహిజ్ అల్పయ్ ఇని వన్ని మరిసి లేవిః ఇని పను పెర్నికాన్ ఒరెన్ వన్ని ఆపిసుదు బస్తమహిక సుడఃతాన్. యేసు వన్నిజ్ “నీను నా సిసుడు ఆఅ. నా వెట రఅ”, ఇజి వెప్తాన్. లేవి నిజిత్తాండ్రె యేసువెట సాహాన్.

15 వెనుక యేసు లేవి ఇండ్రె బోజెనమ్దిజ్ బస్తాన్. సెఇ పణి కినికార్ అబ్బె మహార్. పను పెర్నికార్ వారు యూదురు వెప్తా రూలు వజి నడిఃఇకార్. ఎస్సాండ్రొ లోకుర్ యేసువెట మహార్. వారుబా యేసు, వన్ని సిసూర్వెట బోజెనమ్దిజ్ బస్తాన్.

16 పరిసయ్దు లొఇ మన్ని యూదురి రూలుజ్ నెస్పిన్నికార్ వనిజ్ సుడఃజి “ఎందనిజ్ వీండ్రు పన్నుపెర్నివరివెటని పాపం కినివరివెట ఉణిజినాన్”, ఇజి సిసూరిజ్ వెన్బాతార్.

17 యేసు ఆ మాట వెంజి “నెగెండ్ సిల్లివరిజ్ డాక్టరు కావాలి. నెగెండ్ మన్నివరిజ్ ఎందానిజ్లు మరి డాక్టరు. నీతి నిజమాతి మన్నివరిజ్ అవద్. పాపం కితివరిజ్ కూక్కెజె నాను వాత మన్న, ఇహాన్.

ఉపాస్ వందిజ్ యేసుజ్ వెన్బాతార్

18 అయవలె బాప్తీసం సీని యోహాను సిసూర్ని, పరిసయ్దు, యూదురి రూలువజి ఉపాస్కిజి మహార్. సెగొండ్రార్ లోకుర్ వాజి యేసుజ్ వెన్బాతార్, “యోహాను సిసూర్ ఉపాస్కిజినార్, పరిసయ్ది సిసూర్ ఉపాస్కిజినార్, ఎందానిజ్ నీ సిసూర్ ఉపాస్కిఎర్?”.

19 యేసు ఈహు వెప్తాన్, “పెండ్లి కూలెజ్ పెండ్లిదజ్డఃవెట మన్నివెట ఉపాస్ మండ్రెజ్ అట్నారా? పెండ్లిదజ్డఃవరివెట మన్నివలె వారు ఉపాస్ మండ్రెజ్ అట్వీర్.

20 పెండ్లిదజ్డఃవరి వరి నడిఃమిహాన్ ఒని దినం వానాద్లె. అయ రోజు వారు ఉపాస్మంజినార్.

‡ 2:14 2:14 విన్నిజ్ మరి ఉండ్రె పేరు మత్తయి విన్ని పణి పన్నుపెర్నికాదె.

21 యేసు మరి వెహ్తాన్: “ఎయెర్బా పాడాయ్ పాతదు కొత్త ముక్కూ కూడేప్పి గుత్ ఏర్. ఆహె కితిజ అయకొత్త పాత ముక్క పడాయి పాతదిజ్ లాగ్నాదె బోరో ఒద్దె లావు ఆనాద్.

22 “ఎయెన్బా పడాయ్ తోలుసన్నిదు కొత్త ద్రాక్సకలు వాక్ ఏన్. అహె కితిజ కొత్త ద్రాక్సకలు పొజు వాజి అయ సన్ని పెడెల్ నాద్. ద్రాక్సకలు విజు వాజ్ న సొనాద్. సన్ని పాడునాద్. అందెజె కొత్త ద్రాక్సకలు కొత్త తోలు సన్నిదునె వాక్ జె”.

యేసు విజు వన్కాజ్ ముస్కు ప్రబు

23 ఉండీ విస్త్రాంతి దినమ్ దు యేసుని సిసూర్ పంట గుడ్డెదాన్ నడిసి సొన్ని మహార్. అయవలె సిసూర్ సెరేక్ తెప్పి మహార్.

24 పరిసయ్యరు అయక సుడేతారె, “ఇదిలో ఎందానిజ్ వారు విస్త్రాంతి దినమ్ దు రూలుదిజ్ తప్పినార్. ఇజి వన్నిజ్ వెహ్తార్.

25 అయవలె యేసు వెహ్తాన్, “దావీదురాజు, వన్నివెట మహి లోకుర్ బజ కట్టిజ్ వాండ్రు ఇనిక కిత్తాండ్రో ఇజి మీరు ఎసెజ్ బా సద్ విఇదెరా?

26 అబ్రాతారు ఇనికాన్. విజెరె పుజెరిజ ముస్కు పెరి పుజెరి మహివలె దావీదురాజు సమాజ గుడారమ్ దు డుగితాండ్రె, దేవుణు ఎద్రు ఇడ్డి రొట్టెజ్ లాగితాండ్రె తిహాన్. అక్క పుజెరి తప మరి ఎయరర్బా తిండ్రెజ్ ఆవిద్ గాని తిహాండ్రె వన్నివెట మహివరిజ్ బా సిత్తాన్.

27 వెనుక యేసు వరిజ్ వెహ్తాన్, “ముజుల్ దేవుణు లోకుదిజ్ విస్త్రాంతి దినం ఏర్పాటు కిత్తాన్. గాని విస్త్రాంతి దినమ్ వందిజ్ లోకుదిజ్ ఏర్పాటు కివన్.

28 లోకుమరిసి ఆతి పిట్టి నజి విజు వన్కాజ్ ముస్కు అతికారం మనాద్. మరి, విస్త్రాంతి దినమ్ దు ఇనిక కిదెజ్ ఇజి లోకాజ్ వెహ్తాజ్ బా అతికారం మనాద్.

3

యేసు కియు అర్తివన్నిజ్ నెగెండ కిజినాన్

1 మరి యేసు యూదురి మీటిజ్ ఇండ్రో సాహాన్. అబె ఉండ్రీ కియు అర్థికాన్ ఒరెన్ మహాన్.

2 అబ్బె మహికార్ సెగొండార్ యేసు యా జబ్బుదివన్నిజ్ విస్త్రాంతిదినమ్దు నెగెండ్రో కినాండ్రో ఇజి బాగ సుడిజి మహార్. ఎండనిజ్ ఇహిజ విస్త్రాంతిదినమ్దు ఇని పణిబా కిదెజ్ ఆవిద్ కాక యేసుజ్ ఇని దన్నిజ్బా తప్ప మొప్పైజ్ ఇజి సుడిజి మహార్.

3 యేసు కియు అర్థివన్నిజ్, “విజేరి ముజాల వాజి నిల్అ”, ఇజి వెహ్హాన్.

4 నస్తివలె యేసు, “దేవుణు మోసెజ్ సితి రూలువజ విస్త్రాంతి దినమ్దు నెగ్గి పణి కిదెజా, సెఇ పణి కిదెజా? పాణం అర్పైజ్నా? ఇజి వరిజ్ వెన్బాతాన్. గాని వారు అలెతార్.

5 వరి మన్ను గర్తాజిమహిజ్ యేసు నండో దుకం ఆతాన్. కోపం దాన్వరిజ్ సుడెతాన్. అయ కియు అర్థివన్నివెట, “నీ కియు నవ్అ”, ఇజి వెహ్హాన్. వాండ్రు కియు సాప్తిజ్ ఆ కియు నెగెణ్ ఆతాద్.

6 నస్తివలె పరిసయ్యరు వెల్లి సాహి వెటనె హెలోది ఇని వరివెట కూడెజి యేసుజ్ ఎలాగ్నపైజ్ ఇజి ఆలోసనం కితార్.

యేసువెట మంద లోకుర్ సొన్నినార్

7 అందెజె యేసు వన్ని సిసూర్వెట గలీలయ సమ్దరంబాన్ సాహాన్. మందలోకుర్ గలీలయదాన్ వరివెనుక సాహాన్.

8 యేసు కిత్తి గొప్ప పణిజ వెంజి యూదయ దేసెమ్దు మన్ని విజు నాహ్కాణికార్, యెరూసలేందాన్, సమ్దరం పడకాద్ తూరు సీదోసు ఇని పట్నుమి ప్రాంతమ్కాజ్ వాతి నండో లోకుర్ వన్నిబాన్ వాతార్.

9 నండో లోకుర్ వాజి మహిజ్ నిల్పిమండ్రెజ్ ఇహాకు ఆజి దన్ని మున్ను ఆవండ మండ్రెజ్ ఉండ్రీ ఇజ్జి డోణి తసి బానె ఇడదు ఇజి సిసూర్ వెట యేసు వెహ్హాన్.

10 ఎందానిజ్ ఇహిజ నండ్రెండ్రెజ్ యేసు నెగెణ్కితాన్. అందెజె జబ్బు ఆతిమహికార్ విజేరి యేసుజ్ ముట్టజ్ ఇజి నెక్కె ఆజి సాహాన్.

11 దెయం అస్తికార్ యేసుజ్ సుడఃతివెటనె వన్ని ముజూల్ ముణుకుజ్ ఊర్జి, పడగ్జి మాడిఃస్తారె “నీను దేవుణు మరిసి”, ఇజి గగోలాతార్.

12 “నాను ఎయెన్ ఇజి ఎయేర్వెట వెహ్యట్”, ఇజి యేసు వరివెట కసితం ఆడ్ర సిత్తాన్.

యేసు పన్నెండు మణిసిరిజ్ అపొస్తురువజి ఏర్పాటు కిజినాన్.

13 వెనుక యేసు ఉండ్రీ గొరోత్ ఎక్సి సాహండ్రె వన్నివెట ఒతెజ్ వాండ్రు కోరితివరిజ్ వన్ని డగ్రు కూక్తాన్. వారు వన్నిబాన్ సాహార్.

14 యేసు పన్నెండు మణిసిరిజ్ వన్నిబాన్ మండ్రెజ్ ఇజి, దేవుణు మాట విజేరిజ్ వెహ్పివందిజ్ పోక్తెజ్ ఇజి ఏర్పాటు కిత్తాన్. (విరిజె అపొస్తురు ఇజి కూక్తాన్)

15 దెయమ్కాజ్ ఉల్ఫైజ్ అతికారం వరిజ్ సితాన్.

16-19 యా పన్నెండు మణిసిరి ఎయెర్ ఎయెర్ ఇహిజి సీమోసు (యేసు వన్నిజ్ పేతురు ఇని పేరు సితాన్) జెబెదయ మరిసిర్ యాకోబు, వన్ని తంబెర్సి యోహాను ఇనికార్ (యేసు వరిజ్ బొయనగ్రసున్ ఇని పేరు సితాన్. దన్ని అర్దం ఇనిక ఇహిజి దీడఃజనికార్ ఇజి) అంద్రెయ, పిలిప్ప, బర్దొలోమయ, మత్తయి, తోమా, అల్ఫయ మరిసి యాకోబు, తద్దయి, యుదయ దేసెంపందిజ్ ఉసారాజిని సీమోసు*, యేసుజ్ యూదురు అతికారిజి కీదు ఒపజెప్పికానాతి ఇస్కరియోతు యూద.

యేసు బయల్జెబ్బులు ఇని దెయం సాయందాన్ దెయమ్కాజ్ ఉల్ఫినాన్ ఇహార్.

20 యేసు ఉండ్రీ ఇండ్రొ వాతిజ్ మరి నండ్రో లోకుర్ అబ్బె కూడిఃతార్. అందెజె యేసుజ్ని సిసూరిజ్, బోజనం కిదెజ్బా కాలి సిల్లెతాద్.

21 యేసు ఇండ్రొణికార్ యా సజతి విహారె వన్నిజ్ మత్తి సెద్రితాద్ ఇజి వెహ్పి వన్నిజ్ అస్తెజ్ సాహార్.

* **3:16-19 3:16-19** రోమాది ఏలుబడిఃదాన్ యూదురు దేసెమ్దిజ్ విడుదల కిదెజ్ ఉసార్దాన్ సుడఃజని యూదురు సజం మనాద్. అయా సజమదికాన్ ఒరిన్ సీమోసు

22 యెరూసలేమ్‌దాన్ వాతి యూదురి రూలుజ్ నెస్పిస్సికార్ వెహ్టార్, “దెయమ్‌కాజ్ నెయ్‌కి ఆతి బయల్‌జెబ్బులు† విన్నిజ్ అస్తాన్. వన్ని సత్తుదాన్ వీండ్రు దెయమ్‌కాజ్ పేర్‌జినాన్”, ఇజి వెహ్టార్.

23 నస్తివలె యేసు వరిజ్ కూక్కి వరిజ్ అర్థమాదెజ్ కత వజ ఈహు వెహ్టాన్, “సయ్యాన్ సయ్‌తానుజ్ ఎలాగ ఉల్‌ప్పాన్.

24 ఉండ్రి దేసమ్‌దికార్ వరిజ్ వారె జటిజాజి ఎర్‌లిజి మహిజ అయ దేసెం పాడాఃనాద్.

25 ఉండ్రి ఇండ్రోణికార్ వరిజ్ వారె జటిజాజి ఎర్‌లిజి మహిజ ఆ కుటం పాడాఃనాద్.

26 సయ్యాన్ వన్ని గుంపుదు మన్నివరివెట జటిజాజి కేట ఆతిజ నండ్రో కాలం వరిముస్కు ఏలుబడిః కిదెజ్ అట్‌వన్.

27 ఒరెన్ సత్తుమన్ని వన్నిజ్ ముజాల తోహావండ, ఎయెర్‌బా వన్ని ఇండ్రో డుఃగ్‌జి సామనమ్‌కు ఒత్తెజ్ అట్‌వర్. ముజాల వన్నిజ్ తోహ్వాజానె డోజ కిదెజ్ అట్వార్‡.

28 నాను నిజం వెహ్సిన, లోకుర్ కినివిజు పాపమ్‌కాజ్‌ని, దూసిసిని మాటెజ్ దేవుణు సెమిస్సాన్.

29 గాని దేవుణు ఆత్మదిజ్ దూసిస్తిజి వన్ని పాపం ఎసెజ్‌బా సెమిస్‌వన్. వన్ని పాపం ఎలా కాలం మంజినాద్”.

30 యేసు ఈహు ఎందానిజ్ వెహ్టాన్ ఇహిజ సయ్యాన్ సాయమ్‌దాన్ యేసు దెయమ్‌కాజ్ ఉల్‌ప్పినాన్ ఇజి యూదురి రూలుజ్ నెస్పిస్సికార్ వెహ్టార్.

యేసు అయ్‌సి తంబెర్‌సిర్

31 యేసు అయ్‌సిని తంబెర్‌సిర్ వాండ్రు మన్ని ఇల్లుముజాల్ వాతారె యేసుజ్ కూక్కి తగ్‌అ ఇజి ఒరెన్‌వన్నిజ్ ఇండ్రో పోక్తార్.

32 అయ ఇండ్రో యేసు సురుల నండ్రో లోకుర్ బస్త మహార్. వారు వెహ్టార్, “నీ యాయ తంబెర్‌సిర్ వెల్లి నిహారె నిజి కూక్కినార్”.

† 3:22 3:22 యాక సయ్యానుజ్ మరి ఉండ్రి పేరు ‡ 3:27 3:27 సత్తుమన్నికాన్ ఇజి యేసు సయ్యాన్ వందిజ్ వెహ్సినాన్. సయ్యాన్ ముస్కు యేసుజ్ సత్తు మనాద్ ఇజి వెహ్సినాన్.

33-34 దనిజ్ యేసు, “నా యాయ? నా తంబెర్సిర్ ఎయెర్ ఇజి నాను వెహ్నా”. అబ్బె సురుల బన్తిమనివరిజ్ సుడఃజి యేసు వెహ్నాన్, “ఇదిలో నా యాయని, నా తంబెర్సిర్”.

35 “ఎందనిజ్ ఇహిజ దేవుణుదిజ్ ఇన్ఘమాతివజ కినికాండ్రె నా తంబెరి, నా తజి, నా యాయ ఇజి వెహ్నాన్.

4

విత్కు విత్తివన్ని కత

1 యేసు మరి ఒర్కు గలీలయ సమ్దరం పడఃకాదు నెస్పిన్జెజ్ మొదోల్స్తాన్. మందలోకుర్ వన్ని డగ్రు వాతిజ్ సమ్దరమ్దు ఉండ్రె డోణిదు ఎక్కి బస్తాన్. లోకుర్ విజెరె సమ్దరం పడఃకాదు నిహార్.

2 అయవలె వాండ్రు నండొ సజతిజ కతవజ వరిజ్ నెస్పిస్తాన్. వాండ్రు ఉండ్రె సజతి కత వజ ఈహు వెహ్నాన్.

3 సుడఃదు, ఒరెన్ రయ్దు వాండ్రు విత్కు విత్తెజ్ సాహాన్.

4 వాండ్రు విత్తి మహిజ్ సెగం విత్కు సరి పడఃకాదు అర్తె. ఆ పొటిజ్ వనకాజ్ పెహ్తా తిహె.

5-6 మరి సెగం విత్కు సటు ముస్కు లావ్ డుల్లి సిల్లిబాన్ అర్తె. డుల్లి లావు సిల్లితిజ్ అవి వెటనె నేర్తెగాని వెల లొఇ సాన్ఇజ్ పొద్దు సాసి ఎండ తాక్తివలె అవి సాతె సాహె.

7 మరి సెగం విత్కు సాప్పు తుపెజ్ లొఇ అర్తె. సాప్పు తుప్పెజ్ పిరిజి వనకాజ్ తిగితె. అందెజె పంట పండవితాద్.

8 మరి సెగం నెగ్గి బూమిదు అర్తె. అక్కెజ్ నేర్జి పిరితెనె విత్తి విత్కుదిజ్ ముప్పయ్ వంతుజ్ లెక్క పండితె.

9 యేసు మరి వెహ్నాన్, “గిబ్బిజ్ ఒడఃజి వెంజి అయవజ నడఃజి మండ్రు”.

10 యేసు ఒరెండ్రె మహిజ్ పన్నెండు మణిసిర్ సిసూర్ని మరి సెగొండార్, “నీను కత వజ నెస్పిన్జి మాటెజ అర్థం ఇనిక?”, ఇజి వన్నిజ్ వెన్బాతార్.

11-12 అందెజె యేసు, “దేవుణు కిని ఏలుబడిః వందిజ్ డాజితిమహి గొప్ప సజతిజ్ దేవుణు మిజి తెలివి కిత్త మనాన్. గాని మహివరిజ్ విజుబా కతవజ నెన్పిస్తెజ్ ఎందానిజ్ కతవజ వెప్తా ఇహిజ “వారు నుడిఃనార్ గాని తొవర్. వెండ్రెజ్ ఇహిజ వెంజినార్ గాని అర్దం కిదెజ్ అట్వర్. ఎందానిజ్ ఇహిజ వారు అర్దం కిజి వరి పాపమ్కు సెమిస్నాన్*” ఇహాన్.

13 యేసు వరివెట వెప్తాన్, “రయ్యువన్ని వందిజ్ నాను కతవజ వెప్తాక మిజి అర్దం ఆవదా? అహిజ నాను కతవజ వెప్తాకెజ్ విజు మిజి ఎలాగ తెలినాన్?”

14 విత్కికాన్ దేవుణు మాట వెప్పికాన్.

15 సెగొండార్ విత్కు అర్తి సరి పడఃకనన్నికార్. వారు వెహివెటనె సర్తూన్ వాజి ఆ మాటెజ్ లాగ్లి ఒసినాన్.

16 మరి సెగొండార్ విత్కు అర్తి సటుపణుకు మున్కు మన్ని ఇస్కా నన్నికార్. వారు దేవుణుమాట వెహివెటనె సర్దదాన్ మన్కుదు ఇడ్నార్.

17 గానివెల లొఇ సొన్ఇలెకెండ్ దేవుణుమాట వరి మన్కు లొఇ సొన్వద్. వారు కండెక్ కాలం నమ్మిజి మంజినార్. దేవుణుమాట నమ్మితి వందిజ్ కస్టమ్కు మాలెజ్, వానెవెలె దేవుణు మున్కు మన్ని వరి నమకం వెటనె డిస్ససినార్.

18-19 మరి సెగొండార్ విత్కు అర్తి సాప్పు తుపెజ్ నేర్పి బూమివజ మనార్. గాని ఎలాగ బత్కిదెజ్ ఇని వందిజ్ మన్ని విసారం, డబ్బు గణిసిని వందిజ్ మన్ని ఆస విజు కూడిజి వారు దేవుణుదిజ్ నమ్మిండ్ కిదెజ్ వారు వెహి మాటదిజ్ అణసు తిగ్జినె. పంట పండెండ్ ఆతిలెకెండ్ వారుబా ఆజినార్.

20 సెగొండార్ అర్తి విత్కునెగ్గి బూమిదువజ మనార్. వారు దేవుణుమాట వెంజి అర్దం కిజి దేవుణు మున్కు నమకం ఇడ్నార్. నెగ్గి బూమిదు అర్తి విత్కు బస్తెణిదిజ్ ముప్పుయ్ బస్తెజ్ అర్వయ్ బస్తెజ్ వంద బస్తెజ్ పండ్పివజ వారు మంజినార్.”

* 4:11-12 4:11-12 యెసయ 6:9,10.

దీవ జాయ్ సీనివజ కంతుద్ ఇడ్డెజ్

21 యేసు వరివెట ఈహు వెహ్లాన్, “దీవ కసిసి అబల మూక్కినో మన్సం అడిఃగినో ఎయెరుబా ఇడ్వీర్. జాయ్ సీనివజ దీవ కంతుదు ఇడ్వార్.

22 ఎందానిజ్ ఇహిజ ఏలు డాఃజీతి మన్నికెజ్ విజు ఒర్పెండ్ తోరె ఆనె.

23 మీరు గిబ్బిజ్ ఒడ్ఃజి వెంజి అయావజ నడిఃజి మండ్లు”.

24 యేసు మరి వెహ్లాన్, “మీరు వెహిక జాగర్త అర్దం కిదెజ్వలె. మీరు నెగ్రిండ అర్దం కిజిమహిజ, దేవుణు వన్ని మాటెజ్ అర్దం కిబిస్నాన్లె. ఒబ మరి ఒద్దె అర్దం కిబిస్నాన్లె.

25 నాబాణిజ్ వెంజి అర్దం కిజినివన్నిజ్ దేవుణు మరి తెలివి కినాన్. గాని వెంజి అర్దం కిఇవన్నిబాణిజ్ వాండ్రు అర్దం కిత్తి మన్నికెజ్బా లాగ్నాన్”.

నెర్జి పిరిసినె విత్కువందిజ్ కత

26 యేసు మరి వెహ్లాన్, “దేవుణు ఏలుబడిః ఈహు మనాద్. ఒరెన్ రయ్యు వాండ్రు విత్కు బూమిదు విత్సినాన్.

27 వాండ్రు రెయ్మాజ్నిద్ర కిజి పెందల నిజ్జి మంజినాన్. వన్నిజ్ తెలివండ ఆ విత్కు నేర్జి పిరిసినె.

28 ముజాల ఆకు, దన్ని వెనుక సెరెన్, దన్ని వెనుక సెరెన్దు గింజ ఇక విజు బూమినె పుటిసినాద్.

29 పంట పండ్రాద్. కొయ్నికాలం వాతిజ్ వాండ్రు కొడుఃవేలి అసి కొయ్జినాన్”.

సర్కుగింజ వందిజ్ కత

30 మరి యేసు ఈహు వెహ్లాన్, “దేవుణు వన్నిలోకురిజ్ కినిఏలుబడిః ఇని దనివెట పోలిస్సెజ్ ఆనాద్? మాటు ఎమేణి కతవజ అయాక నెస్పిస్సెజ్ అట్నాట్?

31 అయాక సర్కు గింజదిజ్ పొలిత మనాద్. అక్క బూమిదు విత్తివలె లోకమ్దు మన్ని విజు విత్కాజ్ లోఇ ఇజిరికాద్.

32 అహిజ్బా అక్క వితివలె నేర్జి పిరిసి విజు కుస మొక్కెజలోఇ పెరిక ఆనాద్. దన్ని కొమెజ్ పెరికెజ్ ఆనె. ఆగసమ్దు ఎగ్రిజిని పొటిజ్ వాజి దన్ని నీడఃదు గూడుక్ తొప్పినె”.

33 వారు అర్దం కిదెజ్ అట్టి నసా దేవుణు మాటెజ్ ముజుల్ వెప్తి లెకెండ్ కత వజి యేసు నండొ వెప్టాన్.

34 కత వజి ఆవెండ యేసు వరిజ్ ఇనికబా నెస్పిస్ ఏత్తాన్. అహిజి యేసు వన్ని సినూర్ వెట ఒరెండ్రె మహివలె విజు వన్కాజ్ అర్దం కిజి వెప్టాన్.

యేసు తుపాన్దిజ్ నిల్ప్పినాన్

35 ఆ ఘొదొయ్ నమ్దరం అతాహ పడక సొనాట్ ఇజి యేసు సినూర్ వెట వెప్టాన్.

36 లోకాజ్ డిసి యేసు మహి డోణిదు ఎక్కి సినూరు వన్నిజ్ ఒతార్. మరి సెగం డోణిజ్బా వరి వెట మహా.

37 వారు సొన్ని మహిజ్ పెరి తుపాన్ వాతాద్. ఉల్కెణ్ విజు డోణిదు డెయ్తె ఏరుడోణిదు నిండ్రె.

38 యేసు డోణి వెనుకపడక బుర్రగడిః ముస్కు నిద్ర కిజి మహాన్. సినూరు వన్నిజ్ నిక్కి, “బోదకినికి, మాటు విజు ముడఃగిజినాట్. నిజి విసారం సెలెదా?”, ఇజి వన్నిజ్ వెప్టార్.

39 యేసు నిజ్జి గాలిదిజ్ ఉల్కెజి, పల్లక్ ఆదు ఇజి వెప్టాన్ పెరి గాలి అణస్తాద్ విజు అలెతాద్.

40 నస్తవలె వాండ్రు, “మీరు ఎందనిజ్ తియెల్ ఆజినిదెర్? మిజి నా ముస్కు నమకం సెలెదా?”, ఇజి సినూర్ వెట వెప్టాన్.

41 వారు గొప్ప తియెలాతారె, “వీండ్రు ఎలాగ మప్తికాండ్రొ గాని, గాలి నమ్దరమ్బా విన్ని మాటదిజ్ లొజెత్తె”, ఇజి ఒరెన్ వెట మరి ఒరెన్ వర్రితార్.

5

యేసు దెయం అస్తిమహివన్నిజ్ నెగెణ్ కిజినాన్

1 యేసుని సినుర్ సమ్దరం అతాహ పడక గెరసేను ఇని లోకురి ప్రాంతమ్దు వాతార్.

2 యేసు డోణి డిఃగితి వెటనె దెయం అస్తికాన్ ఒరెన్ దూకిజాణ్ ఎద్రు వాతాన్.

3 వాండ్రు దూకిజాణిజ్ బత్తిజి మహాన్* వన్నిజ్ గొల్కుదాన్బా తొవ్హెజ్ ఎయెర్బా అట్వర్.

4 నండొ సుట్కు వన్ని కాల్యాజ్ కిక్కాజ్ గొల్స్కాణిజ్ తొవ్హెజ్బా వాండ్రు గొల్స్కు తెప్పి ముక్కెజ్ కిత్తాన్. ఎయెరుబా వన్నిజ్ సాదిసైజ్ అట్వితార్.

5 వాండ్రు రెయుబా వెడెకబా దూకిజాణ్ గొరొకాణ్ గగోలాజి వన్నిజ్ వాండ్రె పణుకుజాణ్ డెయె ఆజి మహాన్.

6 వాండ్రు దూరమ్దాన్ యేసుజ్ సుడెతాండ్రె ఉహ్కీవాజి ముణుకుజ్ ఊర్జి మాడిస్తాన్.

7 విజు దన్నిజ్ అతికారం ఆతి దేవుణు మరిసియాతి, యేసువా, నా వెట నిజి ఇని పణి? నజి బాద కివ ఇజి దేవుణు పేరు అని నీను ఒట్టు కిత”, ఇజి డేల్లి వెహ్హాన్.

8 ఎందానిజ్ ఇహిజి యేసు, ఓ దెయం, విన్నిజ్ డిఃసి వెల్లి సొన్అ”, ఇజి వెప్పి మహాన్.

9 యేసు, “నీ పేరు ఇనిక? ఇజి వెన్బాతాన్. వెన్బాతిజ్, నా పేరు సేన, ఇహిజి మాపు నండొండార్ ఇజి వెహ్హాన్.

10 మజి యా దేసెమ్దాన్ ఉల్పు ఇజి దెయం అస్తికాన్ యేసుజ్ మరి మరి బతిమాలితాన్.

11 అయావలె పండ్రెజ్ మంద గొరొన్ సెల్కుదు మెయ్జి మహె.

12 ఆ దెయమ్కు, మజి పండ్రెజి లొఇబా పొక్అ. వనకలొఇ సొండ్రెజ్ మజి సెలవ సిదా”, ఇజి యేసుజ్ బతిమాలితె.

13 అందెజె వాండ్రు వన్కాజ్ సెలవ సిత్రాన్ అయావలె దెయమ్కు వన్నిజ్ డిఃసినె పండ్రెజిలొఇ సొహె. అయపండ్రెజ్ మంద విజు

* **5:3 5:3** అయ దేసమ్దికార్, సట్టుబొరొకిజి సాలమ్లెకెండె తయార్ కిజి సాతివరిజ్ నమాది కిజి మహార్. పీసుగు సాలమ్లొఇ ఇడ్డి పణకుదాన్ సాలమ్దిజ్ మూసి మహార్. యా దెయం అస్తిమహికాన్ బానె మహాన్.

గొరొతాన్ ఉహ్ కి వాజి ఒడ్డుదాన్ సమ్ దరమ్ దు అర్తినె సాతె. అక్కెజ్ డగ్గు రుండి వెయిజ్ పండ్రిజ్ మహె.

14 పండ్రిజ్ మేప్పికార్ ఉహ్ కి సొన్ని పట్టుమ్ ది వరిజ్ పట్టుమ్ ది వల్ సెజ మన్ని వరిజ్ జర్గితిక్కెజ్ వెహ్ తార్. లోకుర్ జర్గితిక నుడెదెజ్ సొహ్ తార్.

15 వారు యేసు డగ్గు వాతిజ్ నండొ దెయమ్ కు అస్తిమహికాన్ సొక్కెజ్ తొడిగిజి నెగ్గి బుదిదాన్ అబ్బెబస్తిమహిక నుడెతార్. నుడెతారె తియెలతార్.

16 యాక నుడెతికార్ దెయమ్ కు అస్తివన్నిజ్ ఇనిక జర్గితాద్, పండ్రిజ ఇనిక జర్గితాద్ ఇజి విజు లోకాజ్ వెహ్ తార్.

17 అయవలె లోకుర్ యేసుజ్, “మా ప్రాంతం డిసి సొన్ అ”, ఇజి బతిమాలితార్.

18 యేసు డొణి ఎక్కిజ్ దెయమ్ కు అస్తిమహికాన్ వన్ని డగ్గు వాతాండ్రె, నీ వెట నానుబా వాన ఇజి బతిమాలితాన్.

19 గానియేసు సరి సివితాన్, నీను ఇండ్రొ సొన్ని ప్రబు నీ వందిజ్ కిత్తి గొప్ప పణివందిజ్ వాండ్రు నీ మున్కు ఎలాగ కనికారం తోరిస్తాన్ ఇనివందిజ్ వరిజ్ వెహ్ అ ఇజి వెహ్ తాన్.

20 వాండ్రు సొహ్ తాండ్రె యేసు వన్ని వందిజ్ కిత్తి గొప్ప పణిదెకపొలీదు వెహ్ తాజ్ మొదొల్స్తాన్. అక్క వెంజి విజేరె బమ్మ ఆతార్.

యేసు సాతి అయ్ లిజ్ నిక్కినాన్, జబ్బు ఆతిమహి అయ్ లికోడొడిదిజ్ నెగెండొ కిజినాన్

21 యేసు డొణిదు ఎక్కి సమ్ దరం అతాహ పడక మరి సొహ్ తాన్. నస్తివలె నండొ లోకుర్ వన్ని డగ్గు వాతార్. యేసు సమ్ దరం ఒడ్డుదు నిహ మహాన్.

22-23 నస్తివలె ఉండ్రె యూదురి మీటిజ్ ఇండ్రొణి అతికారి యాయారు ఇని ఒరెన్ బానె వాతాన్. వాండ్రు యేసు డగ్గు వాజి వన్ని పాదమ్ కాజ్ మాడిస్తాండ్రె, నా ఇజ్జి గాలు సాజినాద్, దయకిజి నీను వాజి అది బత్రిని వజ దని మున్కు కిక్కు ఇడెజి నెగెన్ కిఅ, ఇజి బతిమాలితాన్.

24 యేసు వన్నివెట సాహాన్. సేన లోకుర్ నెక్కె ఆజి యేసువెట సాహార్.

25 వరిలోఇ ఉండ్రె అయ్లి కొడొః మహాద్. అది పన్నెండు పండెజాణ్ వెల్లి ఆని జబ్బుదాన్ బాద ఆజి మహాద్.

26 అది సేన డాక్టరుజాబాన్ నెగెణ్ అదెజ్ సాహద్ గాని ఆ జబ్బు సాన్ ఏతాద్. అకాదె అవిండ దనిజ్ మని డబ్బు విజు కర్పు అతిజ్ బా ఆ జబ్బు సాన్ ఏండ మరి నండొ ఆతాద్.

27-28 అది యేసు వందజ్ వెహా మహాద్. యేసు అయ సరిదాన్ వాజినాన్ ఇజి వెంజి యేసు తొడిగితి మన్ని నిర్రి సొక్క† నెంగుదు ముట్టిజసరి నెగెణ్ ఆన ఇజి ఒండెబితాద్. అది లోకుర్ వెట సొన్ని యేసు వెనుక వాతాదె వన్ని నీరిసొక్కది నెంగుదిజ్ ముట్టాద్.

29 వెటనె వెల్లి సొనిక నిహాద్. దనిజ్ మహి జబ్బు డిస్తాద్ ఇజి అది నెస్తాద్.

30 వన్నిలోఇహాన్ దేవుణు సత్తు వెల్లి సాహద్ ఇజి యేసుజ్ తెలితాద్. వెటనె వాండ్లు లోకురిజ్ మర్జి సుండెజి, ఎయెర్ నా సొక్కదు ముట్టాన్? ఇజి వెన్ బాతాన్.

31 దన్ని సిసూర్, సేన లోకుర్ నెకె ఆజి నిజి ముట్టినార్ గదె. ఆహె అతిజ్ బా నజి ఎయెరో ముట్టార్ ఇజి ఎందనిజ్ వెప్పిని? ఇజి యేసుజ్ వెహార్.

32 నజి ముట్టికాన్ ఎయెండ్రొ ఇజి వరివందిజ్ యేసు సురుల సుండెజి మహాన్.

33 అయవలె అయ బోదెలి అది నెగెణ్ ఆతిక నెసి నండ్రొ తియెల్ ఆజి వన్నిపాదమ్ కుజ్ మూడికుజ్ ఊర్జి వజితాద్. దన్నిజ్ జర్రితిక విజు వెహాద్.

34 యేసు దనిజ్, బయి నీను నా ముస్సు నమకం ఇడ్డి అందెజె నీను నెగెణ్ ఆతి. సమదనమ్ ధాన్ సాన్ అ. నీను నెగెండ్రొ ఆతి ఇహాన్.

35 యేసు వర్రిజి మహిజ్ యాయారు ఇండ్రొణిజ్ నెగెండ్రొ వాజి, నీ గాలు సాతాద్. బోదకిని వన్నిజ్ యేలు బాద కిదెజ్ అక్కర్ సిల్లెద్ ఇజి

† 5:27-28 5:27-28 అయ కాలమ్దు అయ దేసమ్ది మొగవారు నీరి సొక్క తొడిగిజి మహార్. దన్ని అడిగి మాముల్ సొక్కని బెల్లు తొడిగిజి మహార్

యాయారుజ్ వెహ్తాన్.

36 వారు వెహ్తాక వెన్ ఇవజ యేసు అయ అతికారిజ్, తియెల్ అమ, నా ముస్కు నమకం ఉండ్రె ఇడఃఅ ఇజి వెహ్తాన్.

37 యేసు పేతురు, యాకోబు, యాకోబు తంబెర్చి యోహాను మరి ఎయెజ్ బా వన్నివెట ఒవితాన్.

38 వారు యూదురి మీటిజ్ ఇల్లు ఆతికారి ఇండ్రొ సాహార్. అయావలె అబ్బె లోకుర్ గగోలాజి అడఃబాజి మహిక నుడఃతార్.

39 యేసు ఇలు లోఇ సొన్ని వరిజ్ వెహ్తాన్, మీరు ఎందనిజ్ గగోలాజి అడఃబాజినిదెర్? యా ఇజికాద్ సావీద్ ఇది నిద్ర కిజినాద్.

40 వారు యేసుజ్ వెక్రసి సికితార్. యేసు అడఃబాజి మహి లోకాజ్ విజేరిజ్ వెల్లి పోక్తాన్. వెల్లి పోక్సి, అయ్ సి అపోసిరిజ్, వన్నివెట మహి సిసూరిజ్ అసి యేసు ఆ ఇజికాద్ మహి గదిదు సాహాన్.

41 ఆ ఇజిదన్నిజ్ కీదు అస్తాండ్రె, తలీత కుమి ఇజి వెహ్తాన్. అయ మాటదిజ్ అర్థం ఇనిక ఇహిజ ఇజి అయ్ లి నిజ్ అ ఇజి నాను నీ వెట వెహ్తాన ఇజి,

42 అయ్ లి వెటనె నిజ్ జి నడిఃతాద్. దనిజ్ పన్నెండు పండెజ్ వయసు. అబ్బె జర్గితిక నుడఃతారె అయ్ సి అపోసీరు, సిసూరు బమ్మ ఆతార్.

43 జర్గితిక ఎయెజ్ బా వెహ్తాట్ ఇజి యేసు వరిజ్ కనితం ఆడ్ర సితాన్. దన్నిజ్ బోజనం సీదు ఇజి అయ్ సి అపోసిరిజ్ వెహ్తాన్.

6

యేసుజ్ సొంతనాటో గవరం సివతార్

1 యేసు అబ్బెణాన్ వన్ని సొంత పట్టుమాతి నజరేతు సాహాన్. సిసూరబా వన్ని వెట సాహార్.

2-3 విస్తాంతి దినమ్ దు వాండ్రు యూదురి మీటిజ్ ఇండ్రొ నేర్పిస్తెజ్ మొదొల్స్తాన్. అక్కు వెహికార్ నండొండార్ బమ్మ ఆజి, వీండ్రు ఎమేణిజ్ నెస్తాన్? విన్నిజ్ నిన్ని గెణం ఎమేణిజ్ దొహ్కాద్? వీండ్రు బమ్మాని పణిజ్ కిజినాన్. వీండ్రు మాపు నెసిని కంసెల్ వాండ్రు గదె. వీండ్రు

మరియమ్మ మరిసిగదె. యాకోబు, యోసె, యూద, సీమోను, విని తంబెర్నిర్ గదె. విన్ని తజిసిక్ మా వెట మన్నెగదె. ఇజి వెప్తార్. వారు వన్నిముస్సు కోపమాజి మహార్.

4 దన్నిజ్ యేసు ఇనిక ఇజి వెప్తార్ ఇహిజ, ఒరెన్ ప్రవక్తజ్ సొంత పట్నమ్దు, సొంత ఇండ్రొ, సొంత కుటుమ్దివరిబాన్ గవరం సిల్లెద్. మరి ఎంబె సొహిజ్బా వన్నిజ్ గవరం మనాద్.

5 సెగొండార్ జబ్బు ఆతివరిజ్ కియుదాన్ ముట్టి నెగెణ్ కిత్తాన్ గాని అబ్బె నండొ బమ్మాతి పణికిదెజ్ యేసు అట్వితాన్.

6 వన్ని ముస్సు వరిజ్ నమకం సిల్లిదిజ్ వాండ్రు బమ్మ ఆతాన్. యేసు నురుల మన్ని నాహ్కజ్ బూలాజి నేర్పిస్తాన్.

యేసు పన్నెండు మణిసిర్ సిసూరిజ్ పొక్కినాన్

7 యేసు పన్నెండు మణిసిర్ సిసూరిజ్ వన్ని డగ్రు కూక్తాండ్రె రిఎరిజ్ రిఎరిజ్ పొక్తాన్. వరిజ్ దెయమ్కాజ్ పేర్దెజ్ అతికారం సిత్తాన్.

8-9 మీరు ప్రయనం కినివెలె కియుదు ఉండ్రె డుడ్డునె ఒత్తెజ్. బోజనం గాని సన్ని గాని డబ్బు గాని ఒత్తెజ్ ఆవద్. సొండ్రెజ్ కాల్యాజ్ జోడ్కు ఒత్తగాని, పొర్పాదెజ్ రుండి సొక్కెజ్ ఒమాట్”, ఇజి యేసు వెప్తాన్.

10 మీరు ఎయె ఇండ్రొ సొనిదెరొ, అయ పట్టుం డిస్సిదాక బానె మండ్రు.

11 ఎంబెబా మిజి లోకుర్ డగ్రు కివండ మహిజ మీ మాట వెండ్రెజ్ కెఇతిజ, అబ్బెణిజ్ మీరు డిసి సొనివెలె మీ పాదమ్క డుల్లి దులుప్పు. వరిముస్సు వారె దేవుణుబాణిజ్ సిక్కి తప్పె ఆజినార్ ఇన్నిదన్నిజ్ గుర్తులెకెండ ఆహె డుల్లి దులుప్పు”.

12 సిసూర్సొన్ని లోకాజ్, పాపమ్కు డిస్సు ఇజి బోదిస్తార్.

13 లోకురిజ్ అస్తి నండొ దెయమ్కాజ్ పేర్జి, జబ్బు ఆతి నండొండారిజ్ నూనె రాసి నెగెండొ కిత్తార్.

బాప్తీసం సీని యోహానుజ్ రాజు సప్తాన్

14 యేసు పేరు విజుబాన్ సార్త సాహాద్. అందెజె యేసు కిత్తి గొప్ప పణిజవందిజ్ హేరోదురాజు వెహాన్. సెగొండార్ ఇనిక వెహ్టార్ ఇహిజ “వీండ్రు సాతివరిబాణిజ్ మర్జి నిజీతి బాప్తినం సీని యెహాను అందెజె యా బమ్మాతి పణిజ్ కిదెజ్ సత్తు వన్నిలోఇ మంజినాద్” ఇహార్.

15 సెగొండార్ వీండ్రు ఏలియ ప్రవక్త ఇహార్. మరి సెగొండార్ వీండ్రు ముజల్ మహి దేవుణు ప్రవక్తలోఇ ఒరెన్ ప్రవక్త వజ మనాన్ ఇజి వెహ్టార్.

16 హేరోదురాజు యాక విజు వెంజి నాను బుర డెయిస్తి యెహాను నిజ్జి బత్తితికాండె యేసు ఇజి వెహ్టాన్.

17-18 హేరోదురాజు ఎందానిజ్ ఈహు వెహ్టాన్ ఇహిజ, వాండ్రు వన్ని తంబెర్సియాతి పిలిపు ఆల్సి హేరోదియెజ్ తహాన్. యెహాను హేరోదుజ్, నీ తంబెర్సి ఆల్సిజ్ నీవందిజ్ ఇడె ఆతిక దేవుణు మోసెజ్ సిత్తి రూలుదిజ్ పడివద్ ఇజి వెహ్టాన్. అందెజె దన్ని వందిజ్ వాండ్రు యెహానుజ్ అసి తొహ్తాండె జెలిదు ఇడిస్తాన్.

19 అందెజె హేరోదియ యెహాను ముస్సు పగదాన్ మహాద్. వన్నిజ్ సపిస్సెజ్ సుడెతాద్ గాని అట్ఏతాద్.

20 ఎందానిజ్ ఇహిజ హేరోదు యెహానుజ్ తియెలాతాన్. వాండ్రు ఒరెన్ నీతి నిజాయితి మన్నికాన్ ఇజి దేవుణు కేటాకాన్ ఇజి, హేరోదు రాజు నెస్తాన్. అందెజె జెలిదు ఇడ్డి కాపాడజి మహాన్. యెహాను వెహ్టా మాటెజ్ వెహివలె హేరోదురాజు అర్దం కిదెజ్ అట్ఏతాన్ గాని సర్దదాన్ వెంజి మహాన్.

21 అహిజ యెహానుజ్ సపిస్సెజ్ హేరోదియెజ్ ఉండ్రీ అవ్కాసం వాతాద్. అక్క ఎలాగ ఇహిజ హేరోదురాజు వాండ్రు పుట్టిరోజు గుర్తు కిదెజ్ అయానాండిజ్ ఉండ్రీ పెరి విందు కితాన్. వాండ్రు గవ్మెంటు అదికారిజ, సయ్యమ్ది వరిలోఇ పెరి అతికారి గలీలయ దేసెమ్ది పెద్దెల్జ విజేరిజ్ విందుదిజ్ కూక్తాన్.

22-23 నస్సివలె హేరోదియ గాల్సి విందుదిజ్ వాతి వరిజ్ సర్ద కిబిస్సెజ్ వరి ముజాల డాట్టి కర్జితాద్. అక్క సుడితారె విజేరె సర్ద

ఆతార్. నర్ద ఆతిజ్ హేరోదురాజు, నిజి ఇస్టమాతిక ఇనికబా నజీ లోన్అ, అక్క నాను నిజీ సీన, ఇజి దనివెట ఒట్టు కితాన్.

24 అది సొన్ని అయ్సివెట, నాను రాజుజ్ ఇనిక లొస్తజ్ ఇజి వెన్బాతాన్. అయ్సి, బాప్తినం సీని యోహాను బుర లొన్అ ఇజి వెహ్లాద్.

25 వెటనె అది రాజు డగ్రు సొన్ని బాప్తినం సీని యోహాను బుర కత్తి ఉండ్రీ పల్లెమ్దు ఇడేజి ఏలె నజీ తసీనదా ఇజి వెహ్లాద్.

26 అక్క వెహండ్రె హేరోదురాజు గొప్ప బాద ఆతాన్ గాని, వాండ్రు కిత్తి ఒట్టువందిజ్ వన్నివెట బోజనమ్దిజ్ బస్తిమహి కులెజి వందిజ్ దన్నివెట కిత్తి మాట తప్పజ్ కెవతాన్, ఇజి వెహ్లాజ్ అట్ఏతాన్.

27-28 వెటనె రాజు యోహాను బుర కత్తి తగ్అ ఇజి జమానుజ్ ఆడ్ర సీజి పోక్తాన్. జమాను జెలిదు సొన్ని యోహాను బుర కతాండ్రె ఉండ్రీ పల్లెమ్దు ఇడేజి తత్తాండ్రె అయ్లిదిజ్ సిత్తాన్. అది ఆ బుర అయ్సిజ్ సిత్తాద్.

29 జర్గితిక వెంజి యోహాను సిసూర్ వాజి ఆ పీనుగుదిజ్ వెర్జి ఒసి సమాది కిత్తార్.

యేసు అయ్దు వెయిజ్మణిసిరిజ్ బోజనం సీజినాన్

30 అపొస్తురు మర్జివాతాజి వారు కిత్తి పణిజ్ విజు, బోదిస్తి వన్కాజ్వందిజ్ విజు యేసుజ్ వెహ్లాద్.

31 నస్తివలె యేసు “ఎయెరు సిల్లిబాన్ మాటె సొన్ని నణెం రోమ్నాట్, ఇజి సిసూర్వెట వెహ్లాన్. ఎందానిజ్ ఇహిజి నండో లోకుర్ వాదెజ్ సాండ్రెజ్ ఆతార్. బోజనం కిదెజ్బా కాళి సిల్లెండ ఆతాద్.

32 అందెజె వారు ఉండ్రీ డోణి ఎక్కి ఎయెర్బా మన్ఇ బాడ్డిదు వారె సాహార్.

33 యేసుని, సిసూర్ సొన్నిమహిజ్ నండో లోకుర్వరిజ్ సుడేతారె వరిజ్గుర్తు అసి విజు పట్టుమ్కాణ్ ఉహ్కీ వరిజ్ ఇంక ముజాల బాన్ సాహారె అందితార్.

34 యేసు డోణిదాన్ డిగితివలె మహి నండో లోకాజ్సుడేజి వన్ని పాణం నొత్తాద్. ఎందానిజ్ ఇహిజి వారు గవ్డుయెన్ సిల్లి సెద్రితి

గొర్రెజ్లెకెండ్ మహార్. అందెజె యేసు వరిజ్ నండొ నజతిజ్ నెస్పిస్తాన్.

35-36 యేసు నెర్పిసి మహిజ్ పొద్దుఆజి మహాద్. సిసూర్ వన్నిడగు వాజి యాక ఎయెరు మన్ఇ బాడ్డి. ఏలె పొద్దు ఆజినాద్. పడకాద్ మన్నినాహ్కాజ్ వల్సెజి సొన్ని బోజనం కొండెజ్ విరిజ్ పొకఅ. ఇహార్.

37 గాని యేసు సిసూరిజ్ మీరె వరిజ్ తిండ్రెజ్ ఇనికబా సీదు”, ఇజి వెప్తాన్. దన్నిజ్ వారు మాపు సొన్ని రుండి వంద దెనారిదిజ్* రొట్టెజ్ కొండెజి తత్తెజ్బా నిస్సా లోకురిజ్ సాల్ఏద్ ఇజి వెప్తాన్.

38 మీబాన్ ఎస్సాడు రొట్టెజ్ మన్నె? సొన్ని నుండెదు”, ఇజి యేసు సిసూరిజ్ వెప్తాన్. వారు సొన్ని నుండెతారె అయ్దు రొట్టెజ్ రుండి మొయెజ్ మన్నె ఇజి వెప్తాన్.

39 విజేరిజ్ పసిగడ్డి మన్నిబాన్ గుంపుజ్లెకెండ్ బసెకిదు ఇజి యేసు సిసూరిజ్ వెప్తాన్.

40 లోకుర్ యాపయ్ మనిసిర్, గుంపుజ్ వంద మనిసిర్ గుంపుజ్ బస్తాన్.

41 అయవలె యేసు అయ్దు రొట్టెజ్, రుండి మొయెజ్ ఆసి, ఆగనం దరోట్ నుండెజి వనకవందిజ్ దేవుణుదిజ్ వందనమ్కు వెప్తాన్. వెప్తాండ్రె రొట్టెజ్ రుక్కి లోకురిజ్ సీబాజి సీదు ఇజి వెప్పా సిసూర్జ్ సిత్తాన్. అయ మొయెజ్బా విజేరిజ్ సీబాజి సీదు ఇజి సిత్తాన్.

42 వారు విజేరె పొట పంజు తిహార్.

43 మిగిలిత్తి రొట్టె ముక్కెజ్, మరి మొయెజ్ ముక్కెజ్ పన్నెండు గంపెజ్ సిసూర్ కెప్తాన్.

44 రొట్టెజ్ తిహికార్ మొగవారె అయ్దువెయిజ్ లోకుర్ మహార్.

యేసు సమ్దరం మున్ను నడిజినాన్

* **6:37 6:37** రోమది వరి కాలమ్దు మన్నిడబ్బు ఇక్క అయకాలమ్దు ఉండ్రె దినారి ఉండ్రె రోజుది కూలి.

45 యేసు లోకాజ్ పోక్కి వెనుక వెటనె సిసూరిజ్ డోణిదు ఎకిసి అతాహపడఃక బేత్సయిద ఇని నాటొ వన్నిజ్ ఇంక ముజుల్ సొండ్రు ఇజి వెహ్ని పోక్తాన్.

46 వరిజ్ పోక్కి యేసు పార్దనం కిదెజ్ గొరొత్ ఒరెండ్రె మహాన్.

47 పొద్దు ఆతివలె డోణి సమ్దరం నడిఃమి మహాద్, యేసు గొరొత్ ఒరెండ్రె మహాన్.

48 గాలి ఎద్దు డెయ్లిజ్ డోణి నడఃపిస్తెజ్ సిసూరిజ్ గొప్ప కస్టం ఆత్తాద్. అక్క యేసు సుడఃతాన్. కోడిజం ఆజిమహిజ్ యేసు సమ్దరం మున్కు నడిఃజి వాతాండ్రె సిసూర్మన్ని డోణి డాట్టిసొండ్రెజ్ నడిఃసి వాతాన్.

49 యేసు సమ్దరం మున్కు నడిఃజినిక సిసూర్సుడఃతారె అక ఉండ్రె దూబ ఇజి ఒడిఃబితార్. వారు డటం గగోల్ ఆతార్.

50 అక్క దూబను ఇజి వారు నండొ తియెలాతార్. వెటనె యేసు వరివెట, “సమ్దరమ్దాన్ మండ్రు ఇక్క నానె తియెలామ”, ఇజి వరిజ్ వెహ్నాన్.

51 నస్తవలె యేసు వరివెట డోణిదు ఎక్తాన్. గాలి విజు అణస్తాద్. వారు నండొ బమ్మ ఆతార్.

52 యేసు అయ్దు రొట్టెజ్ రుండి మొయెజాణ్ అయ్దువెయిజ్ లోకాజ్ బోజనం సిత్తిక సుడఃతిజ్బ యేసు కిత్తి అయా బమ్మాతి పణివందిజ్ అర్దం కివితార్. ఎందానిజ్ ఇహిజు వరి మన్కు గట్టిజ్ మహాద్.

యేసు గెనేసెరెతు ఇనిబాన్ లోకాజ్ నెగెండ్రె కిజినాన్

53 వారు సమ్దరం డాట్టి గెనేసెరెతు ఇనిబాన్ వాతారె డోణి అబ్బె తొహ్నార్.

54 వారు డోణి డిఃగితిజ్ సరి లోకుర్ యేసుజ్ గుర్తు అస్తార్.

55 వెటనె ఆ దేసిమ్ది నాహ్మణికార్ విజేరె సొన్ని జబ్బు ఆతివరిజ్ యేసు మనాన్ ఇజి వెహి బాడిఃదు సాపాదు పిండ్లి తత్తెజ్ మొదొ ల్స్తార్.

56 యేసు నాహూజ్ పట్నమ్కాజ్ ఎంబె సొహిజ్బా లోకుర్ జబ్బు ఆతివరిజ్ యేసు వాని సర్దు తత్త ఇడ్డతార్. యా జబ్బుఆతికార్ నీ సొక్క సెంగుదుబా ముట్టజ్ సెల్వ సిదా ఇజి బతిమాలజి యేసుజ్ మరి మరి వెప్టార్. ఎస్సాండార్ వన్ని సొక్కదిజ్ ముట్టతారొ వారు విజేరె నెగెండ ఆతార్.

7

యూదపెదెలుజా రూలుజ్ దేవుణు రూలుదిజ్తేడః వాతాద్

1-2 యెరూసలేమ్దాన్ వాతి పరిసయరుని, యూదురి రూలు నెస్సిసినికార్ సెంగొండార్ యేసుబాన్ కూడఃజి వాతార్. యేసు సిసూర్ యూదురుజ రూలుదు వెప్టాలెకెండ కిక్కు నొరబవిండ బోజనం ఉణిజి మహిక వారు అబ్బె సుడఃతార్. అక్క పరిసయరు నుడిఃతిజ తప్ప.

3 పరిసయరు, యూదురు, విజేరె, పూర్బమ్దికార్ వెప్టారూలు వజ కిక్కు నొరబాతి వెన్కనె ఉణార.

4 వారు సత్తదాన్ వాతిజ, రూలువజ ఏరు లొంజె ఆవిండ ఇనికబా ఉణివర్. ఇక్కాదె ఆవిండ గిన్నెజ్ కుండెజ్ మరి కంసు బిందెజ్ ఎలాగ మిడిఃసెజ్ ఇజి నండొ రూలుజ్ వరిజ్ మన్నె. ఆ రూలుజ్వజ వారు కిజినార్.

5 అందెజె పరిసయరుని, యూదుర్ రూలుజ్ నెన్పిసినికార్, “ఎందానిజ్ నీ సిసూర్ పూర్బమ్దికార్ వెప్టా రూలువజ నడిఃవిండాజినార్ ఎందానిజ్ వారు కిక్కు నొరబవిండ బోజనం కిజినార్”, ఇజి యేసుజ్ వెన్బాతార్.

6-7 యేసు వరిజ్, “వేసం కినికారాతి మీ వందిజ్ యెసయ ప్రవక్త ఎప్టాక నిజమె. యా లోకుర్ నజి వెయుదాన్ గవరం సీజినార్ గాని వరి మన్ను నాబాణిజ్ దూరం మనాద్. వారు నజి పొగ్డిఃజి మాడిఃసినార్ గాని అక్క పణిదిజ్ రెవిద్. ఎందానిజ్ ఇహిజ వారు లోకుర్ వెప్టా రూలు దేవుణు మాట ఇజి లోకాజ్ నెస్సిసినికార్*.

8 దేవుణు వెప్టా రూలు డిఃసిసీజి, మీరు పూర్బమ్దికార్ వెప్టా రూలువజ నడిఃజినిదెర్”, ఇజి వెప్టాన్.

* 7:6-7 7:6-7 యెసయ 29:13

9 యేసు వరిజ్ మరి వెహ్లాన్, “పూర్బమ్దికార్ వెహ్లావజ నడిదెజ్, ఇజి దేవుణు ఆడ్రెజ్ పడకాదు నెక్తెజ్ మిజి బాగ తెలినాద్.

10 ఎలాగ ఇహిజ మీ యాయ బుబ్బరిజ్ గవరం సీజి బాగ సుడ్దెజ్ ఇజి యాయెజ్ గాని బుబ్బెజ్ గాని దూసిస్తిజి వన్నిజ్ సప్తెజ్ ఇజి దేవుణు మోసెజ్ సీత్తి రూలు మనాద్.

11-12 గాని ఒరెన్ వన్ని అయ్సి అపొసిరిజ్, నాను మిజి ఇనికబా ఉండ్రీ సాయమ్లెకెండ కిన ఇజి ఇడ్డిమన్నిక కొర్బాన్ ఇజి వెహ్లాజి నాండిజ్ అసి వాండ్రు అయ్సి అపొసిరిజ్ ఇనికబా సాయం కిదెజ్ అవసరం సిల్లెద్ ఇజి మీరు నెన్పిసినిదెర్. (కొర్బాన్ ఇహిజ దేవుణుదిజ్ సీన ఇజి ఒట్టు కినిక ఇజి అర్దం)

13 ఈహు మీ పూర్బమ్దికార్ వెహ్లావజ నడిజి మీరు దేవుణు వెహ్లా రూలుదిజి విలువ సిల్లెండ కిజినిదెర్. నిన్ని నజతిజ్ నండొ మీరు కిజినిదెర్”.

14 యేసు లోకాజ్ మరి వన్నిడగ్రు కూక్తాండ్రె “నాను వెహ్లానిక మీరు విజిదెరె జాగర్తవెంజి నెగెండ అరదం కిదు.

15-16 వెయుదాన్ లొఇ సొనికెజ్ ఇనికబా లోకాజ్ మయ్లు కిదెజ్ అట్వద్. గాని మన్ను లొఇహాన్ వెల్లి వానికదె లోకాజ్ సెవ్ణి కిజినాద్”.

17 యేసు లోకాజ్ డిసి ఇండ్రొ వాతివెనుక వన్ని సిసూర్, కతవజ వెహ్లా దన్నిజ్ అర్దం వెన్బాతార్.

18-19 యేసు వరిజ్ ఈహు వెహ్లాన్ “మీరుబా ఆఇవరిలెకెండ అర్దం కిదెజ్ ఆట్ఇదెరా? వెల్లిహాన్ పొటలొఇ సొని ఇని బోజనమ్బా లోకాజ్ మయ్లు కివద్. ఎండనిజ్ ఇహిజి అక్క మన్నుదు సొన్విండ వన్ని పొటాదునె సొన్నినాద్. అక్క పొటాదాన్ బయ్లు బన్నివలె వెల్లి సొన్నినాద్. ఇజి మీరు నెన్పినిదెర్”. (ఇబ్బె సుడెతి ఇని బోజనమ్బా ఉండెజ్ ఆనాద్ ఇజి యేసు సెలవ సిత్తాన్)

20 మరి యేసు వెహ్లాన్, ఒరెన్ వన్ని మన్నులొఇహాన్ వెల్లి వానికదె వన్నిజ్ మయ్లు కిజినాద్.

21-22 మన్నులోఇహాన్ వానిక ఇనికెజ్ ఇహిజ, సెఇ ఆలోననమ్కు, కెలార్బూలానిక, లోకాజ్ సప్పికెజ్, రంకు బూలానిక, ఆఇవరిజ్ మన్నికెజ్ దోహ్కెజ్ ఇజి ఆస, సెఇ వణి కినిక, మొసెం కినిక, మన్నుదు అనసె ఆజి మండ్రెజ్ అట్ఇక, గోస దూసిసినిక, నానె పెరికాన్ ఇజి గర్త ఆనిక, అర్దం కిఇ మన్ను మన్నిక.

23 యాక్కెజ్ విజు లోకుర్ మన్నులోఇహాన్ వెల్లి వాజి ఒరెన్ వన్నిజ్ మయ్య కిసె.

ఉండ్రీ కనానియది అయ్లి కొడొః యేసు మున్ను ఇడ్రి నమకం

24 యేసు అబెణిజ్ నండొ దూరం సొన్ని ఉండ్రీ గొరొన్ ఎక్కి డిఃగితాండ్రె తూరు సీదోసు ఇని పట్నమ్కాజ్ డగ్రు మన్ని ముటెజ సొహాన్. బానెఉండ్రీ ఇండ్రొ సొన్ని ఎయెజ్బా తెలివండ మంజిస ఇజి మన్నుదు ఒడఃబితాన్. గాని వాండ్రు అట్వితాన్.

25-26 యూదురు ఆఇ జాతిదు పుట్టి సురోపెకొనియదికాద్ ఉండ్రీ అయ్లి కొడొః యేసు అబ్బె మనాన్ ఇజి వెంజి వెటనె అబ్బె వాతాదె యేసు పాదమ్కాజ్ అర్తాదె మాడిఃస్తాద్. దన్ని గాల్పిజ్ దెయం అస్త మహాద్. “నా గాలుజ్ అస్తిమన్ని దెయమ్దిజ్ ఉల్వ్అ”, ఇజి యేసుజ్ బతిమాలితాద్.

27 దన్నిజ్ యేసు, “ముజాల్ కొడొఃరిజ్ పొట పంజు బోజనం తీప్పిస్తెజ్. కొడొఃర్ తిండ్రెజ్ మన్ని రొట్టెజ్ లాగ్జి నుకుడిఃజ్ సీనిక తగ్వద్”, ఇజి వెహ్తాన్†.

28 అది, “ప్రబు, నీను వెహ్తాక నిజమె. గాని నుకుడిఃజ్బా కొడొఃర్ ఉణిజి బల్ల అడిఃగి అర్పిక ఉణిజినె గదె ఇజి వెహ్తాద్.

29 యేసు, నీను బాగ వెహ్తా. నీను ఇండ్రొ సొన్అ. ఆ దెయం నీ గాలుజ్ డిఃస్త సొహాద్ ఇహాన్.

30 అది ఇండ్రొ సొన్ని సుడఃతిజ్ గాల్పి మన్నం మున్ను గూర్త మహాద్. దెయెం దనిజ్ డిఃస్త సొహాద్.

† 7:27 7:27 యేసు వెహ్తా దన్ని అరదం ఇనిక ఇహిజ ముజాల వన్నిసాంత లోకురాతి యూదురిజ్ వాండ్రు నెగెండ్ కిదెజ్వలె వరిజ్ వానికెజ్ ఆఇవరిజ్ సీదెజ్ ఆవద్ ఇజి

యేసు బోయ్లర నతి ఆతివన్నిజ్ నెగెండ్ కిజినాన్

31 యేసు తూరు ప్రాంతం డిసి, సీదోసు, దెకపొలి ప్రాంతమ్దాన్ గలీలయ సమ్దరం డగ్రు వాతాన్.

32 నస్తవలె బోయ్లర నతియాతి ఒరెన్వన్నిజ్ సెగొండార్ యేసుబాన్ తత్తార్. “విన్ని ముస్సు కియు ఇడఃజి నెగెండ్ కిఅ”, ఇజి బతిమాల్జి వెప్తార్.

33 యేసు లోకుర్బాణిజ్ వన్నిజ్ అజి ఒసి, డెస్కెజ్ వన్ని గిబ్బిదు ఇడ్తాన్. వన్ని సొంత డెస్కెజ్దు పూస్తాండ్రె గుల్ల వన్నిజ్ నాలికాదు ముట్టాన్.

34 ముట్టాండ్రె ఆగసం దరోట్ దేవుణుదిజ్ సుడఃజి ఉసుర్ గొటాండ్రె బాదఆజి ఎపాత ఇజి వెప్తాన్. దని అర్థం ఇనిక ఇహిజ రే ఆదెజ్ ఇజి.

35 వెటనె వన్నిగిబ్బిజ్ వెండ్రెజ్, వన్ని నాలిక వర్గిదెజ్ వాతాద్. వాండ్రు బాగ వర్గిదెజ్ మొదొల్స్తాన్.

36 “ఎయెవెట వెహ్లాట్”, ఇజి యేసువరిజ్ కసితం వెప్తాన్. నా వందిజ్ వెహ్లాట్ ఇజి నండొ వెప్తాజ్బా అలెవిండ వారు యేసువందిజ్ మరి నండొ వెప్తార్.

37 యేసు విజు బాగ కిత్తాన్. బోయ్లరవన్నిజ్బా వెనివజ, గుల్లవన్నిజ్బా వర్గినివజ కిజినాన్ ఇజి వారు వెప్తారె బమ్మ ఆతార్.

8

యేసునాల్లివెయిజ్ మణిసిరిజ్ బోజనం సీజినాన్.

1-2 ఆ దినమ్కాజ్ మరి ఒర్సు నండొ లోకుర్ కూడ్డి వాతార్. వరిజ్ ఉండెజ్ బోజనం ఇనికబా సిలిజ్ యేసు వన్ని సిసూర్జి కూక్తాండ్రె వెప్తాన్, నజి యా లోకుర్ నావెట వాజి మూండ్రె రోస్సు ఆతె. వరిజ్ తిండ్రెజ్ ఇనికబా సిల్లెద్. అందెజె విరి వందిజ్ నా పాణం నోజన.

3 విరిజ్ నాను బోజనం సివిండ ఇల్కాజ్ పొక్తిజి కణుకు తర్వజి సర్దు అర్పార్. ఎందనిజ్ ఇహిజ పరిలోఇ సెగొండార్ నండొ దూరమ్దాన్ వాత మనార్”, ఇజి వెప్తాన్.

4 అయవలె వన్ని సిసూర్ వెహ్టోర్, బిడిఃమ్బూమిదు విరిజ్విజేరిజ్ బోజనం సిదెజ్ ఎమేణిజ్ తత్తెజ్?

5 మీ బాన్ఎసోడు రొట్టెజ్ మన్నె? ఇజి యేసు సిసూరిజ్ వెన్బాతాన్. మా బాన్ఎడు మన్నె ఇజి సిసూర్ వెహ్టోర్.

6 అయవలె యేసు లోకాజ్ బూమిదు బస్తు ఇజి వెహ్టోన్. ఆ ఏడు రొట్టెజ్అసి దేవుణుదిజ్ వందనమ్కు కితాండ్రె. వన్యాజ్ రుక్కి లోకాజ్ సీబాజి సిదెజ్ సిసూరిజ్ సిత్తాన్. వారు లోకాజ్ సీబాజి సిత్తాన్.

7 వరిబాన్ సెగం ఇజ్రి మొయెజ్బా మహె. యేసు వన్యాజ్బా వందనమ్కు వెప్పి సీబాజి సీదు ఇజి సిసూరిజ్ సిత్తాన్.

8 లోకుర్ విజెరె పొట పంజు తిహర్. వెనుక సిసూర్ మిగ్గితి రొట్టె ముక్కెజ్ ఏడుః గపెజ్ కెహ్టోర్.

9-10 డగ్రు నాల్లి వెయిజ్లోకుర్ అబ్బె మహర్. లోకాజ్ విజేరిజ్ పొక్కి యేసు సిసూర్వెట ఉండ్రె డోణి ఎక్తాండ్రె దల్మనుత ఇని ప్రాంతం సోహాన్.

11 సెగొండార్ పరిసయరు వాతారె యేసువెట తర్కిస్తెజ్ మొదొల్స్తార్. దేవుణునె వన్నిజ్ పోక్తాన్ ఇనిదన్నిజ్ రుజుప్లెకెండ్రె ఆగనమ్దాన్ ఉండ్రె బమ్మాతి పణికిజి మజి తోరిన్అ ఇజి వెహ్టోర్.

12 యేసు మన్నుదు గొప్ప బాదఆజి ఉసుర్కొటాండ్రె యా లోకుర్ ఎండనిజ్ బమ్మ ఆని పణి తోరిన్అ ఇజి వెప్పినార్. యా లోకాజ్ గుర్తులెకెండ్రె ఇని బమ్మమాని పణిబా దేవుణు తోరిన్ఎన్ నిజమెఇజి వెహ్టోన్.

13 నస్తవలె యేసు వరిజ్ డిఃస్తాండ్రె డోణి ఎక్కి నమ్దరం డాట్టి అతాహ పడక సోహాన్.

యేసు పరిసయరువందిజ్ హేరోదువందిజ్ వెప్పినాన్

14 అహిజి సిసూర్ రొట్టెజ్ తత్తెజ్ పోస్తార్. వరిబాన్ డోణిదు ఉండ్రె రొట్టె మహద్.

15 యేసు సిసూరిజ్ వెహ్టోన్. పరిసయురుది పులాజ్ కిని దూరు*

* **8:15 8:15** హేరోదురాజు కితి తప్ప పణిజ్ని పరిసయరు నెప్పిస్తె తప్ప బోదెజ్ పులాజ్ దూరు పులాజ్ కినిలెకెండ్రె లోకాజ్ సెఇక కిజినాద్ ఇజి యేసు వెప్పినాన్.

వందిజ్, మరి హేరోదురాజుది పులాజ్ దూరు వందిజ్ మీరు జాగర్త మండ్రు.

16 మాటు రొట్టెజ్తెఇతిజ్ యేసు ఈహు వెప్పినాన్, ఇజి వారు ఒరెన్వెట బరెన్ వర్గితార్.

17 వారు వెహ్సినిక యేసు నెసి ఎందానిజ్ మీరు రొట్టెజ్ సిల్లితివందిజ్ వర్గిజనిదెర్? ఏలుబా అర్లం కిజి నెస్తెజ్ అట్ఇదెరా? మీ మన్ను గట్టి ఆత మనాదా?

18 మిజి కణుకు మంజిబ తోఇదెరా? గిబిజ్మంజిబా వెన్ఇదెరా? ఇనికబా ఒడఃబిఇదెరా?

19 అయ్దు రొట్టెజ్ ముక్కెజ్ కిజి అయ్దు వెయిజ్ లోకాజ్ సీబాతి సిత్తిజ్ మిగ్గితిక్కెజ్ ఎసాడుః గంపెజ్ మీరు కెహ్తాదెర్? ఇజి యేసు సిసూరిజ్ వెన్బాతాన్. అందెజె సిసూర్ పన్నెండ్ గంపెజ్ కెహ్తావ్ ఇహార్.

20 యేసు మరి వెన్బాతాన్, ఏడు రొట్టె ముక్కెజ్ కిజి నాల్లి వెయిజ్ లోకాజ్ సీతి వెనుక మిగ్గితికెజ్ ఎసాడు గంపెజ్ కెహ్తాదెర్? ఏడు గంపెజ్ ఇజి వారు వెహ్తార్.

21 యేసు సిసూరిజ్ వెహ్తాన్, మీరు ఏలుబా నాను కితి బమ్మాతి పణిజ వందిజ్ అర్లం కిదెజ్ నెన్ఇదెరా?

యేసు బేత్సెయ్య పట్నమ్దు ఒరెన్ గుడ్డివన్నిజ్ నెగెండ్ కిజినాన్

22 యేసుని, వన్ని సిసూర్ బేత్సెయ్య ఇని నాటో వాతార్. అయవలె సెగొండార్ ఒరెన్ గుడిఃవన్నిజ్ యేసుబాన్ తత్తార్. యేసు, నీను విన్నిజ్ ముట్అ”, ఇజి వాండ్రు నెగెండ్ ఆనివందిజ్ బతిమాలితార్.

23 యేసు అయ గుడిఃవన్నిజ్ కీదు అస్తాండె నారు డాటిసీ ఒత్తాన్. అయ గుడివన్ని కణుకాజ్ వూసి డెస్కెజాణ్ ముట్టి “నిజి ఇనికబా తోర్జినాదా”, ఇజి వెన్బాతాన్.

24 వాండ్రు కణుకు పెర్జి, సెడిఃబా తోర్జినాద్, గాని లోకు మరెక్ నడిఃజిని వజ తోర్జినాద్ ఇజి వెహ్తాన్.

25 మరి ఒర్పు యేసు వన్ని కణుకెజి ముట్టాన్. నస్తివలె వన్ని కణుకు నెగెండ్ ఆతిజ్ విజు నెగెండ్ సుడఃతాన్.

26 యేసు వన్నిజ్ బేత్సెయ్దు మర్జి సొన్మా ఇజి వెహ్ని వన్ని ఇంత్రో పోక్తాన్.

యేసు ఎయెన్ ఇజి పేతురు వెహ్నినాన్

27 యేసుని, వన్ని సిసూర్ పిలిపుది ఆతి కయ్సరయ పట్టుమ్దిజ్ డగ్రు మన్ని నాహ్కజ్ పయ్నం కిజి మహార్. సొన్ని మహిజ్ సర్దు యేసు వరిజ్ వెన్బాతాన్, నాను ఎయెన్? ఇజి లోకుర్ వర్రిజినార్?

28 దన్నిజ్ సిసూర్, సెగొండార్ నీను బాప్తినం సీని యోహాను ఇజినార్. మరి సెగొండార్ నీను పూర్బమ్దాన్మహి ఏలియ ప్రవక్త ఇజినార్. మరి సెగొండార్ నీను పూర్బమ్దుమహి ప్రవక్తలోఇ ఒరెన్ ఇజి వెహ్నినార్, ఇహార్.

29 ఆహిజి మీరు నజీ ఎయెన్ ఇజి వెహ్నినిదెర్? ఇజి యేసు సిసూరిజ్ వెన్బాతాన్. నస్తవలె పేతురు, నీను క్రీస్తు ఇహిజి దేవుణు ఏర్పాటు కితిపోక్తాన్”, ఇజి వెహ్నాన్.

30 యాక ఎయెర్వెటబా వెహ్నాట్ ఇజి కసితంవరిజ్ ఆడ్ర సిత్తాన్.

యేసు వన్ని సాపువందిజ్ వెహ్నినాన్

31 యేసు వరిజ్ నెన్పిస్తెజ్ మొదొల్స్తాన్, లోకుమరిసి ఆతి నాను నండొ మాలెజ్ ఓరిస్తెజ్వలె. యూద పెద్దెల్జు, పెరి పుజెరిజు, యూదురి రూలుజ్ నెన్పిస్సికార్ నజీ నెక్కుపోక్నార్ లోకుర్ నజీ సప్పొర్లె. సాజి మూండ్రీ దినమ్కాజ్ దేవుణు నజీ మర్జి నిక్నాన్లె.

32 యేసు యాకెజ్ విజు డాఃవ్ఎండ వెహ్నిజ్ పేతురు యేసుజ్ ఉండ్రీపడఃకాదు ఒసి, ప్రబువ నిజి యలెకెండ జర్రిదెజ్ ఆవద్ ఇజి గటిజు వెహ్నాజ్ మొదొల్స్తాన్.

33 యేసు సిసూర్దరోట్ మర్జి సుడఃజి కోపమ్దాన్ పేతురుజ్ వెహ్నాన్. “ఓ సయ్నా నాబాణిజ్ డిఃసి సొన్అ. నీ మన్నుదు మన్ని ఆలోసనమ్కు దేవుణుబాణిజ్ వాతికెజ్ ఆఉ. లోకుబాణిజ్ వాతికెదె నీను ఆలోసనం కిజిని”.

34 నస్తవలె యేసు లోకాజ్ విజేరిజ్, సిసూర్జు వన్నిబాన్ కూక్కి ఈహు వెహ్నాన్. ఎయెన్బా నావెట వాదెజ్ ఇహిజి వాండ్రు వన్ని సొంత

ఇష్టమకు నజీ నమ్మితివందిజ్ వన్నిజ్ వాని ఇని మాలెజ్బా ఓరిస్తెజ్ తయారాజి నావెట వాదెజ్†.

35 ఎయెరుబా వన్ని పాణదిజ్ కాపాడెదెజ్ సుడతిజ వన్నిజ్ ఎలాకాలం దేవుణువెట బత్తిని బత్తు దొహ్కావద్. గాని ఎయెన్బా నా వందిజ్, సువార్త వందిజ్ వన్ని పాణం సితిజ వన్నిజ్ ఎలాకాలం దేవుణువెట బత్తిని బత్తు దొహ్కానాద్.

36 ఒరెన్ వాండ్రు కొరితివజ యా లోకమది ఆస్తిసుకం విజు దొహ్కాఆజి వన్నిజ్ ఎలాకాలం దేవుణువెట బత్తిని బత్తు దొహ్కావ్‌ఎండా మహిజ, ఇని లాబం ఇని లాబంబా సిల్లెద్.

37 ఎందానిజ్ ఇహిజ ఎలాకాలం బత్తిని పాణమదిజ్ బదులు ఇనికబా సిదెజ్ లోకఅట్‌ఎన్.

38 యా తరమదికార్ నండొ సెఇకార్ దేవుణువందిజ్ మన్పు సిల్లెండ మన్నికార్. నా బుబ్బు ఆతి దేవుణుజాయ్‌దాన్ దేవుణు దూతెజ వెట వానివలె, నా వందిజ్ నామాటెజవందిజ్ సిగు ఆనివరివందిజ్ లోకుమారిసియాతి నానుబా సిగు ఆన”.

9

1 యేసు వరిజ్ ఈహు వెహ్తాన్, “నాను నిజం వెహ్సిన. ఇబ్బె నిహిమహి వరిలోఇ సెగొండార్ దేవుణు గొప్పసత్తుదాన్ వన్ని లోకురిజ్ ఏలుబడిః కిజినిక సూణిదాక సావర్”.

యేసుప్రబుజ్ మూర్తి మారిసినాద్.

2 ఆరు రోస్సుసాహివెనుక యేసు పేతురు, యాకోబు, యోహానుజ్ వన్నివెట ఉండ్రీ పెరి గొరోత కూక్త ఒత్తాన్. ఆ నాల్‌ఎరతప్ప అబ్బె మరి ఎయెర్బా సిల్లెర్. అబ్బె వరిఎద్రు వన్నిమూర్తి మారితాద్.

3 యేసు షొర్పాతి మహి సొక్క జిగిజిగి మెరిసిని తెల్లానిజాయ్ వజ ఆతాద్. యా లోకమదు ససా తెల్లాజ్ నొరబానికార్ ఎయెర్ సిల్లెర్.

4 మోసెని, ఏలియ వరిజ్ తోరె ఆతార్. వారు యేసువెట వర్గిజ మహార్.

† 8:34 8:34

5-6 అక్క సుడఃజి సిసూర్ తియెలాతార్. అందెజె పేతురు ఇనిక వెష్టాజొ నెస్వేండ, “ప్రబు, మాటు ఇబ్బె మహిజనెగెద్. అందెజె మూండ్రి గుడుఃసెజ్ తొప్పిట్. నిజి ఉండ్రి, మోసెజ్ ఉండ్రి, ఎలియెజ్ ఉండ్రి” ఇహాన్.

7 అయవలె ఉండ్రి మొసాప్ వరిజ్ పిడఃగితాద్. అయవలె అయ మొసాప్ లోఇహాన్, “వీండ్రు నా ఇస్టమాతి నా మరిన్. విన్నిమాట వెండ్రు”, ఇజి ఉండ్రి కంటం వాతాద్.

8 వెటనె వారు సురుల సుడఃతిజ్ వరివెట యేసు తప్ప ఎయెర్బా తొర్వతార్.

9 వారు గొరొన్ డిఃగ్జివాజి మహివలె, “లోకుమరిసియాతి నాను సాతివరిబాణిజ్ మర్జి నిజినిదాక మీరు సుడఃతిక మహిక ఎయెజ్బా వెహ్టాట్”, ఇజి యేసు వరిజ్ కసితం వెహ్టాన్.

10 యేసు వెష్టివజి వారు ఎయెజ్ వెహ్వేండ వరిమన్సుదు ఇడఃజి వరిలోఇ వారె వర్గితార్, “సాజి నిజ్నిక ఇహిజి అర్దం ఇనిక?”.

11 నస్తివలె వారు యేసుజ్ వెన్బాతార్, “ఏలియ ముజాల్ వాదెజ్వెలె ఇజి యూదురి రూలు నెస్పిస్సికార్ ఎందానిజ్ వెహ్పినార్?”

12 యేసు ఏలియ ముజాల్ వానాన్ ఇజి వెష్టిక నిజమె. వాండ్రు వాజి విజు కొత్తజ్ కినాన్లె*. గాని లోకుమరిసియాతికాన్ నండొ కస్టమ్కు ఓరిసి మాలెజ్ ఆజి లోకువన్నిజ్ నెక్సిపొక్కార్లె ఇజి రాస్తి దనిజ్ అర్దం మిజి తెలినాదా?

13 గాని నాను మిజి వెహ్సిన, ఏలియ వాతాన్. వన్ని వందిజ్ రాస్తి లెకెండ్ వరిజ్ ఇస్టం ఆతి వజి వారు వన్నిజ్ కితార్. ఇజి వెహ్టాన్.

దెయం అస్తికొడఃదిజ్ యేసు నెగెండ్ కిజినాన్

14 యేసుని, సిసూర్, మహి సిసూర్ మహిబాన్ వాతిజ్ సిసూర్ సురుల నండొ లోకుర్ కూడతి మహిక సుడుఃతార్. యూదురి రూలు నెస్పిస్సికార్ సిసూర్వెట వాదిసి మహార్.

* 9:12 9:12 పడాయ్ ప్రమాణమ్దు మన్ని మలాకి ప్రవక్త రాసి పుస్తకమ్దు రాస్తిమన్సిలెకెండ్ ఇహిజి ఏలియ ముజాల వాదెజ్ ఇజి యూదురి నమ్మిజినార్. మలాకి 3:1; 4:5-6.

15 అబ్బే మహి లోకుర్ విజెరె యేసుజ్ సుడఃతారె నండో బమ్మ ఆజి వెటనె వన్నిబాన్ ఉహ్కీవాజి వన్నిజ్ మాడిస్తార్.

16 నస్తవలె యేసు, “మీరు ఇనిదన్నిజ్ సిసూర్వెట వాదిసి మహిదెర్? ఇజి వెన్బాతాన్.

17 ఆ జనమ్లోఇ ఒరెన్ ఈహు వెప్తాన్, “మేస్టర్, నా మరిసిజ్ నీ డగ్గు తత్త. వన్నిజ్ ఉండ్రీ దెయం అస్తాదె వన్నిజ్ వర్లివండ కితాద్.

18 ఆ దెయం నా మరిన్అన్ని వేడఃదు అబ్బెనె వన్నిజ్ అర్ప్పినాద్. నస్తవలె వాండ్రు వెయుదాన్ పెంపులు కక్కి పల్కు కొహ్సినాన్. వాండ్రు డుడ్డువజ డజ్న ఆజినాన్. ఆ దెయమ్దిజ్ ఉల్ప్పు ఇజి నీ సిసూర్ వెట నాను వెప్తా గాని సిసూర్ అట్వెతార్.

19 యేసు వెప్తాన్, “నమకం సిల్లి యా తరమ్దికిదెరా, నాను ఎస్సాకాలం మీవెట మంజిన? మీరు కిజినికెక్ ఎస్తా ఓరిస్తెజ్? వన్నిజ్ నా డగ్గు తగ్గిఅ”.

20 నస్తవలె వారు ఆ కొణ్ణొదిజ్ యేసుడగ్గు తత్తార్. ఆ దెయం యేసుజ్ సుడఃతిజ్నరి వన్నిబణ్ణొల్ విజు వణకిసి బూమిద్ అర్ప్తాద్. అర్ప్తాదె వాండ్రు సుడఃబాజి పొజు కక్తాన్.

21 నస్తవలె యేసు, “విన్నిజ్ దెయం అసి ఎస్సా కాలం ఆతాద్?”, ఇజి అపొసిజ్ వెన్బాతాన్. “ఇజి వెలెహానె”, ఇజి అప్పొసి వెప్తాన్.

22 “ఆ దెయం కొణ్ణొదిజ్ నప్పెజ్ ఇజి నండొనుట్కు సిసూద్, సిల్లిజి ఏరుదు అర్ప్పి మహాద్. నీను ఇనికబా కిదెజ్ అట్టి ఇహిజ మా ముస్కు కనికారం ఆజి మజి సాయం కిత”, ఇజి అప్పొసి యేసుజ్ వెప్తాన్.

23 యేసు వెప్తాన్, “నీను ఇనికబా కిదెజ్ అట్టిజ ఇజి మీరు నజి వెప్పొదెరా? ఎయెన్బా దేవుణు ముస్కు నమకం ఇడ్తిజి వన్నిజ్ దేవుణు ఇనికబా కిదెజ్ అట్నాన్”.

24 వెటనె ఆ ఇజ్జి వన్ని అప్పొసి, “నాను నమిజిన. అనుమానం సిల్లెండ నమినివజ నాను నిజి నమ్మిదెజ్ సాయం కిత”, ఇజి డటం వెప్తాన్.

25 అబ్బై లోకుకూడేఁజి ఉహాక్కి వానిక యేసు సుడేఁజి ఆ దెయమ్దిజ్ “ఓ గుల్లబొయర దెయం, యా కొడొడిదిజ్ డిసి వెల్లి సోన్ఆ ఇజి నాను ఆడ్ర సీజిన. ఎసెజ్బా మరజి వన్ని లొఇ రమ”, ఇజి డటిసి వెప్తాన్.

26 నస్తవలె ఆ దెయం గగొలాజి వన్నిజ్ గొప్ప వణకిసి డిస్త సోహాద్. ఆ కొడొడిదిజ్ సుడేఁజి సాతివన్నివజ మహాన్. అక్క సుడేఁజి నండొండార్ “యా కొడొడి సాత సోహాన్” ఇహార్.

27 గాని యేసు వన్ని కీదు అసి నిక్కిజ్ వాండ్రు నిహాన్.

28 యేసు ఉండ్రొ ఇండ్రొ సోహివెనుక, యేసు అజ మహిజ్ వన్నిసిసూర్, “మాపు ఎందానిజ్ఆ దెయమ్దిజ్ ఉల్పైజ్ అట్వితాప్? ఇజి వెన్బాతార్.

29 అందెజె యేసు, “యా రకం దెయమ్కు పార్లనం వెలెనె గాని మరి ఇనిదనివెలెబా సోన్ఉ”, ఇజి వెప్తాన్.

యేసు వన్ని సావువందిజ్ మరి వెప్పినాన్

30 వారు అబెజిజ్ సొన్ని గలీలయదాన్ సొన్ని మహార్. వారు ఎంబె మంజినారొ ఇజి ఎయెజ్బా తెలిదెజ్ యేసుజ్ ఇస్తం సిల్లెతాద్.

31 ఎందానిజ్ ఇహిజ, యేసు వన్ని సిసూర్జి నెన్పిసి మహాన్. ఇనిక ఇహిజ, “లోకుమరిసియాతి నజి లోకాజ్ ఒపజెప్పార్లె. వారు నజి సప్పార్. మూండ్రొ రోస్కాజ్ నాను బత్కిజి నిజ్నాలె.

32 గాని యేసు వెప్తామాట సిసూర్ అర్లం కివితార్. ఆ మాటజి వందిజ్ వన్నిజ్ వెన్బాదెజ్ వారు తియెలాతార్.

విజేరిజ్ ముస్కు పెరికాన్ ఎయెన్?

33 వారు కపెర్నహము ఇని పట్నమ్దు వాతార్. వారు ఇండ్రొ వాతిజ్ యేసు మీరు సర్దు ఒరెన్వెట ఒరెన్ ఇనిదని వందిజ్ వాదిసి మహిదెర్. ఇజి వెన్బాతాన్.

34 గాని వారు ఇనిక వర్గివండ్ర అలెతార్. ఎందానిజ్ ఇహిజి వానివలె సర్దు ‘మా లొఇఎయెన్ పెరికాన్’ ఇజి ఒరెన్వన్నివెట మరిఒరెన్ వాదిసి మహార్.

35 నస్తీవలె యేసు బస్తాండ్రె పన్నెండు మణిసిర్ సిసూరిజ్ కూక్కి ఈహు వెహ్తాన్, ఎయెన్ మహి వరిమున్ను పెరికాన్ ఆనాండ్రొ, వాండ్రు విజెరిజ్ సేవ కిదెజ్.

36-37 వెనుక యేసు ఒరెన్ ఇజ్జి కొణ్ణొదిజ్ తసి వరినడిఃమి నిల్వ్తాన్. మరి ఆ కొణ్ణొదిజ్ ఎతాండ్రె ఈహు వెహ్తాన్, “ఒరెన్ ఇజ్జి కొణ్ణొదిజ్ ఎయెర్ నా పేరు అసి వరిఇండ్రొ డగ్గు కినారొ వారు నజి డగ్గు కినార్. ఎయెర్ నజి డగ్గు కినారొ నజి ఆఎండ నజి పొక్కివన్నిజ్ డగ్గు కినార్.

మా మున్ను పగసిల్లికాన్ మా పడఃకాదు మన్నికాండ్రె

38 యోహాను వెహ్తాన్, “మేస్టర్, ఒరెన్ నీ పేరు అసి దెయమ్కాజ్ ఉల్ఫ్తిక మాప్సుడఃతాప్. వాండ్రు మాలోఇ మనికాన్ ఆవీన్. అందెజె మాపు వన్నిజ్ అడ్డు కిత్తాప్.

39 యేసు వెహ్తాన్, “వన్నిజ్ మీరు అడ్డు కిమాట్. నా పేరు అసి యేలు బమ్మాతి పణికినికాన్ వెటనె నా వందిజ్ సెఇక వెప్సావీన్.

40 మా మున్ను పగ సిల్లికాన్ మా పడఃకాదు మనికాండ్రె.

41 నాను నిజం వెహ్సిన, ఎయెర్బా మీరు క్రీస్తు వారుఇజి వెహ్సిన, నా పేరు అసి గినాడు ఏరుఉండెజ్ మిజి సితిజ దేవుణు వరిజ్నిజం ఇనాయం సీనాన్.

తప్పకిబిసినివన్నిజ్ నండొ సిక్కి వానాద్

42 నామున్ను నమ్మకం ఇడ్డి యా ఇజిరి కొణ్ణొనన్ని వరిలోఇ ఒరెన్వన్నిజ్ ఎయెర్బా తప్పకిదెజ్, సరి తోరిస్తిజి వాండ్రు మెడఃదు పెరి జతపణుకు తొహె ఆజి నమ్దరమ్దు అడఃగి ముడిఃగి సొనొక వన్నిజ్ నెగెద్. ఎందానిజ్ ఇహిజ తప్పకిబిసినివన్నిజ్ ఒద్దె సిక్కి వాన్ద్.

43 నీ కియు నిజి తప్ప కిబిస్తిజి దనిజ్ కత్తి విసిర్అ.

44 రుండి కికు మంజి ఎలాకాలం సిను మంజినిబాన్ సొన్ ఏండ ఉండ్రె కియు మంజి ఎలాకాలం బత్తిదెజ్ దేవుణుబాన్ సొనిక నెగెద్.

45-46 నీ కాలు తప్పకిబిస్తిజి దన్నిజ్ కత్తి విసిర్అ. రుండి కాల్కు మంజి ఎలాకాలం సిను మంజినిబాన్ దేవుణు నిజి అర్ప్ ఏండ, సొట వాండ్రు ఆజి ఎల్ల కాలం బత్తిదెజ్ దేవుణు బాన్ సొనిక నెగెద్.

47 నీ కణక తప్పకిబిస్తీజ దన్నిజ్ లాగ్గి విసీర్అ. రుండి కణకు మంజి దేవుణు నిజీ నరకమ్దు అర్పెఎండ ఉండ్రె కణక మంజి దేవుణు ఏలుబడిడు మంజినిక నెగెద్.

48 బానె వరి పిడుకు† సాఉ. సిసు నమ్వద్”.

49 సోరుదాన్ ఇడ్పివజ దేవుణుదిజ్ నమ్మిని వన్నిజ్ సిసు నని కష్టందాన్ ఇడ్పాన్.

50 సోరు, నెగ్గికాదె గాని దన్నిజ్మని రుసి సోహిజ ఎలాగ మరి దన్నిజ్ రుసి తపిస్తెజ్ ఆనాద్? మీరుబా సోరు రుసి సీనివజ ఒరెన్వెట ఒరెన్ సమనం కల్లిజి మండ్రెజ్”.

10

అల్పిజ్డిఃస్తెజ్నాయమ్నా ఇజి యేసు నెన్పిసినాన్

1 యేసు, వాండ్రు మహిబాణిజ్ డిసి యూదయ ప్రాంతమ్దు వాజి యొర్దాన్ గడ్డ డాట్టాన్. మరి వన్నిబాన్ నండో లోకుర్ వాతార్. ఎనెజ్బా నెన్పిసినెకెండో యేసు వరిజ్ నెన్పిస్తాన్.

2 నెగొండార్ పరిసయరు యేసుడగ్రు వాజి వన్నిమాటెజ తపు అస్తెజ్ సుండెతార్. వారు యేసుజ్ వెన్బాతార్, మోసె సీతి రూలువజ ఒరెన్ వన్నిఅల్పిజ్ డిఃస్తెజ్ తగితి రూలుమనాదా?

3 అందెజె యేసు, మోసె ఇని రూలు మిజీ సితాన్? ఇజి వరిజ్ వెన్బాతాన్.

4 ఒరెన్ వన్ని అల్పిజ్ డిఃస్తెజ్ ఇహిజ ఉండ్రె ఆక్కు రాసినీజి దన్నిజ్ డిఃస్తెజ్ ఆనాద్. ఇజి మోసె సీతి రూలుదు మనాద్, వారు వెహ్తార్.

5 యేసు వెహ్తాన్, మీ మన్నుజ్ నసాని గర్ర అతిజ్నె యా ఆడ్ర రాసి సితాన్.

6 గాని దేవుణు లోకాజ్ పుటిస్తెవలె మొగకొండో అయలి కొండోలెకెండో వరిజ్ పుటిస్తాన్.

7 అందెజె మొగవాండ్రు వన్ని అయసి అపొసిజ్ డిఃసి వన్ని అల్పివెట కూడెజి మంజినాన్.

† 9:48 9:48 సబ్బిసానిదన్నిజ్ లోఇమన్ని పిడుకుజ్

8 రిఎర్ ఉండ్రీ ఒణ్డోల్వజ ఆజిమంజినార్. అందెజె మరి ఎసెజ్బా వారు రిఎర్ ఆఎండ ఉండ్రె లోకునె.

9 అందెజె దేవుణు జత్తకూడిఃప్తివరిజ్ లోకు అజ కినిక ఆవద్.

10 వారు ఇండ్రొ మహివలె సిసూర్ యా సజతి వందిజ్ యేసుజ్ మరి వెన్బాతార్.

11 యేసు వెప్తాన్, “ఒరెన్ ఆల్నిజ్ డిసి మరిఉండ్రీ దనిజ్ ఇడ్డెఆతిజ వాండ్రు రంకు బూలాజినాన్.

12 అయ లెకెండ్ అయ్లికొణ్డోః మాసిజ్డిసి మరి ఒరెన్వన్నిజ్ ఇడ్డెఆతిజ అది రంకుబూలాజినాద్”.

యేసు ఇజిరి కొణ్డోరిజ్ దీవినినాన్

13 లోకుర్, వరిఇజిరి కొణ్డోరిజ్” వరిమున్కు వన్ని కిక్కు ఇడ్డెదెజ్ ఇజి యేసుబాన్ తత్తార్. అక్కు సుండేతారె సిసూర్ వరిజ్ జట్టిజ్ ఆతార్.

14 గాని యేసు అక్కు సుండేతాండ్రె సిసూర్మున్కు కోపం ఆతాన్. “యా ఇజిరి కొణ్డోరిజ్ నా డగ్గు రపిర్. వరిజ్ అడ్డు కిమాట్. ఎందానిజ్ ఇహిజ యాలెకెండ్ మన్నికారె దేవుణు ఏలుబడిఃదు మంజినార్.

15 నాను వెప్తిక నిజమె. ఇజిరి కొణ్డోర్ నమకం ఇడ్డివజ దేవుణుమున్కు నమకం ఇడ్డికారె దేవుణు ఏలుబడిఃదు మంజినార్. సిల్లికార్ సాన్వర్”, ఇజి యేసు వెప్తాన్.

16 నస్తివలె యేసు అయ ఇజిరి కొణ్డోరిజ్ ఎత్తి, వరి మున్కు కిక్కు ఇడ్డిజ్పోమ్జి దీవిస్తాన్.

అస్తి మనికాన్ యేసుడగ్గు వాజినాన్

17 యేసు అబ్బెణాన్ సాండ్రెజ్ సాత్తిజ్ ఒరెన్ ఉహ్కీ వాజి వన్ని ముజాల్ ముణుకుజ్ ఊర్జి మాడిఃస్తాన్, “ఓ నెగ్గి బోదకినికి, దేవుణువెట ఎలాకాలం మంజిని బత్కుదు మండ్రెజ్ ఇహిజ నాను ఇనిక కిదెజ్”, ఇజి యేసుజ్ వెన్బాతాన్.

18 “నీను ఎందానిజ్ నజీ నెగ్గికి ఇజి వెహ్సిని? దేవుణు ఒరెండ్రె నెగ్గికాన్. మరి ఎయెన్బా నెగ్గికాన్ ఆవన్.

19 దేవుణు వెప్తా రూలువిజు నిజి తెలినాద్. లోకాజ్ సప్తెజ్ ఆవిద్, రంకు బూలాదెజ్ ఆవిద్, డోజు కిమా, అబద్ధమ్దిజ్ సాస్య వెహ్మా, ఎయెజ్బా మోసం కినిక ఆవిద్, యాయ బుబ్బరిజ్ గవ్‌రమ్‌దాన్ నెగ్గెండ్ సుడిఃదెజ్”, ఇజి యేసు వన్నిజ్ వెప్తాన్.

20 వెప్తాజ్ “బోదకినికి, ఇజిరి వెలెహన్ అసి యా విజువనకాజ్ లోజిజినె నాను మంజిన”, ఇజి వాండ్రు వెప్తాన్.

21 యేసు వన్నిజ్ సుడఃజి వన్నిజ్ ప్రేమిస్తాన్. “నీను ఉండ్రీ కిదెజ్ మనాద్. అక్క ఇనిక ఇహిజు నీను సొన్ని నిజి కల్గితిమనిక విజు పొర్ని అయ డబ్బుజ్ బీదాతివరిజ్ సిఅ. అయవలె పరలోకమ్దు నిజి ఆస్తి దోహ్‌కాద్. వెనుక వాజి నా సిసూ ఆఅ”, ఇజి యేసు వెప్తాన్.

22 యామాట వెహండ్రె వాండ్రు మొకొం ఊతాండ్రె మన్నుదు దుకమాజి సాహాన్. ఎందానిజ్ ఇహిజు వాండ్రు నండో ఆస్తి మన్నికాన్.

23 నస్తవలె యేసు సురుల సుడఃజి సిసూర్‌జు వెప్తాన్. “ఆస్తి మన్నికాన్ దేవుణు ఏలుబడిః అడిగి మండ్రెజ్ ఎస్సానొ కస్టం.

24 యేసు వెప్తా మాటెజ్ సిసూర్ వెహరె బమ్మ ఆతార్. యేసు మరి వెప్తాన్, “కొడఃరాండె దేవుణు ఏలుబడిః అడిగి మండ్రెజ్ ఎస్సానొ కస్టం.

25 ఆస్తిమన్నికాన్ దేవుణుకిని ఏలుబడిఃదిజ్ లోజిజి మండ్రెజ్ ఇహిజు కస్టం. ఉండ్రీ ఒంటె బొబానం బొరొదాన్ డుగ్‌నిక దన్నిజ్ ఇంక సులునె”.

26 యాక వెంజి సిసూర్ మరి ఒద్దె బమ్మ ఆతార్. అహిజు దేవుణు రక్సిస్తిలెకెండ్ ఎయెన్ మండ్రెజ్ అట్నాన్? ఇజి వారు ఒరెన్‌వెట మరి ఒరెన్ వెప్తాన్.

27 నస్తవలె యేసు వరిజ్ సుడఃజి, అయా లోకాజ్ అటోఇకాదె గాని దేవుణు విజు కిదెజ్ ట్నాన్”, ఇజి వెప్తాన్.

28 నస్తవలె పేతురు, మాపు విజు డిఃస్తాపె నీవెట వాతాప్ ఇజి యేసుజ్ వెప్తాన్.

29-30 యేసు మరి వెప్తాన్, నాను వెహ్పిక ఇనిక ఇహిజు, నా వందిజ్,

నువార్త వెప్పొ వందిజ్, ఇలుజొల్లు నా దాదతంబేరిజు, తజిబీబికాజ్, కొడొరిజ్, అయ్సిఅపొసిరిజ్, బూమిజ్ డిస్తివన్నిజ్ యా లోకమ్దునె వంద వందుజ్ ఇల్కు, దాదతంబేరిజ్, బీబితజికు, కొడొరిజ్, అయ్సిఅపొసిర్, బూమి, కల్లినాద్. అక్కాదె ఆవండ దేవుణుదిజ్ నమ్మితివరిజ్ యా లోకమ్దు కస్టమ్కుబా వానె. గాని దేవుణు రాజువజ వానివలె వాండ్రు ఎలాకాలం దేవుణువెట బత్కినాన్.

31 అయలెకెండెనె కడెవెర్దికార్ ఇజి ఒడిబినికార్ మొదొహికార్ ఆనార్. ముందహికార్ ఇజి ఒడిబినికార్ కడెవెర్దికార్ ఆనార్.

యేసు మరిఉండ్రీ సుటు వన్నిసావు వందిజ్ వెప్పొనాన్

32 యేసుని, సిసూర్ యెరూసలేమ్దు సొన్ని మహార్. లోకుర్బా వరివెట సొన్ని మహార్. యేసు వరి ముజుల్నడితాన్. యేసు యెరూసలేమ్దు సొన్నిని వందిజ్ సిసూర్ బమ్మతాత్. లోకుర్ తియెలాతాత్. యేసు పన్నెండు మణిసిర్ సిసూర్ వన్నిడగ్రు కూక్కి, వన్నిజ్ జర్గినిక వరిజ్ వెహ్హాన్.

33 “ఇదిలో మాటు యెరూసలేమ్దు సొన్నినాట్. లోకుమరిసియాతి నాను పెరి పుజెరిజ, యూదురి రూలువెప్పొ వరిజ్ ఒపజెప్పార్లె. వారు నజి సావుదిజ్ సిక్కి సీజి యూదురు ఆఇవరిజ్ నజి ఒపజెప్పార్లె.

34 వారు నజి వెక్కిసి, నా ముస్కు పూసి, కొర్దదాన్ డెయ్జి సప్పార్లె. మూండ్రీ రొస్కాణిజ్ మర్జి నిజ్నాలె”, ఇజి వెహ్హాన్.

యాకోబుని యోహాను యేసువెట ఉండ్రీమాట వెహ్హానినార్

35 నస్తవలె జెబెదయ మరిసిరాతి యాకోబు యోహాను ఇనికార్ యేసుడగ్రు వాతారె, “ఓ బోదకినికి, మాపు ఇనికబా లొస్తిజ అక్క మజి సీదెజ్వెలె” ఇహార్.

36 యేసు వరిజ్ “నాను మీ వందిజ్ ఇనిక కిదెజ్?”, ఇజి వెన్బాతాన్.

37 వారు, “నీను రాజువజ ఏలుబడిః కినివలె మజి ఒరెన్వన్నిజ్ నీ ఉణెర్ వడఃకాదు ఒరెన్వన్నిజ్ నీ డేబ్రు వడఃకాదు బసె కిఅ ఇజి కోరిజినాప్”, ఇజి వెహ్హార్.

38-39 యేసు వరిజ్ “మీరు ఇనిక లొసినిదెరో మీరు నెన్ఇదెర్. నాను ఓరిస్తైజ్ మన్ని నండో బాదెజ్ మీరు ఓరిస్తైజ్ అట్టిదెరా? నాను పొందిని బాప్తినం పొందిదెజ్ అట్టిదెరా?”, ఇజి వరిజ్ వెన్బాతిజ్ వారు, “మావ్ అట్నావ్ ఇహార్. దనిజ్ యేసు నాను ఓరిస్సి నండోబాదెజ్ మీరు ఓరిస్సిదెర్. నాను పొందిని బాప్తినం మీరు పొందిదెజ్.

40 గాని నా ఉణెర్ పడకాద్ డేబ్ర పడకాద్ ఎయెర్ బస్తైజ్ ఇజి తీర్మనం కితిక నాను ఆవ. దన్ని వందిజ్ దేవుణు తీర్మనం కిత్త మనాన్. వాండ్రు తీర్మనం కితివరిజ్ అక్క సీనాన్.

41 మహి పది మన్ని సిసూర్ యా మాట వెహారె యాకోబుని యోహాను ముస్కు కోపమాతార్.

42 యేసు సిసూరిజ్ విజేరిజ్ కూక్కి ఈహు వెప్తాన్, “యూదురు అఇవరిలోఇ ఏలుబడిః కిదెజ్ అతికారం మన్నికార్ వరిముస్కు అతికారం తోరిస్సార్ వరిలోఇ పెరికార్ వరిజ్ మన్ని అతికారమదాన్ లోకురిజ్ అణసు తిగ్జినార్ ఇజి మీరు నెన్ఇదెర్.

43 మీరు వరిలెకెండ మండ్రెజ్ ఆవద్. గాని మీ లోఇ ఎయెన్బా పెరికానాదెజ్ ఇహిజ వాండ్రు మిజి పణిమణిసిర్ లెకెండ ఆదెజ్ వలె.

44 మరి ఎయెన్బా మిజి విజేరె ముస్కు నెయ్కి ఆదెజ్ ఇహిజ వాండ్రు మిజి విజేరిజ్ వెటిపణిమణిసిలెకెండ ఆదెజ్ వలె.

45 ఎందానిజ్ ఇహిజ లోకు మరిసిఆతి నానుబా లోకాజ్ సేవ కిదెజ్ వాత గాని సేవ క్రిబె ఆదెజ్ రెప్పత. మరి నండోండారిజ్ వరి పాపమ్కాణ్ విడుఃదల కిదెజ్ నా పాణం సీదెజ్ వాత మన్న”.

యేసు గుడ్డిఆతి బర్తిమయిజ్ నెగెండ కిజినాన్

46 యేసుని సిసూర్ యెరికొపట్నమ్దు వాతార్. వారు నండో లోకుర్వెట పట్నమ్దాన్ సొన్ని మహిజ్ తిమాయి మరిసి ఆతి బర్తిమయి ఇని గుడ్డివాండ్రు సరి పడకాదు లోస్పాదెజ్ బస్త మహాన్.

47 సరి దాన్ వాజినికాన్ నజరేతువాండ్రు యేసు ఇజి వెంజి, “ఓ యేసు, దావీదుమరిసి నా ముస్కు కనికరం తోరిస్అ”, ఇజి డటం గగోల్ఆతాన్.

48 సేన లోకువన్నిజ్ “పలాక్ మండ్రు ఇజి గోల కిత్తార్. గాని వాండ్రు “ఓ “దావీదుమరిసి, నా ముస్సు కనికారం తోరిన్త”. మరి ఒద్దె డట్టం డేల్స్తాన్.

49 యేసు నిహండ్రె, “వన్నిజ్ కూక్త”, ఇజి వెహ్తాన్. వెహ్తాజ్ వారు ఆ గుడ్డివన్నిజ్ కూక్సి, “దయరం మన్త, యేసు నిజి కూక్సినాన్, నిజ్త”, ఇజి వెహ్తార్.

50 వెటనె వాండ్రు వన్ని నీరి సొక్క విసీర్తాండ్రె నిజ్జి యేసు బాన్వతాన్.

51 యేసు వన్నివెట, “నాను నిజి ఇనిక కిదెజ్ఇజి నీను కోరిజిని?”, ఇజి వెన్బాతాన్. నస్తవలె వాండ్రు, “యేసు, నాను బేస్తాజ్ ఆపిద్”, ఇజి వెహ్తాన్.

52 యేసు, “నీను నా ముస్సు నమకం ఇడ్డి అందెజె నీను నెగెండ్ అతి నీను ఇండ్రె సొన్త” ఇహాన్. వెటనె సుడుఃదెజ్ అట్టాన్. వాండ్రు యేసువెట సొహాన్.

11

యేసుజ్ రాజువజ మర్యాద సీజినార్

1-2 యేసుని, వన్నిసినూర్ యెరూసలేం డగ్రుమన్ని బెత్పాగె బేతానియ ఇని నాహ్కజ్ వాతార్. యా నాహ్కు ఒలివ గొరొన్డగ్రు మన్నె. అబ్బె వాతిజ్ యేసు సినూర్ రివరిజ్ కూక్సి, “మీరు ఎద్రు మని నాటో సొండ్రు. అబ్బె సొహిజసరి తొహ్తా మని ఉండ్రె పెరి గాడఃదె పిల్ల మీరు సూజిదెర్ దని ముస్సు ఎయెర్బా ఎసెజ్బా బన్వతారె. దనిజ్ కుత్సి నాబాన్ పేర్జి తగాట్”.

3 “మీరు ఎండా కుత్సినిదెర్ ఇజి ఎయెర్బా వెహ్తాజ, యాక ప్రబుజ్ కావాలి. మరి వెటనె దన్నిజ్ మర్జి పోక్నాన్ ఇజి వెహ్తు” ఇహాన్.

4-5 వారు సొన్ని ఇల్లుముజుల్ వీదిదు తొహ్తా మని ఉండ్రె గాడఃదె పిల్లదిజ్ సుడతార్. వారు దనిజ్కుత్సి మహిజ్, అబ్బె మనికార్, “ఎందానిజ్ మీరు యా గాడఃదె పిల్లదిజ్ కుత్సినిదెర్”, ఇజి వెన్బాతార్.

6 యేసు వరిజ్ వెష్టి వజనె సిసూర్ వెహ్తార్. అబ్బె మహికార్ వరిజ్ సరిసిత్తార్.

7 వారు గాడ్దె పిల్లదిజ్ యేసుబాన్ తత్తార్. దన్నిముస్కు బస్తెజ్ వరి పాతెజ్ పష్టిజ్ యేసు దన్నిముస్కు ఎక్కి యెరూసలేమ్దు సొండ్రెజ్ సొతాన్.

8 సొహిజ్ సేన లోకు వరి నీరి సొక్కెజ్ సర్దు పహ్తార్. మరి సెగొండార్గుడ్డెదు మని మరెకాణి కొమ్మెజ్ తతార్ సర్దు పహ్తార్. ఆహె కిజి వారు యేసుజ్ మర్యాద కిత్తార్.

9-10 ముజాల్ సొన్ని మహికార్, వెనుక వాజి మహికార్, “ఓసన్న! ప్రబు సిత్తి అతికారమ్దాన్ వాజినికాన్ పొగ్గడె: ఆనికాన్* . మా అని గొగొఆతి దావీదు రాజువజి ఏలుబడి: కిదెజ్ వాని ప్రబు గొప్ప వాండ్రు పరలోకమ్దు మన్ని దేవుణుదిజ్ ఓసన్న!”, ఇజి డేల్స్తార్.

11 యేసు యెరూసలేమ్దు వాజి దేవుణు గుడి:దు సొహాన్. అబ్బె మహి విజుదనిజ్ యేసు సుడతాన్. గాని పొద్దు ఆతిజ్ పన్నెండు మణిసిర్ సిసూర్వెట బేతానియ నాటొ సొహాన్.

పట్టు సిల్లి బొడెమరాన్

12 మర్న నాండిజ్ యేసు, వన్ని సిసూరు బేతానియదాన్ సొన్నిమహిజ్ యేసుజ్ బజి కట్టాద్.

13 యేసు దూరమ్దాన్ ఉండ్రె బొడెమరాన్ సుడతాన్. పట్టు కాలం ఆఇజ్బా మరాతు ఆకుజ్ మహె. మరాత్పట్టు మంజినె ఇజి డగ్రు సొహండ్రె సుడతాన్. గాని ఆకు తప పట్టు సిల్లు.

14 యేసు ఆ మరాతిజ్” నీ పట్టు మరి ఎసెజ్బా లోకుర్తిన్విండ ఆపిర్’ ఇజి వెహ్తాన్. వాండ్రు వెష్టిక సిసూర్ విహర్.

యేసు యెరూసలేమ్దు మన్ని పెరిదేవుణుగుడి:దు సొహాన్

15 యేసుని వన్ని సిసూర్ యెరూసలేమ్దు వాతిజ్, యేసు అబ్బెమహి యూదురి దేవుణు గుడి:దు సొహాన్. అబ్బెగుడి: ఆర్జుదు మహి కొణి వరిజ్ పొర్నివరిజ్ విజేరిజ్ వెల్లి పొక్తాన్. డబ్బు

* 11:9-10 11:9-10 క్రిచ్చన 118:26.

మారిన్ని వరి బల్లెజ్ని పావురపొటిజ పొర్నిని వరి పిటెజ్ మహ్తా విస్సీర్తాన్.

16 ఇని సామానమ్బా ఎయెర్బా దేవుణు గుడిః బాడిఃదాన్ బరు మోస్తాజ్ యేసు సరి సివితాన్.

17 యేసు వరిజ్ నెన్పిసినివెలె ఈహు వెహ్లాన్, “నా గుడిః విజెరి లోకాజ్ పార్దనం కిని గుడిః ఇజి కూకె ఆనాద్లె†, ఇజి దేవుణు మాటదు రాస్త మనాద్. గాని మీరు దన్నిజ్ డోజారిజ సాలం‡ లెకెండ్ కిత్తి మన్నిదెర్”.

18 యేసు వెహ్తిక లోకుర్ విజేరె వెంజి బమ్మ ఆతార్. అబ్బె మహి పెరిపుజెరిజు, యూదురి రూలుజ్ నెన్పిసినికార్ అక్క సుడఃజి తియెలాతార్. యేసుజ్ ఎలాగ సప్తెజ్ ఇజి ఆలోసనం కితార్.

19 పొద్దు ఆతివలె యేసుని, వన్ని సిసూర్ ఆ పట్టుమ్దాన్ సాహార్.

పట్టు సిల్లి బొడెమరాన్ వందిజ్ యేసు వెహ్నినాన్

20 పెందాల్తె వారు సొన్నిమహిజ్ యేసు పట్టు రెబాతి బొడెమరాన్ వెలెజాణిజ్ మరాన్ విజు సాతిక వారు సుడుఃతార్.

21 పేతురు యేసు వెహ్తిక గుర్తు కిత్తాన్. “ప్రబు నీను సయప్ సిత్తి బొడెమరాన్ సాత మనాద్”, ఇజి వెహ్లాన్.

22-23 యేసు వరివెట ఈహు వెహ్లాన్, “మీరు దేవుణు మున్సు నమకం ఇడుఃదు. నాను నిజం వెహ్నిన. ఎయెర్బా యా గొరోణ్దిజ్” పెర ఆజి సమ్దరమ్దు అర్అ’ ఇజి వన్ని మన్నుదు అనుమానం సిల్లెండ నమిజి వెహ్తిజ ఆ వజనె జర్గినాద్”.

24 అందెజె నాను వెహ్నిన, మీరు పార్దనం కినివెలె మీరు ఇనికెజ్ లొసినిదెరో అక్కెజ్ దొహ్కెంండ ముజాలె అక్కెజ్ దొహ్కాద్ ఇజి నమ్మిదు. నస్తివలె అక్కెజ్ విజు మిజి కల్గినె.

25 మీరు ఎనెజ్బా పార్దనం కినివెలె ఎయెన్బా మీ మున్సు తప్పకిత్త మనాన్ ఇహిజ వన్నిజ్ సెమిస్తెజ్.

† 11:17 11:17 యెనయ 56:7. ‡ 11:17 11:17 యిర్మీయ 7:11

26 నస్తివలె పరలోకమందు మన్నినీ బుబ్బాతి దేవుణు మీ తప్పజ్బా సెమిస్సాన్.

యేసుజ్ ఎయెన్ అతికారం సితాన్ ఇజి వెన్ బాజినార్

27 యేసుని, వన్నిసినూర్, మరి యెరూసలేమ్ దు వాతార్. యేసు అబ్బై దేవుణుగుడిః నడిఃజి మహిజ్ పెరిపుజెరిజు యూదురి రూలుజ్ నెన్ పిసినికార్ యూదపెద్దెల్ జ వన్నిబాన్ వాతార్.

28 వారు యేసుజ్ వెన్ బాతార్, “నీను ఇని అతికారమ్ దాన్ యా పణిజ్ కిజిని? యా పణిజ్ విజుకిదెజ్ ఎయెన్ నిజి అతికారం సితాన్?”.

29 యేసు వెహ్లాన్, “నాను మిజి ఉండ్రీమాట వెన్ బాన. నజి జబాబ్ వెహ్లు. అయవలె యా పణిజ్ ఎమేణి అతికారమ్ దాన్ కిజిన ఇజి నాను మిజి వెహ్లా.

30 యోహానుజ్ బాప్తీసం సీదెజ్ అతికారం ఎంబెణిజ్ వాతాద్? దేవుణు బాణిజ్ నా, లోకుర్ బాణిజ్ నా? నజి వెహ్లు.

31-32 యేసు వెహ్లిమాట వెంజి పరిలోఇ వారె ఒడిఃబితార్. దేవుణుబాణిజ్ వాతాద్ ఇజి వెహ్లిజ అయవలె ఎండనిజ్ మీరు వన్నిజ్ నమ్మిఇతిదెర్ ఇజి వెన్ బానాన్. లోకుర్ బాణిజ్ వాతాద్ ఇజి వెహ్లిజ వారు లోకాజ్ తియెల్ ఆతార్. ఎండనిజ్ ఇహిజ యోహాను దేవుణు మాట వెహ్లి ప్రవక్త ఇజి లోకుర్ నమ్మితార్.

33 అందెజె వారు, “మజి తెలిఎద్”, ఇజి మర్జి వెహ్లా. అయవలె యేసు, “అహిజ, యా ఎంమేణి అతికారమ్ దాన్ యా పణిజ్ కిజిన ఇజి మిజి నానుబా వెహ్లా”, ఇజి వెహ్లాన్.

12

పాలిసీత్తి టోటకత

1 యేసు పరిజ్ కతవజి ఈహు వెహ్లాన్. “ఒరెన్ వన్నిజ్ కండెక్ బూమి మహాద్. వాండ్రు ఆ బూమిదు ద్రాసమొకెజ్ ఉణుస్తాన్. దన్ని సురుల కోటి తొహిస్తాన్. దన్నిలోఇ ద్రాక్కుపట్టురసం పీర్దెజ్ పణుకుదు ఉండ్రీ గనుగు తయార్ కిబిస్తాన్. టోట కాప్ కిదెజ్ ఉండ్రీ ఎత్తుమన్ని

ఇల్లుబా తయార్ కిత్తాన్. వెనుక ద్రాసటోట సెగొండార్ రెయ్యుతురిజ్ పాలిదిజ్ సిత్తాండ్రె పయనం కిజి మరి ఉండ్రీ దేసెం సొహాన్.

2 పట్కు పంట్ని కాలమ్దు ఆ టోట ఎజమాని వన్నిజ్ వానివంతు లొసి తగ్అ ఇజి ఒరెన్ పణిమన్నిజ్ పాలి అస్తిమన్నివరిడగ్రు పోక్తాన్.

3 గాని పాలి అస్తిమన్నికార్ వన్నిజ్ డెయ్యూరె వహి కీదాన్ మర్జి పోక్తాన్.

4 అయవలె ఆ టోట ఎజమాని మరి ఒరెన్ పణిమణిసిజ్ వరిడగ్రు పోక్తాన్. వారు వన్నిజ్బురాదు గాయం ఆనివజ డెయ్యజి సిగు కిజి పోక్తాన్.

5 యజమాని, వెనుక, మరి ఒరెన్వన్నిజ్ వరిబాన్ పోక్తాన్. వన్నిజ్ వారు డెయ్యు సప్టార్. అయవజనె ఎజమాని వన్ని పణిమణిసిర్ సేన లోకురిజ్ పోక్తాన్. సెగొండారిజ్ వారు డెయ్యతార్. మహివరిజ్ సప్టార్.

6 ఆక్కర్దిజ్ అయ ఎజమానిజ్ వాండ్రు ప్రేమ కిత్తి ఒరెండ్రెమహి మరిసి మిగిలిత్తాన్. అందెజె వన్నిజ్ పోక్తాన్. ఆ పాలి అస్తిమన్నికార్ నా మరిసిజ్ గవరం సీనార్లె ఇజి వరిబాన్ పోక్తాన్.

7 ఆ పాలి అస్తిమన్నికార్ ఎజమాని మరిసిజ్ సుడెతారె వీండ్రు యా టోటదిజ్ అక్కుమన్నకాన్ రద్దు మాటు విన్నిజ్ సప్పి యా టోట మాది కినాట్”, ఇజి వారు కూడిజి వర్గితార్.

8 అందెజె వారు ముస్కు అర్తాండ్రె వన్నిజ్ సప్టార్. సప్టారె టోట వెల్లి విసీర్తార్.

9 ఆ టోట ఎజమాని వరిజ్ ఇనిక కినాన్? వాండ్రు వాజి ఆ అస్తిమహివరిజ్ సప్పాండ్రె ఆ టోట ఆఇ రెయ్యురిజ్ పాలిదిజ్ సినాన్.

10-11 యేసు మరి వెప్టాన్. “ఇల్లు తొప్పికార్ నెక్కిపొక్తి పణుకునె మూలదిజ్ ములపణుకు ఆతాద్. యాక దేవుణు కియుదాన్ జర్గితిక. యక మా కణుకెజి బమ్మాతిక* ఇజి దేవుణు మాట రాస్తీ మన్నిక మీరు సద్విఇదెరా?

* 12:10-11 12:10-11 కీర్తన 118:22,23.

12 యేసు యా కతవజ నెన్పిస్తక వెహారె ‘మా వందిజ్ వెహ్లాన్’ ఇజి పెద్దెలుజు నెస్తారె యేసుజ్ అస్తెజ్ ఇజి సుడెఃతార్. గాని మందలోకురిజ్ తియెలాతారె వన్నిజ్ డిఃస్తారె సాహార్.

పన్ను సీదెజా పోనినా ఇజి వెన్బాజినార్

13 వెనుక వారు పరిసయరుజ్ని హెరోదురాజు పార్తిలోఇ సెగొండార్జ్ యేసుమాటదు తపు అస్తెజ్ వన్నిబాన్ పోక్తార్.

14 వారు వన్ని డగ్రు వాజి, ఓ బోదకినికి, నీను నిజం వెహ్లాకి ఇజి మాప్నెస్సాప్. నీను ఇజిరికార్ ఇజి పెరికార్ ఇజి తేడ తోఇకి వరిజ్ ఇష్టమాతిలెకెండ్ వర్గినికి ఆఇ దేవుణు సరి వందిజ్ నిజమ్దాన్ నెన్పిసినికి. కయ్సరుజ్ పన్ను సీనిక నాయమ్నా ఆవదా?

15 యూదురు ఆతి మాపు అక్కసీదెజా పోనినా? ఇజి యేసుజ్ వెన్బాతార్. వారు వేసం కినికార్ ఇజి నెసి “వీరు నా మాటదు ఎందానిజ్ తపు అస్తెజ్ సుడెఃజినిదెర్? ఇజి యేసు వెన్బాతాన్. యేసు మరి వెహ్లాన్, ఉండ్రి దినారి కాసు తసి నజి తోరిస్తూ”.

16 వారు తసి వన్నిజ్ తోరిస్తార్. నస్తవలె వాండ్రు, దిన్నిముస్కు మన్ని బోమ్మ ఎయెది, దని ముస్కు రాస్తి రాంత ఎయెది? ఇజి వెన్బాతాన్. “కయ్సరుది”, ఇజి వారు వెహ్లార్.

17 అయవలె యేసు కయ్సురుజ్ సెందితికెజ్ కయ్సురుజ్ సీదు. దేవుణుదిజ్ సెందితికెజ్ దేవుణుదిజ్ సీదు ఇజి వెహ్లాన్. యేసు వెహ్లాక వారు వెంజి బమ్మ ఆతార్.

సాతి వెనుక బత్తిఎరఇజి సెగొండార్ వెహ్సినార్

18 నస్తవలె సాతివెనుక మర్జి నిజీనిక సిల్లెద్ ఇజి నెన్పిసిని సదుకయ్రు ఇనివరి లోఇ సెగొండార్ యేసుడగ్రు వాతార్. వారు యేసుజ్ ఉండ్రి ప్రన్న వెన్బాతార్.

19 “ఓ బోదకినికి, ఒరెన్ పెండ్లి ఆతి వెనుక కొడొర్ సిల్లెండ సాతిజ వన్ని తంబెర్సి ఒన్నిసిజ్ ఇడె ఆజి కొడొర్ ఇడిదెజ్. అహె సాతివరి వందిజ్ కొడొర్ పుటిస్తెజ్వలె ఇజి మోసె సిత్తి రూలుదు మనాద్.

20 ఏలు సుడోఁ అ ఉండ్లి కాలమ్దు ఏడుగురు తంబెరిబు మహార్. తోల్సుర్దికాన్ ఉండ్లి బోదెలిదిజ్ పెండ్లి ఆతాన్. కొడోఁర్ సిల్లెండ సాతాన్.

21 సాతిజ్ నడిఁపి వాండ్రు ఒనిసిజ్ పెండ్లి ఆతాన్. వాండ్రుబా కొడోఁర్ సిల్లెండ సాతాన్. వెనుక కొగ్రి నడిఁపి దన్నిజ్ ఇడె ఆతాన్.

22 ఆహె ఏడుగురుబా దన్నిజ్ పెండ్లి ఆజి కొడోఁర్ సిల్లెండ సాత సాహార్. కడెవెరిదు అయ బోదెలిబా సాతాద్.

23 అహిజ సాతివరిబాణిజ్ మర్జి నిజినివెలె అ బోదెలి అయా ఏడు గురు లొణ ఎయిజ్ ఆల్ని ఆనాద్? ఏడుగురుదిజ్బా ఆది ఆల్ని ఆత మహాద్గదె?

24 యేసు వరిజ్ ఈహు వెహ్తాన్. “దేవుణు మాటెజ్ మీరు నెన్ఇదెర్. దేవుణుసత్తు ఎస్సా ఇజి మిజి నెన్ఇదెర్. అందెజె మీరు తపు వెహ్సానిదెర్.

25 సాతి వరిబాణిజ్ మర్జి నిజినివలె ఎయెర్బా పెండ్లి ఆవెర్. పెండ్లిదిజ్ సివెర్ వారు పరలోకమ్దు మన్ని దేవుణు దూతెజలెకెండ మంజినార్.

26 సతి వరిజ్ దేవుణు మర్జి నిక్కివందిజ్ మోసె రాస్తి పుస్తకమ్దు, వెయ్జి మహి తుపెజా డగ్రుహాన్ దేవుణు మోసెజ్ వర్గితి మాట మీరు సద్విఇదెరా? నాను, అబ్రాహం దేవుణు, ఇస్సాకు దేవుణు, యాకోబురిదేవుణు, ఇజి దేవుణు అయవలె వెహ్తాన్

27 అందెజె వాండ్రు సాతిసాహికార్ మాడిఁసిని దేవుణు ఆవెన్ బత్తిజి మన్నికార్ మాడిఁసిని దేవుణునె ఇజిమాటు సుడిఁజినాట్. సాతికార్బత్తివెర్ ఇజి మీరు వెహ్తాక గొప్ప తప్ప†.

విజు రూలుదు లొణ ముకెలమాతి రూలు ఎమేణిక?

28 యూదురిజ్ రూలు నెన్పిస్సివరి లొణ ఒరెన్బానె వాజి యేసు సదుకయరుజవెట వాదిసినిక వెహాన్. వారు మర్జి వెహ్తాజ్ అట్ఇవజ

† 12:27 12:27 అబ్రహాము, ఇస్సాకు, యాకోబు ఇనికార్ యూదురు పెరి అనిగొగెరు వారు నండొ పంటెజ ముందాల సాతసాహర్. గాని వారు ఏలు దేవుణుబాణిజ్ బత్తిజి వన్నిజ్ మాడిఁసి మంజినార్.

యేసువరిజ్ జబాబ్ సిత్తాన్ ఇజి నుడోజి వాండ్రు వెన్బాతాన్ దేవుణు సిత్తి విజు రూలుజలోఇ ముకెలమాతిక ఎమేణిక?”.

29 దన్నిజ్ యేసు వెహ్లాన్, “విజు వన్కాజ్ లోఇ ముకెలమాతిక యాకదె, “ఓ ఇస్తాయేలుదికిదెరా, మీరు వెండ్రు. ప్రబువాతి మా దేవుణు ఒరెండ్రె.

30 నీను నీ పూర్తి మన్సుదాన్, పూర్తి పాణమ్దాన్, పూర్తి బుద్ధిదాన్, పూర్తి సత్తుదాన్ ప్రబువాతి దేవుణుదిజ్ ప్రేమిస్తైజ్”.‡

31 దిన్నీ వెనుక ముకెలమాతి రూలు ఇనిక ఇహిజ, “నీను నిజినె ప్రేమిస్సిలెకెండ మహివరిజ్ విజేరిజ్ ప్రేమిస్అ”,§ యా రుండి రూలుజ మిస్సిక రూలుజ్ మరి ఎమేణికబా సిల్లెద్.

32 నస్తవలె అయ మణిసి వెహ్లాన్. ఓ బోదకినికి నీను బాగ వెహ్లా. “దేవుణు ఒరెండ్రె. వాండ్రు తప్ప మరి ఎయెన్ దేవుణు సిలెన్”, ఇజి నీను వెహ్లాక నిజమె.

33 నీ పూర్తి పాణమ్దాన్, పూర్తి బుద్ధదాన్ పూర్తి సత్తుదాన్ నీ దేవుణుఆతి ప్రబుజ్ ప్రేమిస్తైజ్, నిజి నీనె ప్రేమిస్సివజ మహివరిజ్ ప్రేమిస్సిక, దేవుణుదిజ్ సీజిని విజు పూజెజ మున్సు, దేవుణుదిజ్ కిజిని దూపమ్కాజ్ మున్సు నండో ముకెలమాతిక”.

34 యేసు వెహ్లాక వాండ్రు నెగ్రెండ అర్దం కిజి జబాబ్ వెహ్లాన్ ఇజి నుడోజి యేసు ఈహు వెహ్లాన్. “నీను దేవుణుదిజ్ ఏలుబడిః అడిగి మండ్రెజ్ డగు ఆతి. అబ్బెణాన్ ఎయెన్బా యేసుజ్ ఇనికబా వెన్బాదెజ్ దయరం సిల్లెద్.

35 ఒర్సు యేసు దేవుణుగుడిఃదు నెన్పిసి మహిజ్ ఈహు వెన్బాతాన్. రాజువజ వాని క్రిస్తు పూర్వమ్దు మహి దావీదురాజు కుటుమ్దు పుట్వాన్ ఇజి యూదురిజ్ రూలుజ్ నెన్పిసికార్ ఎండనిజ్ వెహ్లానార్?

36 దావీదురాజు దేవుణుఆత్తుదాన్ ఈహు వెహ్లాన్: “నాను నీ పగ వరిజ్ నీ పాదం అడ్డి ఇడ్మిదాక నీను నా ఉణెర్ పడక బసి మన్అ ఇజి

‡ 12:30 12:30 ద్విత్తి 6:4,5. § 12:31 12:31 తేవి 19:18.

ప్రబు నా ప్రబువెట వెహ్లాన్*.

37 దావీదురాజు క్రీస్తుజ్ ప్రబుఇజి కూక్సినాన్. అహిజ ఎలాగ క్రీస్తు వన్ని మరిసి ఆనాన్?". యేసు వెహ్లాక వెంజి లోకుర్విజేరె నండొ సర్ద ఆతార్.

38 యేసు లోకాజ్ నెన్పిసినివెలె ఈహు వెహ్లాన్. “యూదురి రూలుజ్ నెన్పిసినివరి వందిజ్ జాగర్త మండ్రు. వారు నండొ దరది నీరి సొక్క † తొడిగిజి బూలాదెజ్ కొరిజినార్. సత్తెజ నడిఃమి పెరికార్ ఇజి మాడిఃసి ఆదెజ్ కొరిజినార్.

39 యూదురి మీటిజ్ ఇండ్రొ సొహిజ ముకెలమాతి బాడ్డిదు బస్తెజ్, విందుదు సొహిజ బస్తెజ్ ముకెలమాతి బాడ్డిదు వారు కోర్జినార్.

40 ఇనిక సిల్లి ముండమణిసిజ్ మొసెం కిజి వన్నాజ్ కల్లితిక వారు ఒనార్. లోకుర్ విజేరె విరిజ్సుడఃజి గొప్ప నెగ్గికార్ ఇజి వెహ్లావజి వారు నండొ పార్దనం కిజినార్. నిని లోకాజ్ గొప్ప సిక్కు వానాద్”.

ముండ మన్ని అర్ప్తి నంద

41 యేసు దేవుణుగుడిఃదు సంత సీనిపెటె ఎద్రుబస్తాన్. దేవుణుగుడిఃదు వాతికార్ సంత పెటెదు డబ్బు అర్ప్తిమహిక వాండ్రు సుడఃజి మహాన్. ఆస్తిమన్నకార్ నండొండార్ నండొ డబ్బుజ్ ఆ పెటెదు అర్ప్తార్.

42 నస్తెవలె ఉండ్రె బీద ముండ మన్ని వాజి రుండి కాణిజ్ అర్ప్తాద్.

43 యేసు సిసూరిజ్ వన్నిడగ్రు కూక్సె, “నాను నిజం వెహ్లాన, దేవుణు నుడఃతిజ్ యా ఇనిక సిల్లి రాండి బోదెలి మహివిజేరిజ్ మున్ను లావు అర్ప్తాద్.

44 ఆస్తిమన్నకార్ వరిజ్ కల్లితి ఆస్తిబాణిజ్ అర్ప్తాద్. గాని అది దన్నిజ్ సిల్లిబాణిజ్ దన్నిజ్ బత్కిదెజ్ మన్నికెజ్ విజు సంత పెట్టెదు అర్ప్తాద్”, ఇజి వెహ్లాన్.

* 12:36 12:36 కీర్తన 110:1. † 12:38 12:38 యా నండొ దరది నీరి సిక్కు పెరి లోకు తొడిగిజి మహాన్.

13

యేసు గుడిఃవందిజ్ వెహ్సినాన్

1 యేసు దేవుణుగుడిఃదాన్ సొన్ని మహిజ్ వన్ని సిసూర్ లొఇ ఒరెన్, “ప్రబు యా పణుకుజ్ ఎస్సొ గొప్పవి యా మేడెజ్ ఎస్సొ గొప్పవి”, ఇజి వెహ్సన్.

2 పన్నిజ్ యేసు వెహ్సన్, “మీరు ఏలు సుడెఃజిని యా గొప్ప నెగెండ్ తోరజిని మేడెజ్ ఉండ్రి పణుకు ముస్సు మరి ఉండ్రి పణుకు నిల్పిమన్ ఏండ్ లోకుర్ వనకాజ్ లాగ్గు అర్షొరె పూర్తి నాసనం కినార్తె”.

3 యేసు దేవుణుగుడిః ఎద్రు ఒలివ గొరొత్, బస్తి మహిజ్ పేతురు, యాకోబు, యోహాను, అంద్రెయ ఇనికార్ మరి ఎయెర్బా వెన్ ఏండ్ యేసుజ్ వెన్బాతార్.

4 “యాకెజ్ ఎస్సెజ్ జర్గినెలె? ఇక్కెజ్ విజు జర్గిదెజ్ డగ్గు ఆతాద్. ఇజి తొరిసిని గుర్తు ఇనిక? మజి వెహ్సా.

5 యేసు వరిజ్ వెహ్సన్, “ఎయెర్బా మిజి మోసెం కిండ్ జాగర్త సుడెఃదు మండ్రు.

6 నండ్రి లోకుర్ నా పేరు ఇడెఃఆజి వానారెలె. “దేవుణు ఏర్పాటు కిత్తి షొక్తి క్రిస్తు నానె”, ఇజి వెహ్సినండ్రిడారిజ్ మోసెం కినార్తె.

7 మీరు విద్దెమ్కు వందిజ్ వినెదెర్లె. మరి విద్దెమ్కు వానెలె ఇజి సాటిసినిక వెనిదెర్లె. అయవలె తియెలామ. అక్కెజ్ విజు జర్గిదెజ్ వెలె. గాని యాక ఆక్కర్ ఆవద్.

8 లోకుర్ముస్సు లోకుర్ని దేసమ్కాజ్ ముస్సు దేసమ్కు విద్దెం ఆనాలె. అబ్బె ఇబ్బె నండ్రిబాన్ బూమి కడ్లినాద్దె. కరు వానాద్దె. యాక్కెజ్ విజు ఉండ్రి బోదెలి కియుదు అస్సెజ్ ముజల వానినొపిజ్ మొదొల్స్తిలెకెమండ్ ఇక్కెజ్ విజు జర్గిజి మహిజు ఆక్కర్ దినమ్కు వాజినాద్ ఇజి నెస్సెజానాద్.

9 మీరు జాగర్త మండ్రెజ్. లోకుర్ మిజి కొర్టుదు ఒపజెప్పొద్దె. యూదురి మీటిజ్ ఇల్కాజ్ మిజి కొరెడెఃజాణిజ్ డెయ్నార్లె. రాజుర్బ

ముందాల అదికారిజ ముందాల, నా ముస్కు నమకం ఇట్టివందిజ్ మిజి నిల్పార్లె. అయావెలె నా వందిజ్ సువార్త వెప్పిందెర్లె.

10 దేవుణు సువార్త బూమిముస్కు మని విజేరిజ్ ఆక్కర్ దినమ్కాజ్ ముజల వెహైజ్ వలె.

11 వారు మిజి తొప్పి ఒసి కోర్టుదు ఒప్పజెప్పివెలె మీరు అబ్బె ఇనిక వెహైజ్ ఇజి బెజ ఆమాట్. అయవలె దొహ్కెలె. వెప్పికిదెర్ మీరు ఆఇదెర్ దేవుణు ఆత్మ మిజి వెప్పికాదె మీరు వెప్పిదెర్”.

12 యేసు మరి వెహైజ్. “దాద్ది తంబేర్నిజ్ తంబెరిసి దాద్దిజ్ అప్పొసి మరిసిజ్ సహైజ్ ఒపజెప్పాన్లె. కొడొర్ అయ్సి అపొసిర్ ముస్కు గొడఃబఆజి వరిజ్ సప్పార్లె.

13 మీరు నా ముస్కు నమకం ఇట్టివందిజ్ విజేరె మీ ముస్కు పగదాన్ మంజినార్లె. ఆక్కర్దాక ఓరిస్సి వన్నిజ్ దేవుణు రక్కినార్లె.

దేవుణుగుడిః లొఇ నండొతియెల్ఆనిక ఉండ్రీ వానాద్లె

14 దేవుణుగుడిః లొఇ మండ్రెజ్ ఆఇ నాసనం కిని సెఇక ఆతిక ఉండ్రీ* దేవుణు గుడిఃదు నెగ్గి బాడ్డిదు నిల్పి మంజనిక సూణివలె (యాక సద్వినికాన్ అర్లం కిదెజ్ వలె) యూదయ దేసెమ్దు మంజనికార్ గొరొకాజ్ ఉహైజ్ వెలె.

15 ఇల్లు ముస్కు మన్నికార్ ఇనికబా సామానం తత్తెజ్ ఇజి మర్జి ఇండ్రొ సొన్మాట్.

16 గుడెదు పణి కిజి మహికార్ వరి పాత తత్తెజ్ ఇజి మర్జి ఇండ్రొ సొనిక ఆవద్.

17 ఆ దినమ్కాజ్ పొటద్ మన్ని వన్కాజ్ పాలు ఊట్పిసిని వనకాజ్ గొప్ప కన్లం.

18 ఇక పినికాలమ్దు రెవండ పార్లనం కిదు.

19 ఎందానిజ్ ఇహిజ దేవుణు యా లొకం పుటిస్తిబాణిజ్ అసి ఎలుదాక రెఇనిన్ని గొప్ప కన్లంకు వానె. నిన్నికెజ్ మరి ఎసెజ్బా రెఉ.

* 13:14 13:14 యా సెఇక ఇనికిజి వెహైజ్ సిల్లెద్ ఆఇ దేయమ్క మాలిపిట వందిజ్ నొ క్రిస్తుజ్ ఎద్రిసిని వన్ని వందినొ వెప్పినాన్. దిన్ని వందిజ్ దానియెల్ ప్రవక్త రాస్త మహాన్ 9:27; 11:31; 12:11.

20 దేవుణు ఆ కస్టం ఆతి రోస్కుతకు కివిండ మహిజ ఎయెన్బా తప్రె ఆదెజ్ అఅట్విన్. గాని దేవుణు ఎర్లిస్తివరి వందిజ్ ఆ రోస్కుకు దేవుణు తక్కు కిత్తాన్.

21 ఆ రొస్కాజ్ ఎయెర్బా ఇదిలో క్రిస్తు అబ్బె మనాన్, సిల్లిజు క్రిస్తు ఇబ్బె మనాన్, ఇజి వెప్టిజు వరి మాట నమ్మిమాట్.

22 ఆ కాలమ్దు నానె క్రిస్తు ఇజి అబద్దం వెహ్పికార్, నానె దేవుణు పొక్తి ప్రవక్త ఇజి అబద్దం వెహ్పికార్ వానార్. వారు నండో బమ్మాతి పణిజ్ ముజాల ఎసెజ్బా తొఇ నన్ని బమ్మాతి పణిజ్కిజి మోసెం కిదెజ్ సూణార్. అట్టిజు దేవుణు ఎర్లిస్తి మన్ని వరిజ్బా మోసెం కిదెజ్ సూణార్.

23 అందెజె మీరు జాగర్త మండ్రెజ్. నాను ముజాలె విజు మిజి వెప్తా మన్న.

లోకుమరిసి దేవుణుజాయ్దాన్ వానిరోజు

24-25 ఆ కస్టమాతి రోస్కుసొహి వెనుక పొదు సికటి ఆనాద్. నెల జాయ్ సివద్. సుక్కెజ్ ఆగసమ్దాన్ రాల్పె. ఆగాసమ్దు మన్నికెజ్ కద్దినె.

26 నస్తివలె లోకు మరిసియాతి నండో సత్తుదాన్ గొప్ప జాయ్దాన్ కూడితి సొకుదాన్ మోసొప్ ముస్కువానిక లోకుర్ సూణార్లె.

27 నాను నా దూతరిజ్ పొక్కానె యా లోకమ్ది కొసెజుదాన్ ఆగసమ్ది కొసెజుదాక నాల్లి మూలెజాణిజ్ దేవుణు ఎర్లిస్తి వరిజ్ ఉండ్రెబాన్ తపిస్సు.

బొడెమరాన్ది సజతి

28 బొడెమరాన్దిజ్ సుడొజి యాక మీరు నెస్సు. దన్ని ఆక్కుజ్ రాలజి సిగ్రిసినివలె ఎండకాలం డగ్రు ఆతాద్ ఇజి మీరు నెస్సిదెర్.

29 ఆయలెకెండెనె మీరు యాక్కుజ్ విజు జర్గిజినిక సుణివలె నాను మరజి వాదెజ్ డగ్రు ఆతాద్ ఇజి నెన్సినిదెర్లె.

30 యా సజతిజ్ విజు జార్గిని ముందాల య తరమ్దికార్ సావర్ ఇజి నాను మిజి నిజం వెహ్పిన్.

31 ఆగసం బూమి సిల్లెండ ఆనె. గాని నా మాటెజ్ ఎలాకాలం మంజినె.

ఎయెస్ నెస్ ఇ రోజు, ఎయెస్ నెస్ ఇ గడియ

32 నాను మర్జి వాని రోజువమదిజ్, గడియవందిజ్ ఎయెజ్ నెస్ ఏర్. బుబ్బనె ఆవిండ పరలోకమ్దు మన్ని దూతార్బా మరిసిబా నెస్ ఏర్.

33 యేసు మరి వెహ్సాన్, “మీరు పార్దనం కిజి జాగర్త మండ్రు. ఆ రోజు ఎనెజ్ వానాదొ మిజి తెలివద్.

34 ఎలాగ ఇహిజ ఒరెన్, ఎజుమాని వన్ని ఇల్లు వన్ని పణిమన్నిరిజ్ ఒపజెప్పి, వరివరిపణిజ్ వరి వరిజ్ తోరిసి, ఇల్లు కాపుదిజ్ ఒరెన్ వన్నిజ్ ఇడ్డి దేసం సొండ్రెజ్ సొహి వజనె.

35 అందెజె మీరు జాగర్త ఎద్దుసుడిజి మండ్రు. ఎందనిజ్ ఇహిజ ఇల్లు ఎజుమాని పొద్దు ఆతివెలె వానానొ, మదరెయ్దు వానానొ, కొరు కెరెని వెలె వానానొ, సిల్లిజ జాయ్ ఆతిజ వానానొ మిజి తెలివద్.

36 ఎజుమాని వందిజ్ ఎద్దు సుడిజి గడియదు వెటనె వాతిజ మీరు నిద్ర కిజి మనికవాండ్రు సుడుడెజ్ ఆవద్.

37 నాను మిజి వెహ్సాకదె విజేరిజ్ బా వెహ్సాన్. జాగర్త కాప్ కిదు”.

14

1 పస్కు పండొయ్ని, పులాజ్ ఆఇ రొట్టెజ్* పండొయ్ వాదెజ్ రుండి రోస్కు మనాద్. పెరిపుజెరిజుని, యూదుర్ రూలు నెస్ పిసినికార్ యేసుజ్ ఎలాగబా ఉపాయ్ కిజి అసి సపైజ్ సుడిజినార్.

2 “పండొయ్ లో ఇ వన్నిజ్ తొప్తాజ లోకు గొడబ కినార్ అందెజె పండొయచ లో ఇ పొని ఇజి వారు వెహ్సార్.

ఉండ్రె అయ్ లికోడొ: యేసు బురారు వాసనం నూనె వాక్తార్

3 యేసు బేతనియ ఇనినాటో సీమోను ఇన్ని వన్ని ఇండ్రొ బోజనమ్దిజ్ బస్తాన్. విండ్రు కుస్తురోగం ఆస్తిమహిజ్ యేసు నెగెండ

* 14:1 14:1 వినకవందిజ్ ముకెలమాతి మాటిజ అర్థం వెహ్సాని బుకుదు పండొయ్ మాట రాస్తిబాన్ సుడుడు

కిత్త మహాన్ నస్తవలె ఉండ్రీ బోదెలి నూనజ్ పణుకుదాన్ తయార్ కిత్తి ఉండ్రీ సీసాదు† నండో విలువమన్ని జటమామ్మి ఇని నెగ్గి వాసనం మన్ని నూనె తత్తాదె మూతడగ్గు రెక్కి యేసు బురాదు వాక్తాద్.

4-5 అబ్బె మహికార్ సెగొండార్ యాక సుడఃజి కోపమాజి వరిలోఇ వారె వెహ్తార్, “ఎందానిజ్ యా నూనె పాడు కిజినాద్? యా నూనె మూండ్రీ వందెజ్ దినారమ్జ్ ముస్కు డబ్బుదిజ్ పొర్ని అయ డబ్బు బీదది వరిజ్ సీదెజ్ ఆనాద్గదె”, ఇజి దన్నిజ్ గోలః‡ కిత్తార్.

6 నస్తవలె యేసు, “దన్నిజ్ ఉండ్రీ డిఃస్తు ఎందనిజ్ దన్నిజ్ అర్ల కిబిసినిదెర్? అది నజి నెగ్గి పణి కిత్తాద్.

7 బీదదికార్ ఎన్వెవలెబా మీవెట మంజినార్. వరిజ్ ఎనెజ్బా మీరు సాయం కిదెజానాద్. గాని నాను ఎలాకాలం మీవెట మన్ఏ.

8 అది కిదెజ్ అట్టిపణి విజు కిత్తాద్. నజి సమాది కిని ముజాల పీనుగు తయార్కిని అలవాటువజ నా ఒడఃల్దిజ్ వాసనం నూనె వాక్కి అది నజి తయార్ కిత్తాద్.

9 నాను మీవెట నిజం వెహ్సిన, యా బూమి ముస్కు ఎంబెబా దేవుణు నువార్త అది ఏలుబడిః వందిజ్ సువార్త సాటిసినివలె అది కిత్తి యా నెగ్గిపణి దన్నిజ్ ఎత్తు కినిలెకెండ సాటిసి మంజినాదెల”.

10 నస్తవలె పన్నెండు మణిసిర్ సిసూర్లోఇ ఒరెన్ ఇస్కరియోతు యూద ఇనికాన్ యూదురి పెరిపుజెరిజబాన్ సొన్ని యేసుజ్ ఒపజెప్తెజ్ తోడుః కిని ఇజి వెహ్తాన్.

11 యూదవెహ్తాక వెంజి పెరిపుజెరిజు సర్ల ఆతార్. వన్నిజ్ డబుజ్ సిసావ్ఇజి వారు ఒట్టు కిత్తార్. అందెజె యేసుజ్ ఒపజెప్తెజ్ యూద ఉండ్రీ అవ్కాసం సుడఃజి మహాన్.

యేసు సిసూర్వెట పస్కు బోజనం ఉణిజినాన్

12 పులాజ్ సిల్లి రొట్టెజ్ తయార్ కిని పస్కుపండోయ్ది మొదోహి దినం వాతాద్. అయ దినం దేవుణుదిజ్ మెండ గొరై పిల్లాదిజ్ పూజ

† 14:3 14:3 యా నునాజ్ పణుకు పేరు అలబాస్థరు ఇజి యా పణుకు నండో కరీదితిక తెల్లాజ్ మంజినాద్. యక గీసి లోకుర్ పునిజ్ తయార్ కిజినార్ ‡ 14:4-5 14:4-5 అయాకాలమ్దు ఉండ్రీ దినారి ఉండ్రీ రోజుది కూలి

కినిక యూదురి అలవాట్. యేసు సిసూర్ వన్ని డగ్రు వాజి, పస్కు బోజనం ఉండెజ్ నీవందిజ్ మాపుఎంబె సొన్ని తయార్ కిదెజ్ నీను కొరిజిని? ఇజి వెన్బతార్.

13 యేసు రిఎర్ సిసూరిజ్ కూక్కి, “మీరు పట్టుమ్దు సొండ్రు. అబ్బె ఒరెన్, కుండాదు ఏరు పిండజి మీ ఎద్రు వానాన్. మీరు వన్నివెట సొండ్రు.

14 వాండ్రు సొహి ఇండ్రొణి ఎజుమానిజ్, “నా సిసూర్ వెట పస్కు బోజనం కిదెజ్ఎంబె గది మనాద్ ఇజి బోదకినికాన్ నిజి వెన్బాజినాన్”, ఇజి వెప్పు.

15 నస్తివలె ఆ ఇల్లు ఎజుమాని విజు తయార్ఆతి మేడముస్కు మని పెరి గది ఉండ్రీ తోరిస్సాన్. అబ్బె మజి పస్కు బోజనం తయార్కిదు”, ఇజి వెప్తాండ్రై పొక్తాన్.

16 సిసూర్పట్టుమ్దు సొహారె యేసు వెప్తాలెకెండెనె విజు నుండెతార్. వారు పస్కు బోజనం తయార్ కితార్.

17 పొద్దు ఆతిజ్యేసు పన్నెండు మంది సిసూర్వెట అబ్బె వాతాన్.

18 వారు బోజనం కినివెలె యేసు వెప్తాన్, “మీ లోఇ ఒరెన్ నజి పగాతివరి కియుదు ఒపజెప్పాన్లై ఇజి నాను నిజం వెహ్సాన్”.

19 అక్క వెంజి వారు నండొదుకం ఆజి ఒరెన్ వెనుక ఒరెన్ “నాను ఆవిగదె? ఇజి వన్నిజ్ వెన్బాతార్.

20 యేసు వెప్తాన్, “మీరు పనెండు మనిసిర్లోఇ ఒరెన్, నావెట గినెదు రొట్టె ముండెక్కికాండ్రీ.

21 లోకుమరిసి నా వందిజ్ దేవుణు మాటదు రాస్తి మహిలెకెండ్ నాను సొనాన్లై. గాని లోకు మరిసియాతి నజి ఒపజెప్పి వన్నిజ్ గొప్ప కస్టం. వాండ్రు పుట్వండ మంజినిక ఇహిజ వన్నిజ్ ఎస్సానొ బాగ మహాద్ మరి”.

యేసుజ్ గుర్తుకిని బోజనం

§ 14:20 14:20 యేసుని వన్ని సిసూర్ బోజనం కితివెలె ఉండ్రై గినాది పట్కురసమ్ము రొట్టె ముడుజుక్తార్ డగ్రుమన్ని కాలెజ్నె ఈహు గిన్నదాన్ తినార్

22 వారు బోజనం కిజిమహిజ్‌యేసు ఉండ్రొట్టె అస్తాండ్రె దేవుణుదిజ్ వందనమ్‌కు వెప్పి ముకెజ్ కిజి సిసూరిజ్ సితాన్. “మీరు యక లోసితిండ్రు, ఇక నా ఒడోల్”, ఇజి వరిజ్ వెప్టాన్.

23 వెనుక యేసు ద్రాక్కు కల్లు మన్న గిన అసి దేవుణుదిజ్‌వందనమ్‌కు కిజి వరిజ్ సితాన్. వారు విజేరె ఆ గినదిక ఉటార్.

24 యేసు మరి వెప్టాన్. “ఇక్క నా నల, నండొండొరిజ్ వరి పాపమ్‌కు సెమిసైజ్ ఇజి కారిసిని. నా నల ఇక్కాదె దేవుణు నా నలదాన్ కిజిని ఒవుమానం.

25 నాను నిజం వెప్పిన, దేవుణు కినిఎలుబడిడు నాను కొతాజ్ ఉణి దినం దాక మరి ఎసెజ్‌బా ద్రాక్కు కల్లు ఉణెవి”.

26 మరి ఉండ్రె పాట* పార్తారె ఒలివ మరెక్ మన్ని గొరొన్ మున్కు సొతార్.

పేతురు యేసుజ్ నెన్‌ఎ ఇజి వెహ్నన్‌లె ఇజి ముజాల వెప్పినాన్

27 వారు సొనివెలె యేసు వరిజ్ వెప్టాన్. మీరు విజిదెరె నజి డిసి సొనిదెర్లె. ఎందనిజ్‌ఇహిజి దేవుణు మాటదు యాలెకెండ రాస్త మనాద్. “గొరెజ్ అడినివన్నిజ్ నాను కత్పాలె. గొరెజ్నె మంద సెద్రినె సొనెలె”.†

28 గాని దేవుణు నజి మర్జి బత్తుదు నిక్తివెనుక మిజి ఇంక ముజల గలీలయదు సొనాలె. ఇహోన్.

29 నస్తవలె పేతురు, “విజేరె మీ వందిజ్ నిల్దెజ్ అట్‌ఎండ డిసి సొహిజ్‌బా నాను నిజి డిస్ సొన్‌ఎ”.

30 యేసు వెప్టాన్, “ఓ పేతురు, నాను నిజి నిజం వెప్పిన, యా షొదొయ్ కొరు రిజకెరెని ముజల నీను నజి నెన్‌ఎ ఇజి ముసార్ వెప్పాలె”.

31 గాని పేతురు ఒవుకొడెఎండ ఒద్దె డట్టం వెప్టాన్, “నాను నీ వెట సొత్తిజ సొన్. నాను నిజి నెన్‌ఎ ఇజి వెహ్‌ఎ”. అయ వజనె వారు విజేరె వెప్టార్.

* 14:26 14:26 కీర్తన 115-118 బోజనం కిత్తి వీజత్తిజ పారజ మహార్ † 14:27 14:27 జెకరియ 13:7.

యేసు గెత్తేమనె టోటదు పార్దనం కిజినాన్

32 నస్తివలె యేసు, వన్నిసిసూర్వెట గెత్తేమనె ఇని టోటదు సాహర్. యేసు సిసూరిజ్, “నాను సొన్ని పార్దనం కిజి మర్జివాని దాక మీరు ఇబ్బె మండ్రు”, ఇజి వెప్టాన్.

33 యేసు పేత్రుజ్, యాకోబుజ్, యోహానుజ్ వన్ని వెట ఒతాన్. వాండ్రు నండొ దుకం ఆజి బాద ఆదెజ్ మొదోల్స్తాన్.

34 వాండ్రు వరిజ్ వెప్టాన్, “సాదెజ్ డగ్రు ఆతిలెకెండే మన్ను బరిస్సెజ్ అట్ఇ నస్సొ బాదనజీ కల్లిజినాద్. మీరు ఇబ్బెనె బసి నా వెటి తెల్లి మండ్రు.

35 యేసు అబ్బెణిజ్ సెగం దూరం సొహండ్రె పడిగ్జి అర్తాండ్రె “ఓబా, నిజి ఇన్దమాతివజి యా కస్టమ్కాణ్ నజీ తప్రిన్అ”, ఇజి పార్దనం కితాన్.

36 యేసు దేవుణుదిజ్ ఈహు వెప్టాన్, “ఓ బా నీను విజు కిదెజ్అట్టి. యా కస్టమ్కు నా బాణిజ్లాగ్అ. గాని నా ఇన్దమ్వజి ఆవద్, నీ ఇన్దమ్వజనె ఆవద్”.

37 పార్దనం కితివెనుక యేసు సిసూర్డగ్రు సొహిజ్ వారు నిద్ర కిజి మహార్, “ఓ సీమోను, నీను నిద్ర కిజినిదా? ఉండ్రీ గంటబా తెలి ఆజి మండ్రెజ్ మీరు అట్ఇదెరా?”, ఇజి పేతురుజ్ వెన్బాతాన్.

38 సయ్యును మిజి పరిస కిజి తప్పదు అన్వండ ఇహిజి పార్దనం కిజి తెలి ఆజి మండ్రు ఆత్తు తయార్నె, గాని ఒడొల్దిజ్ సత్తు సిల్లెండ ఆజినాద్.

39 యేసు మరి ఒర్పు సొన్ని ముజుల్ వెప్టా మాటెజ్నె వెప్సొ పార్దనం కితాన్.

40 యేసు మర్జివాజి సుడొతిజ్ సిసూర్ మరి నిద్ర కిజి మహార్. ఎందానిజ్ ఇహిజి పరి కణుకు రెప్పెజ్ బరుదాన్ ముగ్జి మహా. నస్తివలె వారు యేసుజ్ ఇనిక వెప్టాజొ తెలివితాద్.

41 యేసు ముసారి వాజి సిసూర్ నిద్ర కిజి మహిక సుడొజి పరిజ్ వెప్టాన్, “ఏలుబ మీరు నిద్ర కిజి రోమ్జినిదెరా? ఏలు ఆనాద్.

ఇదిలో, లోకుమరిసియాతి నజీ సెఇవరికియుదు ఒపజెప్పి గడియ డగ్రు వాతాద్.

42 లెదు, ఏలు మాట్ వరివెట. దసూలాదెజ్ సొనాట్ ఇదిలో నజీ ఒపజెప్పికాన్ వాజినాన్”.

యేసుజ్ అరెస్టి కిజినార్

43 యేసు యా మాటెజ్ వెప్పిమహిజ్ పన్నెండు మనిసిర్ సిసూర్లోఇ ఒరెనాతి ఇస్కరి యోతు యూద ఇనికాన్ అబ్బె వాతాన్. పెరిపుజేరిజు లోకురి పెద్దలుజు పోక్తిమన్ని మందలోకుర్ కూర్దెజ్, కోణెజ్ అస్తారె వన్నివెట వాతర్.

44 యేసుజ్ ఒపజెప్పికాన్, “నాను ఎయెరిజ్ ముద్దు కినానొ వన్నిజ్ మీరు తొహసి జాగర్త ఒతు”, ఇజి ముజల వరిజ్ ఉండ్రీ గుర్తులెకెండె వెప్తా మహాన్.

45 యూద వెటనె యేసుడగ్రు వాతాండ్రె, “ఓ బోదకినికి’ ఇజి వెప్పి వన్నిజ్ పొంబితాండ్రె ముదు కిత్తాన్.

46 నస్తివలె వన్నివెట వతిమహిలోకుర్ యేసుజ్ అస్తారె తొప్తార్.

47 వెటనె యేసుడగ్రు మహిసిసూర్ లోఇ ఒరెన్, వన్ని కూర్ద లాగ్జి విజెరి ముస్కు పెరిపుజేరిజు ముస్కు మన్ని పణిమనిసి ఆతి వని గిబ్బి తెవు కత్తాన్.

48 యేసు వెప్తాన్, “నాను డొజవాండ్రునా? నజీ అసైజ్ కూర్దెజ్ కోణెజ్ అసి ఎందనిజ్ మీరు వాతిదెర్?

49 రోజు నాను మీ వెటనె మంజి దేవుణుగుడిదు నెన్పిస్త గదె. అయవలె మీరు నజీ ఎందనిజ్ అన్ఇతిదెర్? గాని దేవుణు మాటదు రాస్తివజ ఇక విజు ఈహు జగ్గిదెజ్ వెలె”.

50 నస్తివలె వన్ని సిసూర్ విజెరె వన్నిజ్ డిస్తారె ఉహ్కాక్ సొహార్.

51-52 ఒరెన్ దజడాఁయెన్, యేసు వెనుక, లోకుర్ వెట సొన్ని మహాన్. వాండ్రు సొక్క తొడగివిండ ఉండ్రీ పాతనె పిడగిత మహాన్. వారు వన్నిజ్ అస్తిజ్ వాండ్రు పిడిగితిమన్ని పాతడిసి డుమ్డ ఆతాండ్రె ఉహ్కాన్.

యేసుజ్ నన్హద్రి సజంఱని యూదురి కొర్టునడిఱిమి నిల్వ్తార్.

53 యేసుజ్ తొప్పొ ఒతికార్ వన్నిజ్ విజెరిపుజేరిజ మున్కు పెరిపుజెరిబాన్ తత్తార్. పెరిపుజెరిజ్ విజేరె, పెద్దెల్జు, యూదురి రూలుజ్ నెన్పిసినికార్ అబ్బె కూడ్డి వాత మహార్.

54 యేసుజ్ విజేరి మున్కు పెరిపుజెరిజ ఇండ్రో ఒసిమహిజ్, పేతురు వెనుక దూరమ్దాన్ సొన్ని డేవ దాక వాతాన్. వాండ్రు అబ్బె కావ్కినివరివెట బస్తాండ్రె సిసు కాయ్జి మహాన్.

55 పెరిపుజెరిజు విజేరె, అబ్బె కూడ్డి వాతి నన్హద్రిం సజం విజు యేసుజ్ సప్తెజ్ తగితి రుజుప్ వందిజ్ వన్ని ఎద్దు అబద్దం వెప్పివరిజ్ రెబాజి మహార్. గాని వన్నిజ్ సప్తెజ్ అగితి రుజుప్ వెప్పి ఎయెర్బా దొహ్కవ్తార్.

56 నండొండార్ వన్నిమున్కు అబద్దం సాసెమ్కు వెప్తార్. గాని ఒరెన్ వెప్తాక మరి ఒరెన్ వెప్తా దనిజ్ తేడఱి మహాద్.

57 నస్తవలె నెగొండార్ వన్నిమున్కు ఈహు అబద్దం సాసెమ్కు వెప్తార్.

58 “లోకు తొప్తా యా దేవుణుగుడిఱిదిజ్ నాను అర్ప్పి విసిర్జి, మూండ్రె రొస్కాజ్ లోకు కీదు పణి ఆఎండ మరి ఉండ్రె దేవుణుగుడిఱి తొప్పొ ఇజి వాండ్రు వెప్తాక మాప్వెహాప్”, ఇజి వారు వెప్తార్.

59 గాని వారు వెప్తా సాస్యమ్బా ఒరెన్ వెప్తాక మరి ఒరెన్ వెప్తా దనిజ్ తేడఱి ఆతాద్.

60 నస్తవలె విజెరి మున్కు పెరిపుజెరి నిజితాండ్రె యేసుజ్ వెన్బాతాన్, “నీను ఇనికబా మర్జి వెహ్ఇదా? వీరు నీ మున్కు వెప్పిని యా మాటజ్ ఇనికెజ్?”.

61 గాని యేసు ఇనికబా మర్జి వెహ్ఎండ అలెతాన్. విజేరె పుజెరిజ మున్కు పెరిపుజేరి యేసుజ్ మరి వెన్బాతాన్, “నీను దేవుణు మరిసిఆతి క్రిస్తునా?”.

62 యేసు వెప్తాన్, “నానె, లోకుమరిసియాతి నాను గొప్ప అతికారం మన్ని దేవుణు ఉణెర్ పడఱికాదు బసిమంజినిక, సయణిదెర్ మరి ఆగసమ్దు దాన్ మొసాప్ మున్కు నాను వానిక మీరు సూణిదెర్లె”.

63-64 విజెరి పెరిపుజెరి ముస్కు పెరి పుజేరి యేసు వెహ్తాక వెంజి వన్ని సొక వాండ్రె కిసె ఆతాండ్రె‡. వెహ్తాన్, “మరి ఇంక సాసిరిజ్ అవ్ నరం సిల్లెద్. వాండ్రు వెహ్తాక మీరు వెహిదెర్. వాండ్రు దేవుణు దూసిసి వర్ గితిక మీరు వెహిదెర్ దన్నివందిజ్ మీరు ఇనిక వెహ్సినిదెర్? యేసు దేవుణుదిజ్ దూసిస్తి వందిజ్ సిక్కు కిజి సపైజె ఇజి విజేరె ఒప్పుకొటార్.

65 నస్తివలె సెగొండార్ యేసు ముస్కు పూస్తార్. వారు గరండదాన్ వన్ని కణుకేజ తొప్పి కణుకేజ్ మూక్తారె వన్నిజ్ గుతార్. నిజి ఎయెర్ గుతార్ ఇజి తొవండ వెహ్ అ”, ఇజి వన్నివెట వెహ్తార్. జమానుజుబా యేసుజ్ కికాణిజ్ డెయ్ తారె ఒత్తార్.

యేసుజ్ నానునెన్ ఎ ఇజి పేతురు వెహ్సి నాన్

66 పేతురు విజెరి ముస్కు పెరి పుజెరి అర్ జుదు మహివలె అయ ఇండ్రెణి పణి మన్ని ఉండ్రె అబ్బె వాతాద్.

67 పేతురు సిసు కాయ్ జిమహిక నుడేజి వాండ్రు ఎయెన్ ఇజి నెస్తెజ్ అది నెగ్రెండ సుడిఃతాద్. “నీనుబా నజరేతు వాండ్రు ఆతి యేసువెట మహికి”, ఇజి అది వెహ్తాద్.

68 అందెజె పేతురు, “నీను ఇనిక వర్గిజినిదొ నజి తెలివద్”, ఇజి వెహ్సి వెల్లి గవునిడగ్రు సొహాన్. నస్తివలె కొరు కెరెతాద్.

69 అయ పణికినికాద్ పేతుజ్ గవునిడగ్రు నుడేజి అబ్బె నిహిమహి వరివెట మరి వెహ్తాద్, “వీండ్రు వరిలో ఇమహ్ కాన్ ఒరేన్”.

70 గాని పేతురు మరి, “నాను ఆవి ఇజి వెహ్తాన్. సణెం సొహివెనుక పేతురు డగ్రు నిహిమహికార్, “నీను గలీలయదికి, నిజం నీనుబా వరిలో ఇ ఒరేన్”, ఇజి వెహ్తార్.

71 నస్తివలె పేతురు, “మీరు వెహ్ సిని వన్నిజ్ నజి నెన్ ఎ ఇజి వెహ్సి వన్నిజ్ వాండ్రె నయివ్ సీబె ఆజి ఒట్టు కితాన్.

‡ 14:63-64 14:63-64 నండొ కోపం ఆతాద్ ఇజి తొరిస్టెజ్ సొక్క కిస్సార్. గాని విజెరి పుజెరి ముస్కు మన్ని పెరి పుజెరి వన్ని సొక్క కిస్టెజ్ అవద్ ఇజి లేవి. 21:10 దు రాస్త మనాద్.

72 వెటనె రిజ ఒర్సు కొరు కెరెతాద్. నస్తివలె పేతురు, యేసు వన్నివెట, “కొరు రిజ కెరెని ముజల నీను నజి నెన్ ఏ ఇజి ముసార్ వెప్పిలై”, ఇజి వెప్తిమాట ఎత్తు కితాండ్రై నండో దుకమాజి అడఃబతాన్.

15

యేసుజ్ తొప్పిపిలాతుజ్ ఒపజెప్పినార్

1 పెందాల సీకటి మన్బునె, పెరిపుజెరిజు, యూదపెదెలుజు, యూదురి రూలుజ్ నెన్పిసినికార్, సన్హద్రిం సజమ్దికార్ విజేరె కూడ్డి యేసుజ్ ఎలాగ సప్తెజ్ ఇజి ఆలోసనం కితార్. వారు వన్నిజ్ తొప్పి ఒత్తారె రోమ దేసెమ్ది అతికారిఆతి పిలాతుజ్ ఒపజెప్తార్.

2 “నీను యూదురి రాజునా?”, ఇజి పిలాతు యేసుజ్ వెన్బాతాన్. నస్తివలె యేసు, “ఒబ నీను వెప్తిలెకెండెనె”, ఇజి వెప్తార్.

3 పెరిపుజెరిజు యేసుముస్సు నండో తప్పజ్ మొప్తార్.

4 నస్తివలె పిలాతు యేసుజ్ మరి వెన్బాతాన్, “నీను మర్జి ఇనికబా వెప్పిదా? వీరు నీ ముస్సు ఎస్సొ తప్పజ్ మొప్పినార్ గదె”.

5 అవొ వెప్తితిజ్బా యేసు ఇని మాటబా మర్జి వెహ్ ఎతాన్. అక్క సుడఃజి పిలాతు బమ్మ ఆతాన్.

6 ఏంటు ఏంటు కిని పస్సు పండొయ్లిజ్ లోకుర్ కోరిజిని ఒరెన్ కయ్దువన్నిజ్ విడుదల సీదేజ్ పిలాతుజ్ అలవాటు.

7 అయవలె బరబ్బుఇనికాన్ ఒరెన్ అన్నయవాండ్రు నన్నికాన్ జెలిదు మహాన్. వాండ్రు, వన్నివెట మహికార్, ఏలుబడిః కినివరిజ్ ఎద్రిస్తారె నెణొండారిజ్ సప్త మహార్. అందెజె వరిజ్జలిదు ఇట్త మహార్.

8 లోకుర్ పిలాతుబాన్ వాజి, “నీను కిని ఆలవాటువజి ఒరెన్వన్నిజ్ డిఃసి సిఅ”, ఇజి వెప్తార్.

9-10 పెరిపుజెరిజు గోస ఆతారె యేసుజ్ నజి ఒపజెప్తార్ ఇజి పిలాతు నెస్తాన్. అందెజె వాండ్రు “యూదురిరాజుజ్ నాను మిజి డిఃసి సీదెజ్ కొరిజినిదెరా? ఇజి వెన్బాతాన్.

11 గాని పెరిపుజెరిబు బరబ్బేజ్ డిసి సీజి యేసుజ్ నప్తెజ్ ఇజి ఆతికారి ఒప్పిలెకెండ్ వెహ్లాన్ ఇజి లోకురిజ్ రేప్పి మహార్.

12 నస్తవలె పిలాతు, “యూదురిరాజు ఇని మీరు వెహ్లాసినివన్నిజ్ నాను ఇనిక కిదెజ్?”, ఇజి వెన్బాతాన్.

13 వారు, “వన్నిజ్ సిలువ పొక్అ”, ఇజి నండొ డేల్స్తార్.

14 అందెజె పిలాతు, “ఎందనిజ్ వన్నిజ్ సిలువ పొక్తెజ్? వాండ్రు ఇని తవువణి కివన్”, ఇజి వెహ్లాన్. గాని వారు, “వన్నిజ్ సిలువ డెయ్జి నవ్అ”, ఇజి నండొ డేల్స్తార్.

15 పిలాతు లోకాజ్సర్ద కిబిస్తేజ్ బరబ్బేజ్ విడుఃదల కితాన్, యేసుజ్ కొర్దజాణిజ్ డెయ్బిసి. సిలువ పొక్తెజ్ ఒపజెప్తాన్.

సయ్నమ్దికార్యేసుజ్ వెక్రిస్తార్

16 నస్తవలె సయ్నమ్దికార్ యేసుజ్ ప్రెటోరియం ఇని పిలాతుని పెరిఇండ్రొ ఒతారె అబ్బె మహి సయ్నమ్ది వరిజ్ విజేరిజ్ కూడుప్తార్.

17 వారు యేసుజ్ ఎరాని రంగుది నీరి సొక్క పొర్పిసి సాప్పాణిజ్ అటారె ఉండ్రె టోపి తయార్ కిజి బురాదు ఇడెఃతార్.

18 “యూదురి రాజు గెల్పిఅ? ఇజి వెహ్లా వారు యేసుజ్ వెక్రిస్తార్.

19 వారు మరి మరి డుడుడాన్ వన్ని బురాదు డెయ్తారె వన్నిముస్కు పూస్తార్. వెనుక ముణుకుజ్ ఊర్జి వన్నిజ్ మాడిసి వెక్రిస్తార్.

20 వారు వెక్రిసి విజితి వెనుక వన్నిజ్ తొడిగిసి మహి ఎరాని సొక్క లాగ్గి వన్ని నీరి సొక్క తొడిగిస్తారె సిలువ పొక్తెజ్ వన్నిజ్ ఒత్తార్.

యేసుజ్ సిలువదు డెయ్జినార్

21 కురేనియాదికాన్ సీమోను ఇని ఒరెన్ ఉండ్రె నాటోహాన్ అయసరి వాజి మహాన్. నస్తవలె యేసువందిజ్ సిలువ పిండెడెజ్ సయ్నమ్దికార్ సీమోనుజ్ బలవంతం కిత్తార్. సీమోను, అలెక్సందరుని, రూపుఇని వరి అప్పొసి.

22 వారు గొల్లొతఇని బాడ్డిదు యేసుజ్ తత్తర్. గొల్లొత ఇహ్జి బుర్ర పిణికి బాడ్డిఇజి అర్దం.

23 అబె యేసుజ్ ఉండెజ్ ద్రాక్కుకలుదు బోలం* ఇని సేందుమాయం కల్ప్పి సిత్తర్. గాని వాండ్లు కెవితాన్.

24 సయ్నమ్దికార్ యేసుజ్ సిలువదు డెయ్యార్. వెనుక వన్ని సొక్కెజ్ ఎయెజ్ దొహ్కె ఇజి నెస్సెజ్ సీటిజ్ పొక్తారె వని సొక్కెజ్ సీబె ఆత్తార్.

25 పెందాల తొమ్మిది గంటెజ్ యేసుజ్ సిలువ డెయ్తార్.

26 “యూదురిజ్ రాజు”, ఇజి యేసుముస్కు మోప్తి నేరం బోర్డుదు రాసి సిలువదు ఇత్తార్.

27-28 యేసువెట రిఎర్ డొజారిజ్ సిలువదు పొక్తార్. ఒరెన్ వన్నిజ్ ఉణెర్ పడెకాదు ఉండ్రీ సిలువదు, మరి ఒరెన్ వన్నిజ్ డేబ్ర పడెకాదు ఉండ్రీ సిలువదు.

29-30 నస్తివలె అయ సరిదాన్ సొన్నిమహికార్ వరి బురదూక్కి యేసుజ్ దూసిస్తార్, “ఒహ్ దేవుణుగుడిడిజ్ అర్ప్పి విసీర్జి మూండ్రీ రొస్కాజ్ నాను తొహ్కె నిజి నీనె రక్కిసి. సిలువదాన్ డిగ్జి రఅ” ఇహ్.

31-32 అయవజనె పెరిపుజెరిజుని యూదురి రూలునెన్ పిసినికార్, “వీండ్రు మహివరిజ్ రక్కిస్తాన్. గాని వీండ్రు వినిజె రక్కిస్తెజ్ అట్ ఎన్. ఇస్తాయెలురాజు ఆతి క్రిస్తు ఏలు సిలువదాన్ డిగ్జి వాతిజ అక్క సూణాపె మాపు నమినావ్”, ఇజి ఒరెన్ వెట ఒరెన్ వెప్పి వన్నిజ్ వెక్కిస్తార్. యేసువెట సిలువ డెయెఆతి డొజారుజుబా వన్నిజ్ వెక్కిస్తార్.

యేసు సిలువముస్కు పాణం డిస్తాన్

33 వేడె పన్నెండు గంటెజాణిజ్ మూండ్రీ గంటేజ్ దాక దేసం విజు సికటి ఆత్తార్.

34 మూండ్రీ గంటేజ్ యేసు, “ఎలోయ, ఎలోయ లమ సబక్తాని”, ఇజి డటం డేల్లి వెహ్తాన్. దని అర్దం ఇనిక ఇహిజ, “నా దేవుణు, నా దేవుణు నజి ఎందనిజ్ నీను డిస్తి” ఇజి.

* 15:23 15:23 బోలం కల్పతిజ నొప్పి నెన్ ఏండ ఆనాద్

35 బానె నిహికార్ సెగొండార్ యామాట వెహారె, “ఇదిలో వీండ్రు ఎలియేజ్ కూక్సినాన్” ఇహార్.

36 ఒరెన్ ఉహ్కీ సొన్ని దూతి తత్తాండ్రె సెందు ద్రాక్కు కలుదు ముడఃక్కి ఉండ్రీ డుడ్డుదాన్ యేసుజ్ ఉండ్రేజ్ వెయ్యు అందిస్తాన్. “సణెం మండ్రు. వీలియ వాజి వినిజ్ డిప్పాండ్రై సీలేనొ నూణాట్”, ఇజి వాండ్రు వెహ్హాన్.

37 నస్త్రీవలె యేసు డటం డేల్స్తాండ్రై పాణం డిఃస్తాన్.

38 అయవలె యెరూసలేమ్దు మహి దేవుణు గుడిఃదు మహి తెర ముస్కుహాన్ అడిగిదాక కింజితాదె రుండి ముక్కెజ్ ఆతె.

39 సిలువ డెఃయ్లిబాన్ నిహిమహి సయనమ్ది మంద మణిసిరిజ్, యేసు ఈహు డేల్స్తాండ్రై పాణం డిఃస్తిక సుడఃజి, “వీండ్రు నిజం దేవుణు మరిసినె”, ఇజి వెహ్హాన్.

40 సెగొండ్రే అయ్లికొడొక్ దూరం నిల్చి సుడఃజిమహె. వన్కాజ్ లొఇ మగ్గలేనె మరియు, ఇజిరి యాకోబు, యోసె ఇనివరి అయ్సిఆతి మరియు, సలోమి ఇనికెజ్మహె.

41 యేసు గలీలయదు మహివలె ఇవిక్వన్నివెట సొన్ని వన్కిజ్ అవ్సరమాతికెజ్ కిజిమహె. ఇవిక్ఆఎండ్రె యెరూసలేమ్దు యేసువెట వాతి నండ్రొ అయ్లికొడొక్బా అబ్బె మహె.

యేసు పినుగు సమాదిదు ఇడ్టార్

42-43 అరిమతయి ఇని పట్టుమ్దికాన్ యోసీపుఇని ఒరెన్ అబ్బె మహాన్. వాండ్రు సన్హద్రిం సజమ్దు మన్నివరిలొఇ పెరికాన్ ఒరెన్. దేవుణు ఏలుబడిః వందిజ్ వాండ్రు ఎద్రు సుడఃజి మహాన్. వీండ్రు సొన్ని, దయ్ రమ్దాన్, యేసు పినుగు సిలువ ముస్కుహాన్ జాయ్ మనుబునె డిప్తెజ్ పిలాతుబాన్ సెలవలొస్తాన్. అయ దినం విస్త్రాంతిదినం ముజాల మహి తయార్ కినిదినం. అందెజె అయ తయార్ కినిదినం పొదొయ్నె యోసీపు పిలాతుబాన్ సెలవ లొస్తెజ్ సొహాన్.

44 యేసు ఎస్కాండె సాతాన్ ఇజి వెంజి పిలాతు బమ్మ ఆతాన్. సయ్నమ్ది వరిఅతికారిజ్ కూక్కి వెన్బాతిజ్ యేసు ఎస్కాండె సాతాన్ ఇజి నెస్తాన్.

45 యేసు సాతాన్ ఇజి సయ్నమ్ది వరిఅతికారి వెహి మాట పిలాతు వెంజి యోసిపుజ్ యేసుజ్ పినుగు ఒపజెప్తాన్.

46 యోసిపు నెగ్గి తెల్లాని పాత కొడెఃజితసి, పినుగు సిలువదాన్ డిఃప్పి అయ పాతెజాణ్ పినుగుదిజ్ సుటిసి సటుదిజ్ దొల్స్సి దూకిదు ఇడ్తాన్. ఉండ్రీ గుండ్రని సెప్ప పణుకు సడిపిసి దూకిదిజ్ అడ్డు కిత్తాండ్రె మూక్తాన్.

47 మగ్గలేనె మరియు, యోసె అయ్సిఆతి మరియు యేసు పినుగుదిజ్ ఇడ్డిబాడ్డి సుడెఃతె.

16

యేసు మర్రి నిజితాన్

1 విస్తాంతిదినం గడిఃస్తిసాహివెనుక, మగ్గలేని మరియు, యాకోబు అయ్సి మరియు, సలోమి, ఇనికెజ్ యేసు పినుగుదిజ్ రాస్తాజ్ వాసనం నూనె కొడిఃజి తత్తె.

2 వారమ్దిజ్ మొదోహి దినమ్దు పెందాల్పె నిజ్జి పొద్దు సోసి మహివలె అవిక్సమాది డగ్గు సాహె.

3 సమాది డగ్గు సొన్ని మహిజ్ అవిక్ “సమాది మూక్తి పణుకు మా వందిజ్ ఎయెర్ గూర్ప్పూర్?” , ఇహె.

4 నస్తివలె అవిక్ సుడెఃతిజ్ ఎయెరో అయ పెరిపణుకు సమాదిదాన్ గూర్ప్పిలెకెండ తోరితాద్. అది ఒద్దె పెరిక

5 నస్తివలె అవిక్అయ సమాది లొఇ వజ్జి సాహిజ్ నీరి తెల్లాని సొక్క పొర్పాజి ఉణెర్ పడఃకాద్ బస్తి మహి ఒరెన్ దజ్డాయెనుజ్ సుడెఃతె. వన్నిజ్ సుడెఃజి అవిక్నండొ తియెల్ఆతె.

6 అయ దజ్డాయెన్ వరివెట, “తియెల్ ఆమాట్, సిలువ పొకె ఆతి మన్ని నజరేతు వాండ్రు ఆతి యేసుజ్ మీరు రెబాజినిదెరా?

వాండ్లు ఇబ్బె సిల్లెన్. వాండ్లు బత్తిజి నిజిత మనాన్. వన్నిజ్ ఇడ్డి బాడ్డి సుడ్డెదు.

7 వాండ్లు మిజీ ఇంక ముజాల గలీలయ మీరు సొన్నినాన్ వాండ్లు మిజీ వెప్తివజ మీరు అబ్బెవన్నిజ్ సూణిదెల్లె ఇజి సిసురిజ్ మరి పేతురుజ్ వెప్తు”, ఇజి వెప్తున్.

8 అక్క వెవెనె అవిక్ వణక్సి బమ్మ ఆజి సమాదిదాన్ వెల్లి వాజి బాణిజ్ ఉవ్వాక్సి సొహె. అవిక్ తియెల్ ఆతెనె ఎయెర్వెటబా ఇనికబా వెవ్ఉతె.

యేసు మగ్గలేని మరియెజ్ తోరె ఆతాన్

9 యేసు ఆదివారం పెందాల్పె సమాదిదాన్ బత్తిజినిజ్జి మగ్గలెనె మరియెజ్ తోరె ఆతాన్. యా మరియ ఎయెర్ ఇహిజ యేసు ఏడు దెయమ్మాజ్ ఉల్పి నెగెండ్ కిత్తి అయ్లి కొణ్ణె.

10 యేసువెట మహికార్ యేసు సాతిజ్ దుకమ్దాన్ ఒడ్డెబిజి అడఃబాజి మహిజ్, అది సొహదె విజు సజతిజ్ వరిజ్ వెప్తుద్.

11 యేసు బత్తిజి నిజితాండ్రె నజీ తోరె ఆతాన్ ఇజి అది వెప్తి మాట వారు నమ్మివ్తార్.

యేసు రిఎర్ సిసూరిజ్ తోరెఆతాన్

12 వెనుక రిఎర్ సిసుర్ ఉండ్రె నాటో నడిసి సొన్నిమహిజ్ యేసు వరిజ్ తోరె ఆతాన్. గాని ఆఇ మూర్తి వజ తోరెఆతాన్.

13 వారు సొన్ని, మహి సిసూరిజ్ యా సజతి వెప్తుర్. గాని వారు యా రిఎరి మాటేజబా నమ్మివ్తార్.

యేసు పదకొండు మణిసి సిసూరిజ్ తోరెఆతాన్

14 మరి ఒర్పుపదకొండు మణిసి సిసూర్ బోజనం కిజిమహివలె యేసువరిజ్ తోరె ఆతాన్. యేసు నిజితి వెనుక వన్నిజ్ సుడ్డెతివరి మాట నమ్మివ్తాతివందిజ్, వరి అనుమానమ్దిజ్ యేసు వరిజ్గటిజ వెప్తున్.

15 యేసు వరివెట, “మీరు లోకం ముస్సు మని విజు దేసమ్కాజ్ సొన్ని దేవుణు సువార్త విజేరిజ్ వెప్తు.

16 ఎయెర్ బా నా ముస్కు నమకం ఇడ్జి బాప్తిసం లాగెఆతిజ వరిజ్ దేవుణు రక్సిస్సాన్. గాని నా ముస్కు నమకం ఇడ్ఇతి వరిజ్ సిక్కు వానాద్.

17 ఎయెర్ నజి నమ్మినారొ వారు యా బమ్మాతి పణిజ్ కిదెజ్ అట్నార్. అక్కెజ్ ఇనికెజ్ ఇహిజ నా పేరుదాన్ వారు దెయమ్ కాజ్ ఉల్స్వార్. వారు కొత్తబాసెజ్ వర్గినార్.

18 సారాస్కాజ్ అస్సిజ్ బా అవిక్ కట్టిజ్ బా సావీర్. ఇనికబా గొప్ప వినమాతిక ఉటిజ్ బా సావీర్. జబ్బు ఆతివరి ముస్కు కికు ఇట్టిజ వారు నెగెండ్ ఆనార్”, ఇజి వెహ్సాన్.

దేవుణు యేసుజ్ పరలోకమ్ దు ఒత్తాన్

19 యేసు యాకెజ్ విజు వెహ్సావెనుక దేవుణు యేసుజ్ పరలోకమ్ దు ఒత్తాన్. యేసు అబ్బె దేవుణు ఉణెర్ పడఃకాద్ బస్తాన్.

20 యేసు సిసూర్ విజుబాన్ సొన్ని దేవుణు సువార్త వెహ్సార్. వారు కిత్తి విజు పణిదిజ్ దేవుణు సాయం కితాన్. వారు కిత్తి బమ్మాతి పణిజాణ్ వారువెహ్సా మాట నిజం ఇజి దేవుణు తోరిస్తాన్.

Konda: కొండ బాసడు నెగ్గి కబ్బు
Konda Dora New Testament which was published in
2006

copyright © 2006 Wycliffe Bible Translators, Inc.

Language: Konda-Dora

Contributor: SIL International (in Asia)

All rights reserved.

2025-05-06

PDF generated using Haiola and XeLaTeX on 6 May 2025 from source files
dated 7 May 2025

840896da-3a66-5e43-9018-4a95a349d60c